


Sorunu Kaläg na Ikä
Caning



Caning Bible Translation

Sorunu Kaläg na Ikä Caning

Caning Bible Translation

copyright © 2018 Pioneer Bible Translators

Language: Shatt

Contributor: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022
2b40784a-4366-56e0-9a60-47746d31e227

Contents

Luka	1
----------------	---

Inycil Luka

Täländiccä Legeygi tä Kaxsä Sorunongang

Sorunu Luka näka Luka me dāx biskonu me kälägä Poläs garekärejeyang. Luka garekärejey sorunong ta apangza ngondey säbangäs Tiyaflus. Luka paye Tiyaflus bale legednicc tä ngakä Yasuwa appoyo.

Ma Luka mändey mäpaye kän tä ota kä'day ndey bale zänggä nga tä legednicc ka xänang näs Yasuwa Almasiyang. Luka lapedäng ka yaxsäwecca apo tä ngakä Yasuwa näkä kän kä'dayang dacadas Yaxudiny na känggi näs Yaxudiny songang, kängga sogo ngaka tasiny na känggi apoccong, menggä wiy na känggi wegka tängang.

Sorunu Luka läpedäng ngaki Yasuwa kangad na kasogkang ndey sog kän bale akäsogi Kaläg xonyo kän täng tä ngaka tasiny. Sorunong lege ngakä aygä Yasuwa cawu xongondi musku siyāma tängang basa xongondi mägāmel tiyting.

Luka togodäng bandagä nga tä ngakä yänakä Yoxana me Pac na yänakä Yasuwa. Bandagä ngakenegi läpedäng ka Yasuwang näs me yaxsäwecci Kaläg kadästākog ka yaxsedängang. Sorunong koyo yaxsäwecca ngake tädäxiny tä ngakä Yasuwa, packāma na 'dongädāma na zägädāniccāma, Yasuwa na menggä räbke, wex-ekä Yasuwa, bäldeygä Yasuwa tä kän, menekāma, gadeygāma tä kalic, xäskāma na ngäsakāma tä xäs.

Läpidānic

¹ Kän mange käsäkädä dackä ngakä wexeki kasogāning na

* 1:9 Mändey säbangäs “curungguduni.”

kä'desesāning tä warogkang tä räbāne kä'day, ² winy ka'das luguki känggi wexe ngakä Kaläg na koxtu nga na aga ndä lugung tä kogkang. ³ Nenyang agānang na ngasang karäbtä ngakä weg kä'day appoyo tä debic ndä oxowa apo ka agä mändey anggärekarējey bandagä räbāne tägi kaxa ngondey Tiyaflus, ⁴ ndey ka gi bale zänggä ngakä wegki kalāpesāning tä giningang.

Duwalegä Iyānakä Yoxana

⁵ Tä butugku Xirudus bugun-ingzä Yaxudiya, me tämed tä Kaläggkandäng age ka Zakariya näs wayagkä menggä tämed tä Kaläg tä udsa säbangäs Abija. Ndä uxumandäng age ka Alizapad näs caxsä Xarunag. ⁶ Pädaxkäsa sälelexiny tagä Kaläg ndä sämene ngakä täsediccä Kaläg kä'day na akäsogi Kaläg payis känang appoyo. ⁷ Ndä pipindäng täsa säxong xa uxuma Alizapad pixing, ndä sa pädaxkäsa saboxso.

⁸ Xongonendäng Zakariya na udsä menggä wexeki kamen wexetang, kamen wex-ekä tämed tä Kaläg. ⁹ Na 'dodony* kadel täma täbangä tanyaranä menggä tämed tä Kaläg ka mä'doc taxä tämekä tedeldäkä Kaläg tä lägoygä mäsäs. ¹⁰ Ani mägä'doccus tä lägoygä mäsäsang, kulung känggi tängang kapasāning tunyu palacca.

¹¹ Na kala malayikanä Kaläggkandäng kawayasa täma dokolo tandä abanic täwang tumunu lägoygä mäsäs. ¹² Na toti Zakariya kox malayika na nyigatäg kamen ma mädätägä.

¹³ Na malayika ngade täma ka, “Zakariya, wanga nyigatäg xa Kaläg kädäng paleygägi. Uxugi Alizapad 'do yedäng päxä apang

tägi ndä gi n'doco dogada age ka Yoxana. ¹⁴ Ma mäsogo wanägi laye tidi, ndä kân mänge led-edäning xa sägäyäng ma, ¹⁵ ndä ma mälayis käxa tädäx na apo tagä Bazuwec. Ndä mawuxi bux säxong, na mändey wuxiki 'dazic tängang mawuxi säxong. Ma mälayis käxa päsewa na Ligidä Kaläg cawu cukuma tä bälegkä bosa. ¹⁶ Ma mämelede menggä Israyil mänge ta Bazuwec Kaläg. ¹⁷ Ma mälayis käxa päccada tagä Bazuwec na panggu kala panggudugku me logey Iliya ndey mawex mäganya menggäsa ndey laley enggengga, na menggä ko'do mawexe mäganya ndey nyangädä lelertäggä däppic ndey mäbolasa kân tä benggä Bazuwec."

¹⁸ Na Zakariya kamänze ka, "Agä asogowa key ndey abäle ka ngakong layecänäs tireneng? Xa agä kaboxsu ndä uxang kaboxsu mändey."

¹⁹ Malayika kabuc ka, "Agänang anäs Jiprayil. Agä awede tä cuku Kaläg ndä Kaläg kayaxsä agä ka agä awung alegeyze tägi agoying yaxsäweccong apong tägi. ²⁰ Ndä gang nyäpäladas gi legecce säxong, basa xongondi ngakong sogoduning tängang, xa gi kämen ngakang säxong, ndä kăcag wunosuno layeccänäs tire tä xongondi tängang."

²¹ Ndä kănatäng bene Zakariya tunyu mänedäning ka oxadi siye Zakariya kalaygädä taxä tämeki tedelang mänang. ²² Na kala mawetä tunyu ndä ikäma kaxsäwa mäyex legey täsa säxong, na todi sabäle ka mägox nimic tä cukuma taxä tedeläccä Kaläg, malewa na läläbey yä mäyex legey säxong. ²³ Kala wexekäma käpeläning na mägämele tä pa.

²⁴ Na kala todi uxuma Alizapad koxsonga kăcatäng asämeny

mädäg 'da'danyewa. ²⁵ Cängade ka, "Kaläggang kawex ngakong tagä, tä sänggong nyaläpäng paygänya ndä nyägäcay zänggä motakang tä warä kân."

Duwalegä Iyänakä Yasuwa Almasi

²⁶ Tä asämexsi aran layis näkä oxsongdugku Alizapatang, Kaläg kayaxsä malayika Jiprayil tä cabärä Calil tä kaxsä pana säbangäs Nasra, ²⁷ ta kedenweccandäng säbangäs Mariyom sader ta apangandäng säbangäs Yusif tä caxsä Dawud. ²⁸ Na malayika kawung täce, kämodey ce ngade täce ka, "Gingang nuxundugkägi kăbaxändey tä kănanng, Kaläggang nagi!"

²⁹ Na Mariyom kăbabangwa tä ngaki malayika kangatang, ndä cägäre bangä modeygi mänangang. ³⁰ Na kala malayika ngade täce ka, "Wanga nyigatäg Mariyom, xa Kaläg kadong baxändäg tägi! ³¹ Dänge! Gining no noxsongada ndä niyedäng päxä apang ndä dogada age ka Yasuwa. ³² Ma mälayis käxa ngake tädäxiny ndä säbangäs ma päxä pe Kalägi tiyating, ndä Bazuwec Kaläg togada butugku wawanäma Dawud täma. ³³ Ma mämene butug tä känggä Yaxup ndä sanydenendäng säxong, ndä butugkuma 'desetäsäno säxong."

³⁴ Mariyom ngade ta malayika ka, "Ngakong layeccä key, yä taxä nuxu kasäng na apang songang?"

³⁵ Na malayika kämeley ngade ka, "Ligidä Kaläg coccolacca tägi na panggu Kalägi tiyating wunodung wayedäng tä bälegkägi na asämexsägi lada, nenyang päxä pipini niyedängang näka tedelang, ndä säbangäs ma päxä Kaläg. ³⁶ Ndä za, wayigo Alizapad na boxuske mändey oxsong tä päxä apang yä kân bangäs ce pixi, gang satäng täce asämeny

aran! ³⁷ Ndä 'doga bede tä Kalägkandäng song."

³⁸ Na Mariyom kagixi ngade ka, "E, bi, anäs me wexiccä Kaläg. Wanga ngaki sogoduning tagäng layis wega tä bangä ngakigigong." Na malayika kä'doc kawangasa ce.

Mariyom na Alizapad

³⁹ Na tä sänggi Mariyom kangäsa tetex kä'doc tä kaxsä pa tä cabärä Yaxudiya, ⁴⁰ na caläs pang Zakariya na cägämodey Alizapad. ⁴¹ Na Alizapad kädäng modeygä Mariyom, na pipini tä bälegkäce Alizapatang kápäräwa, na Ligidä Kaläg kälīgä Alizapad. ⁴² Na Alizapad kasan kädawa ka, "Kaläg kadä wanägi tä warä uxu kä'day na päxägini tä bälegkäging! ⁴³ Agänang anäs xäng kädäppa ka bo Bazuweccang wung copu agäng? ⁴⁴ Ani kandängäs modeygägi na wundangang, päxä pipinong tä bälegkangang kápäräwa na wadäkä tididäg. ⁴⁵ Gi kábaxändey xa gi kämen ngaki Kaläg kalegey tägi ka 'desetäsäningang."

Mildä Mariyom tä Logakä Kaläg

⁴⁶ Na Mariyom ngade ka, "Mägaxsang dädäxti Kaläg, ⁴⁷ na ligidang kadeb led tä Kaläg me nayiccang, ⁴⁸ xa nyägox cuku molgang, agä me wexiccänya. Ndä ganang mönggä zädong, kä'day bangäs agä kaxa kabaxändey. ⁴⁹ Xa nyang nyäs Bazuwecca pädäggang kawex wexeka ngoniny tagäng ndä agänya tedeliny. ⁵⁰ Tä mönggä zong na banga, agänya watasa tä känggi nyaye nyang. ⁵¹ Nya nyawex wexeki tädäxinyang na andänya.

Ndä nyawasa känggi logoduning na wexe degejey tä mäganyganang.

⁵² Nyägäcoccoley mönggä butug yä nyägäpoka känggi butug wundung tängang tiyati,

⁵³ ndä nyägämas mönggä xas na weka apoccu,

yä nyamatä känggi näs tanganuwang na asängga päloccu.

⁵⁴ Nyaxony mönggä wexekänya Israyil xa nyanimäng agäwaydakänya,

⁵⁵ kala täseki nyadästäs wawanakogki mägaccängang, na ta Apraxim na atuge näs ur'dug."

⁵⁶ Kala Mariyom kuccu na Alizapad ta asämenyga kodos na cägämel tä panäce.

Iyänakä Yoxana

⁵⁷ Xongondi Alizapad kiye tängang, cägiyäng päxä apang. ⁵⁸ Na mönggä sogalinygäce na wayakäsa kädäng ka Kaläg kädädäxti agäwaydad täce na sägäledäno nace.

⁵⁹ Tä sänggi tespedespeng sawuno tä luwuku päxä pipi, ndä sägäpay ka sädogas agäma ka Zakariya täbangä mesa. ⁶⁰ Neng bosa kämele täsa ka, "A'a! Basa sädoga agäma ka Yoxana."

⁶¹ Na sängadeccä täce ka, "Nuxu kigkandäng tä caxsägo age mänang song." ⁶² Na sägertäcce ta mesa Zakariya ndey ka sä'dox aga mäpaye mädogas ta penäma.

⁶³ Na mamän owdu badaxiccä gärekärejeje na mägärekärejeysa ka, "Age ka Yoxana." Na sägädongasa kä'daygäsa.

⁶⁴ Na käccogogos ikä Zakariya kalengesäwa na nyipäräma kä'dakasäwa na malegeyze, malog Kaläg.

⁶⁵ Na mönggä sogalinygäsa kä'day nyigatäg kamen, na

ngaki kasogänong kalaye leg-
eydäno tä kaxsä cabärä Yaxudiya
kä'day. ⁶⁶ Na känggi kä'day
kädäng ngakiyang kameskädä
tä mäganyga ndä ngadeccä ka,
“Päxä pipinong wunodung layis
wi?” Xa andä Kalägang nang
seley.

Logeygä Zakariya

⁶⁷ Na Ligidä Kaläg kälīgä Za-
kariya me Yoxananag na malo-
geza ka,

⁶⁸ “Andädäxti Bazuwec Kalägä Is-
rayil,

xa nyawung tä posakä kän na
'dakakä kän.

⁶⁹ Ndä nyägängusey yaxticcä
xonyad tä kog tä känggä
me wexiccänya Dawud,

⁷⁰ ka'das ani nyalegeyzenäs
na ikänggä menggä lo-
geygänyagi mägaccäng
tedelinyang,

⁷¹ ndey ka nyäxony kog tä menggä
kurog,

na mändey ta asänggä känggi
kä'day saxe kogkang.

⁷² Nyasog ngakong ndey
nyälapa agäwaydad ta
wawanagkog,

na ndey nyäniming axäskänyagi
tedelinyang,

⁷³ na täsedicci nyägäloguwa
nang ta wawanog Apraxi-
mang.

Täsedicci lapedäng ka

⁷⁴ kogki nyaxony kog ta asänggä
menggä kurogkang

ndakä wexedig nya na nyigatäg
song,

⁷⁵ tä tedeldäg na lelextäg tagänya
tä loydukgä aygog.

⁷⁶ Ndä gi päxä penangong
säbandäs gi me logeygä
Kalägi tiyating,

xa gi piccadas tagä Bazuwec ndey
bolasa sota tänya,

⁷⁷ ndey dogä ligiccä xonyad tä
känggä Kaläg na wangakä
ngaka tasiny tä känggänya.

⁷⁸ Xa agäwaydakä Kalägog
wunodung xonyo kog paratasawa
ka'das keyzic

⁷⁹ ndey bowdic wung tä känggi
käcasäng tä lätäng na tä
ligidä xäsang,

ndey meskede exenggog ta
akäsogä modey.”

⁸⁰ Ndä päxä pipi wedede na
kiniy tä wane na yexkä nga. Ndä
mäguccu tä pumpung basa xon-
gondi mawesawa na wexed tä
Israyil tängang.

2

Iyinakä Yasuwa Almasi

¹ Tä enggä sänggi Axustus
Kaysar kabokung asiriye tunyu ka
kän kä'day 'docco garekärejeysa
aga tä cabär kä'day tä wexekä
tuluba. ² Ndä garekärejeysa
täzälägang, tä cuku Kuruniyos
tä butug tä Suriya. ³ Kän kä'day
kä'docco tä cabärtaga ndey
garekärejeysa aga täng.

⁴ Na kala Yusif kawetä mändey
tä cabärä Nasra tä Calil kä'doc
tiyati tä Petlaxam cabärä Dawud,
tä Yaxudiya, xa ma mä me
cabäri ndä mä wayäwan tä
caxsä Dawudag. ⁵ Mägä'doc
ndey sägärekärejeysa agäsa na
Mariyomzi sader tämang ndä
cägä'dosuwa.

⁶ Na tä cuku sa todi, pipi
kagasäng ce. ⁷ Na cägiyäng
päxäcenä zäläg näs päxä apang
na camulungi na tandä ndä
cäzänggasa tä kuburicci säziye
male tängang, xa axa säzänggasa
täng undung.

Copkä Menggä Megäs

⁸ Ndä tänya owdi menggä
megäsätäng cuccu käsac tä
korongo meske sagunuga ongud.

⁹ Na malayikanä Kaläg kaweye-
sawa täsa na tädäxticcä Kaläg

käbanyeza tä waräsa na nyigatäg kadele sa nano.

¹⁰ Na malayika kangada täsa ka, “Wanga nyigatäg! Ndänge ngakong, agä anduwale yaxsäwecca apo tanggo aki kodung wadäkä tididäg tä kän kä'dayang.” ¹¹ Xongondong sägiyäng me nayic tanggo tä cabärä Dawud. Mang mäś Almasiyang ani näś Bazuweccang. ¹² Ndä boliccongāng lapedäng tanggo ka, anggo 'doxadang päxä pipi kamulungiwa na tandä ndä sāngo tä kuburicci sāziye male tängang.”

¹³ Na kälilic malayikadagi tiyating kaweyesāno mange na malayikani dädäxti Kaläg ngadeccä ka,

¹⁴ “Dädäxtic tä Kaläg tiyati, na modey täzäg tä känggi nyäpayeng!”

¹⁵ Na kala malayikada kawan-gasa sa kä'docco tiyati, na menggä megäs ngadeccä tä ngastängga ka, “Nycugo tä Petlaxam ndey laleyig ngaki kasogäno todayang, aki Kaläg kaläpäng takogkang.”

¹⁶ Na sägä'docco tetex sa'doxa Mariyom na Yusif na pipi sägäsänggasa tä kuburicci sāziye male tängang. ¹⁷ Kala sägox pipi, na saser ngaki saläpa täsa tä ngakä piping, ¹⁸ na känggi kä'day kädängang käsaydä aga tä ngaki menggä megäs kalegeyang. ¹⁹ Yä Mariyom kameskäde ngaki kä'day tä mägaxse ndä cägäre tä mägaxsäce ka ngakong key.

²⁰ Na kala menggä megäs kämele, dädäxti Kaläg tä ngaki kä'day sägädäng na sägoxang, xa nga kä'day ka'das ngaki saläpe täsang.

²¹ Tä sānggi tespedespeng, salu ma na sadogas agäma ka Yasuwa, agi malayika kadogas musku cägoxsonga täma songang.

Koyakä Yasuwa Taxä Tämed tä Kaläg

²² Ani Mariyom kä'desenäs sānggä iyekeneng, tä bangä asiriyenä Musa, Yusif na Mariyom kagoying Yasuwa tä Ursalim ndey sädogas ma tä Kaläg ²³ ka'das ngaki gärekärejeyno ta asiriyenä Kaläggkang, ka “Pipugi siyedäng tä zäläggkang näś enggä apangasang sädoga kä'day tagä Kaläg”, ²⁴ ndey sädämze ka'das legeygi asiriyenä Kaläg kangatang, ka sädoga enggä kurugä pa pädax na cong näś kurugä kaxsetang sädoga pädax.

Logeygä Simiyan

²⁵ Ndä gang 'doxtiyandäng tä Ursalim säbangäs Simiyan apangza lelexang ndä kamen ngakä Kaläg ndä bene käxa xonyo Israyil. Ligidä Kaläggkandäng täma. ²⁶ Ligidä Kaläg kaläpe täma ka mäxse song basa ka mox Almasini Bazuwec Kaläg kayaxsängang. ²⁷ Na Ligidä Kaläg koyo Simiyan na mawung taxä tämed tä Kaläg, mändey Yusif na Mariyom kagoying päxä pipi Yasuwa ndey ka säsoğ tanyara täng tä bangä asiriye, ²⁸ na Simiyan käpokä ma tä asängge ndä log Kaläg ngade ka,

²⁹ “Gang, tä bangä ngadagkägi gi Kalägi ngondeyang, mene andang 'däki me wexiccägi 'doc na modey.

³⁰ Xa agang kox me 'dagkicci

³¹ käbolasa tagä kän kä'dayang.

³² Mangang mäś banyiccang, ndey gi Kaläg, lapasäwa tä känggi näś Yaxudiny songang, na dädäxtic tä känggägi menggä Israyil.”

³³ Na todi Yusif na Mariyom käpegse tä ngaki kalegeyno ta päxasang. ³⁴ Simiyan kapes sa. Na ngade ta bosa Mariyom ka, “Ndelde wunggugo appoyo! Kaläg kalebäng päxä pipinong

ndä mang mäsogo telänad na ngäsakä kân mange tä Israyil na mälayis bolicci kân saxeng.³⁵ Ndä nästire, mäganygä kân mange lapetäsäno tä bangä wex-ekäma ndä gining tä ngasägi, mägaxsägi 'dudowa!"

Ngakä Xana

³⁶ Mändey me logeyandäng näs ux säbangäs Xana päxä pe Fanawil tä caxsä wayakä Asir. Ce caboxsä na'do, sabagäning na yoxuce sägäcuccu tä jendäg paxtänding basa xäskäma. ³⁷ Na cäguccu tä mandurtug tä jendäg udiny tesped wang tesped (84). Ndä casäja axä tämed tä Kaläg song, cädukuru na uxkud tä ngasäce ndä cäpalacca ongud na säxe kä'day.

³⁸ Na tänya xonggondi, cawung täsa na cadeb logakä Kaläg ndä cälege ngakä pipi tä menggä Yax-udinygi kä'day bene tegic tä Ursalimang.

³⁹ Na kala Yusif na Mariyom kä'dese nga kä'day tä bangä asiriyenä Kaläg, na sägämele tä Nasra tä cabärä Calil. ⁴⁰ Na päxä pipi ka'donga ndä kalay pädag, kápäsäwa na lelertäg ndä payicä Kaläkgang na ma.

Yasuwandäng Taxä Tämed tä Kaläg

⁴¹ Me Yasuwanag na bosa 'docco tä Ursalim jenijeni tä Pärkid*. ⁴² Ani jendäggä Yasuwa kácogäs asiny wang pädaxang, sägä'docco tiyati tä Ursalim na bangä adi. ⁴³ Säga'docco sägä'dese Pärkid na tä melgäsa tä pa, päxä celic Yasuwa kalay tong tä Ursalim. Ndä mesa na bosa yex song. ⁴⁴ Sa säcuccu ka mandäng na känggi säwedeccä nangang, sägäcogu sängädi nuxungang, na

sägä'docco sämānecce sänyame ma tä warä wayakäsa na biskodagäsa. ⁴⁵ Ndä sa'doxas ma song na sägämele tä Ursalim tä nyam.

⁴⁶ Tä sänggi kodos tä bāgeneng, sa'doxas ma taxä tämed tä Kaläg, tä kaxsä kal. Mägacca tä pidänä balduwiny, mädelde wunduma täsa ndä māmāne sa. ⁴⁷ Na känggi kä'day kädäng legeygä Yasuwang, kädongo tä yerändäggäma na bucuku nga ta menggä bäldey. ⁴⁸ Mesa na bosa kox ma na wadäka koyo na bosa ngade täma ka, "Päxang, wi siye gi käsogkuwa täwas mänang? Lala, menggo na agänang wanyamedig owdugi paccey."

⁴⁹ Na mägämele täsa ka, "Wi siye anggo nyamadang owdang-gang? Anggo 'diyang ka pang Ap-panang nyaza anycu tängang?"

⁵⁰ Ndä musku kax menggäsa kabäle ngakäma täsa song. ⁵¹ Na sacoccoleza sägämelese tä Nasra ndä mädede nga täsa. Ndä bosa meskede ngaki kasoguningang kä'day tä mägaxse.

⁵² Ndä Yasuwa 'dongada na lel-ertägke, ndä Kaläg na kân paye ma.

3

Weyekä Yoxana ta Akäsog

¹ Tä jendäggä asiny wang mädäggang tä butugku Tapariyos Kaysar, ndä Pälatis Alpondi buguningzä Yaxudiya. Xirudus bazuweccang tä Calil, na päxä bosa Filipus päxä bazuweccang tä cabärä Itoriya na Taruxontis. Yä Lisaniyus bazuweccang tä Apäliya.

² Legeygä Kaläg kawuno ta Yoxana päxä pe Zakariya tä pumpung ani Xanas na Kiyafa,

* **2:41** Karamana Yaxudiny sogong ndey säniming 'dakicci Kaläg kä'dakasanäs tä cuku sa tä cäläxtäg tä Masarang. Yaxudiny bangäs sapärkidki "Lägey" ndey ka malayikanä xäs kawungang keley padäggäsa lägtä xa sägadas tamiccä päxä dopolog tä akäsogalinygäsa.

seley layis ngotorpugu menggä tämed tä Kaläggkang. ³ Na mäga'doc tä Colonggonä Urdun kä'day, mäduwale ngakä xajkä kän tä ngaka tasiny, na pac tä ma. Ndey Kaläg cay ngaka tasinygäsa xa sägäxaje.

⁴ Ka'das ani gärekärejesawa tä sorunu legeygä me logey Isayang, "Ndänge ngasawan logacca tä pumpung ka, 'Weye akäsog tä Bazuweccog, ndokala akäsog täma.

⁵ Ko'dota kä'day 'docco päseccä, cabärta na enggä cobocoboriny mäxotusuno, na akäsogi kagolopewang dokol, na sögi ngudungudulang zäräzirigiwa,

⁶ ndey kän kä'day laley xonyakä Kaläg.'"

⁷ Na Yoxana ngade tä xä'däni kawuno tä paccang ka, "Ama caxsä enggä tämong! Xänang kädaxä anggo ka mpexkeng zängaygä Kaläg tanggong? ⁸ Ndä gang läpäning 'dogi lapedäng ka anggo kälayisang kangga kämele tä Kaläggkang. Ndakä layisang kangga bangada Apraxim tä ngastängga ka menanang. Ndakä ngadang ka, 'Doga siyewa tä kogkandäng song.' Agänang aläpedäng tanggo ka Kaläg nguso nganyugong teyis pipu ta Apraxim! ⁹ Seley ganang kompa käcicilisüwa tä mäxkä ewe ndä eti iyedäng engge apoccu songang säluwütäsa täzäg ndä sägawa tä mas."

¹⁰ Na xä'dä kamän ma ka, "Neng gang wasogig wi?" ¹¹ Yoxana kabuc täsa ka, "Käxa tandu täng pädaxang larä na käxi ne wundungang ndä käxa siyake tängang sog mänang."

¹² Menggä yawgä tuluba mändey kawuno tä pac tä ma na mäne ma ka, "Me bäldic, yä wasogig wi?" ¹³ Na maläpe täsa ka, "Ndakä yawadang weg

mangeccä tä wegki saläpäng tanggong."

¹⁴ Ndä kulung asägaru mändey kamän ma ka, "Yä was, wasogig wi?" Na maläpe ka, "Ndakä bagkadang weg tä kän na rejic mändey na celdug, gixi maxiye na 'dogi sädogodäng tanggong."

¹⁵ Na todi kän wadäka kalaye tidiny xa satäng bene Almasi, na soxo ka Yoxanang näs Almasi. ¹⁶ Yoxana kabuc täsa kä'daygäsa ka, "Agä anäs käxa pacce anggo tä ma winy, yä kigkandäng wunodung ndä panggudugke mo'do kanggä. Agänang anäs käxa ulidi käbadage song. Ndä ma mäwunodung mägodung Ligidä Kaläg tanggo na mas. ¹⁷ Ndä adalandäng ta andäma ndey mexenäs nyada täpox yä mädogo kuny tä curunuma, yä nyada mäduonyu na masa paxewa song."

¹⁸ Ndä ta akäsogong na pagad mange, Yoxana kalogey yaxsäwecci apo lege ngakä Kaläggkang. ¹⁹ Ndä ani Yoxana kä'dedeyis Xirudus tä ngakä batakä uxä päxä bosani säbangäs Xirudiya na wexeki mändey mawex tasiny kä'day, ²⁰ Xirudus kasog 'doga tas mändey. Madene Yoxana tä ax.

Packä Yasuwa

²¹ Kän kä'day käpacäning tä ma, na Yasuwa mändey kawung sägäpaccä. Ani mäpalaccanäsäng tiyati kalengesäwa, ²² na Ligidä Kaläg kacoccoleza täma oxowa ka'das kuruwic na legey käpätäsäng tiyati ngadeccä ka, "Giningang nuxundugkägi näs penanggi ampaye ngakeneng. Xa ngakägi kasog wanang tiding."

Caxsä Wawanagä Yasuwa

²³ Ani Yasuwa kadebäs wexeke-neng, satäma jendäg ud wang asiny. Ndä kän oxo ka mäsa päxä pe Yusuf, päxä pe Xali, ²⁴ päxä pe Matad,

päxä pe Lawi, päxä pe Malki,
 päxä pe Yuna, päxä pe Yusif,
²⁵ päxä pe Matäsaya, päxä pe
 Amus,
 päxä pe Naxum, päxä pe Xasäli,
 päxä pe Nacayi, ²⁶ päxä pe Mas,
 päxä pe Matäsaya, päxä pe
 Samayin,
 päxä pe Yusic, päxä pe Goda,
²⁷ päxä pe Yoxanan, päxä pe Resa,
 päxä pe Zaräpabil, päxä pe Saltil,
 päxä pe Niri, ²⁸ päxä pe Malki,
 päxä pe Adi, päxä pe Gäsım,
 päxä pe Almadam, päxä pe Ir,
²⁹ päxä pe Gesuwa, päxä pe
 Aläyasär,
 päxä pe Yoram, päxä pe Matad,
 päxä pe Lawi, ³⁰ päxä pe Simiyan,
 päxä pe Yaxuza, päxä pe Yusif,
 päxä pe Gonam, päxä pe Aliyakim,
³¹ päxä pe Maliya, päxä pe Minan,
 päxä pe Matada, päxä pe Nasan,
 päxä pe Dawud, ³² päxä pe Yasa,
 päxä pe Oped, päxä pe Pos,
 päxä pe Sala, päxä pe Naxsun,
³³ päxä pe Aminadip, päxä pe
 Adämin,
 päxä pe Arni, päxä pe Xasrun,
 päxä pe Faris, päxä pe Yaxuza,
³⁴ päxä pe Yaxup, päxä pe Isxag,
 päxä pe Apraxim, päxä pe Tarex,
 päxä pe Naxur, ³⁵ päxä pe Suruc,
 päxä pe Raw, päxä pe Falic,
 päxä pe Apir, päxä pe Sela,
³⁶ päxä pe Kayinan, päxä pe
 Arfagäsad,
 päxä pe Sam, päxä pe Nox,
 päxä pe Lamag, ³⁷ päxä pe
 Mätäsalex,
 päxä pe Anax, päxä pe Yarad,
 päxä pe Maxalil, päxä pe Kinan,
³⁸ päxä pe Anos, päxä pe Sed,
 päxä pe Adam, päxä pe Kaläg.

4

Däniye Käläbä Yasuwa

¹ Ndä nyägäligä Yasuwa na
 Ligidä Kaläg, mägämel na
 Colonggonä Urdun, Ligidä Kaläg
 kagoying ma tä pumpung.

² Däniye käläbä ma tä sängga
 udiny pädax. 'Doga masi
 wundung tä sänggi, ani sänggi
 kä'desesänonusang ma magä'di
 na'do. ³ Na Däniye ngade täma ka,
 "Näs Päxä Kaläg seleyang, lapi tä
 ngayiccong layis zäx." ⁴ Yasuwa
 kabuc ka, "Gärekäreesawa tä
 Sorunu Kaläg ka, 'Siyatag tol naye
 käxa julang song.'"

⁵ Na Däniye kabag ma tä
 ke'dengge'demes ndä banye ow
 na gertä bugundugku walangiccä
 täzäg kä'day täma. ⁶ Na Däniye
 läpadas ta Yasuwa ka, "Adogo-
 dung bugundugkong kä'day tä
 andägi na tädäxtägki wedetese
 nangang, xa sadogung panggudug
 tä andang ndä adogada tä käxi
 ampayeng. ⁷ Ndä känox kunduku-
 rusa käpaley agängang, wekong
 kä'day känggig." ⁸ Yasuwa
 kabuc ka, "Gärekäreesawa ka,
 'Dukurusa pala Kalägägi na wexe
 ngake tol.'"

⁹ Däniye kabag Yasuwa tä Ur-
 salim, na kädokalasa ma tiy-
 ati täzä ndandangzä axä tämed
 tä Kaläg, na ngade täma ka,
 "Känox näs Päxä Kaläg seleyang,
 xudiwa täzäg todong. ¹⁰ Xa
 gärekäreesawa ka,
 "Kaläg yaxsedäng malayikadage
 tägi

ndey meskädä gi,'

¹¹ 'muso gi ta asängga wange gi
 ndey ka 'dingäsa exenägi tä
 ngayic song.'"

¹² Na Yasuwa kabuc ka, "Sorunu
 Kaläg ngade ka, 'Ndakä läbä
 Bazuwec Kalägägi song.'"
¹³ Na todi Däniye kä'dese läbke
 bägälic, na kala kawangasa ma
 basa xongoda.

Tebekä Wexekä Yasuwa tä Calil

¹⁴ Yasuwa kälīgäwa na pang-
 gudugku Ligidä Kaläg, na kämel
 tä Calil, na todi lulungudäma
 kuduwarewa kä'day tä kaxsä
 cabär. ¹⁵ Na madeb bäldey tä

axinygä palicinygä Yaxudiny na
kän kä'day kädädäxti ma.

Pexkekä Yasuwa tä Nasra

¹⁶ Ndä kala gang Yasuwa
kawung tä Nasra, tä owdi
ma'donga tängang, na mägä'doc
maläs axä paliccä Yaxudiny
tä xongondu Sapid, xa nyang
näs tanyara tāmang. Mangäsa
tiyati tä geney, ¹⁷ na sadogas
sorunu me logey Isaya täma.
Na malenge soru ma'doxa owdi
gärekärejesawa ka,

¹⁸ “Ligidä Bazuwec Kaläggkandäng
na agä,

xa nya nyaseny agä

ka agä anduwaley yaxsäweccä
nyani apong tä menggä wiy.

Ndä nya nyayaxsä agä ka agä
anduwale 'dagkic tä känggi
kacikiliningang

na ndey ngojony zayza,

na känggi sägäcäläxtiyang
sä'daka,

¹⁹ ka agä anduwale jendä agä
waydagä Bazuwec tä kän.”

²⁰ Na kala mägäräkä Sorunu
Kaläg na madoga tä käxi kamen
wexetang na mägäcca. Na

Känggi kä'day tä axä paliccä
Yaxudinyang kamende aga täma.

²¹ Na Yasuwa kăbäldeyza läpede
täsa ka, “Ngakä Kaläggong
kändängeng genewang, xongon-
dong kalayenäs wega.”

²² Na kala kä'daykäsa salegeyze
appoyo tä ngakä Yasuwa,
na sa'dämde legeygi tidiny
käptäzäng ikämang. Na
sängadeccä ka, “Yä 'doxtong de
paxä pe Yusifang?”

²³ Yasuwa ngade täsa ka,
“Nästire anggo zeredeng ngakong
tagä ka, ‘Wanga tumarajuwic,
däxä ngase!’ na kämpayang tagä
ka, ‘Dogi kändängig ka gi käsog
tä cabärä Kafärnaxumang, sogä
todong tä cabärägi mändey.’”

²⁴ Na mapos legey ka,
“Aläpedäng zänggä nga tanggo

ka, me logeyandäng sägixidi tä
cabäre song. ²⁵ Ndä näs tire

aläpedäng ngakong tanggo ka
madurinyatäng mange tä cabärä
Israyil tä cuku me logey Iliya
ani zäkoxa kärigkäwa tä jendäg
kodos na asämeny aranang, xas
kawung tä walangic kä'day. ²⁶ Yä
Kaläg kayaxsä me logey Iliya ta
nuxu accäsa song, basa ta uxi näs
mandur näs me pungud tä kaxsä
pang Sarfa tä cabärä Sayidunang.

²⁷ Ndä menggä omodatäng mange
tä Israyil tä cuku me logey Ilisa,
yä nuxu accäsandäng kädäxäwa
song, basa Naman me pungudi
käpätäng Suriya.”

²⁸ Ani sägädängäs ngakon-
gang, känggi kä'day tä axä
paliccä Yaxudinyang käsängasa
paccey. ²⁹ Na sangusosuno

tiyati, samagäng ma tunyu tä
kaxsä pa. Na sagoyas ma tä
nyixtä paxä cobocoboric, säpaye
säzajas ma täzäg tä zä cabäri
käke'decekang. ³⁰ Neng mawetä
tä warä xä'dä na mägä'doc tä
akäsogäma watäkäma.

Wexekä Yasuwa tä Kafärnaxum

³¹ Yasuwa kä'doc tägaxsä
Kafärnaxum tä Calil, tä xongondu
Sapid, na madeb bäldeygä kän.

³² Na sa'dämde bäldeccäma xa
soxo bugundug täng.

³³ Ndä tänya axä paliccä
Yaxudinygi apangandäng käxa
tasandäng tä wane, ndä kapere
ka, ³⁴ “Wayi! Wanga was
watäkäsko, Yasuwa me Nasra!
Gining kuwung tä paxagäsko?
Ayex gi ka giningang Ndedelang
na näs näkä Kaläg.”

³⁵ Na Yasuwa kadux käxa tasti
tä wanämang ka, “Päli! Wete
tä wanäma!” Na kala käxa tas
kacodasa ma täzäg tä pidänäsa
na kawetä napäl kawung ma
käppärjig.

³⁶ Känggi taxä paliccang,
kädongasa ndä mänedäning

ka, "Oxadi sogowa todong man-ang? Na butug na panggudug mädaxedäng litigita tasiny tunyu na wedeccä!"³⁷ Na kala lungudä Yasuwa kawasasäwa tä cabär bägälic.

Yasuwa Däxä Kän

³⁸ Ani Yasuwa kawangasanäs axä paliccä Yaxudinyang, maläs pang Saman. Na ma'doxa wawana uxu bähadiccandäng paccey, na sägäpay Yasuwa ka däxä ce. ³⁹ Na mägädokol todü zäce na maduxsi ka bähadic lay wundung täce. Na käccogos cängäsa tiyati cawexse täsa.

⁴⁰ Tä 'dängakä xong, känggi wayaka täxäccä na täxäka cagäcaguwinyang, sagoying täma. Na mägäläbtä sa kä'day na wadäkäsa kädaxäning. ⁴¹ Kängga tasiny kawetäcco tunyu mangeccä, na pered ndä ngadeccä ka, "Giningang näs päxä Kaläggkang!" Na madux sa mäleyis sa legey xa sa säyex ma ka mäsa Almasi.

⁴² Na megetuduyzi täbängeneng, Yasuwa kawangasa sa ka'doc tä owda kaculdoy, yä musku xä'dä nyame bangäma. Ani sa'doxus mang, säleyis ma 'doc wangesänakä sa. ⁴³ Ndä Yasuwa ngade täsa ka, "Basa anduwaley yaxsäwecci apo lege ngakä bugundugku Kaläggkang tä kulung cabärtagi tängang mändey, xa ngakongag Kaläg kayaxsä agä ka awung awexang." ⁴⁴ Na todi mäwedede mähäldecce tä axinygä paläccinygä Yaxudiny tä Yaxudiya.

5

Bängänakä Menggä Räb

¹ Xongenendäng, Yasuwandäng dokolo tä nyixtä Colonggonä Calil, ndä xä'dä kagurma paye däng ngakä Kaläg. ² Na mägox dämpejiginy pädax tä

nyixtä colonggo yä letuganagi näs menggä menekä asang, kawetäcco tunyu 'daye ka'dadaga. ³ Na Yasuwa ka'doc tä kaxsä nuxu dämpejigsi näs näkä Samanang, na mäläpede ta Saman ka, "Zexteyi dämpejigsiginong na pidänä ma." Yasuwa kacca tä nya kaxsä dämpejigsi ndä bälde xä'dä.

⁴ Yasuwa kä'dese legeyge, na ngade ta Saman ka, "Nyasi dämpejig tä maga tä'duginy na nggawi ka'dadagägo täng ndey meneng as." ⁵ Saman kabuc ka, "Ngotorpo, wakasängig kädäy tä wexed ndä kamenig nuxu 'dog song! Neng tä legeygäigong anggawada ka'dada tä ma."

⁶ Na sägädäng ngakäma sägawa ka'dadakäsa tä ma na samen as mange de ka'dadagäsa kacertäno. ⁷ Na sägädawasa ta biskodagäsagi tä dämpejigsi nuxungang ka wuno posa. Na sawuno sägäpäsä dämpejiginy pädax na as de paye muxosuno tä ma.

⁸ Saman Putros kox mänang, na kudukurusa tagä Yasuwa ngade ka, "Bazuwec, wede wangasa agä, xa anäs käxa sogo ngaka tasiny!" ⁹ Na todi Putros na känggi namang, kädongo tä menekä aski samendä mangeng. ¹⁰ Yaxup na Yoxana enggä penggä Zapadi menggä wexed na Saman kädongo mändey. Na Yasuwa ngade ta Saman ka, "Wanga nyigatäg, xa gang na ur'dug gi layis me menekä kän." ¹¹ Na kala sagoyas dämpejiginygäsa tä tungurtic, na sawangasa weg bägälic na sägäräbkädä Yasuwa.

Däxkä Me Omo

¹² Tä cuku Yasuwa tä nuxu kaxsä pandäng, apangandäng kawung täma wane kä'dod na omo. Mägox Yasuwa na mägunusawa täzäg mähäy zäg na manyäxay Yasuwa ka,

“Bazuwec, kä'dang mpayeng kax kusog wanag kalay apo.”¹³ Na Yasuwa kälänga ande käpära ma na ngade ka, “Agä ampaye asog gi lay mpo. Omo caya!” Na käccogös omo kaway tä wanäma.

¹⁴ Na Yasuwa kä'dedey ma ka andakä mäläpe tä nuxu kig song. Na madästä me omo ka, “Wede koyi ngasägi ta me tämed tä Kaläg na koyi 'dogu tämekägi ndey mäduwalasa ka wanägi käläy apo, tä bangä asiriyenä Musa kadästäse nangang, ndey säbäle ka wanägi käläy apo.”¹⁵ Yä wadi lulungudu wexekä Yasuwa kawasasäwa käked na xä'däni kädängang kawuno tä dänggä ngakäma ndey Yasuwa däxä sa tä täxäkäsa.

¹⁶ Ndä Yasuwa päledeswa tä owda kaculdoy xondaxonda watäke tä paley.

Yasuwa Kadäxä Pudude

¹⁷ Na xongenendäng Yasuwa bäldecce na Farisiny na menggä lelericcä asiriyenä Musa aki käpädasäno tä Calil na tä Yaxudiya na tä Ursalimang käcasäng käsac, ndä pang-gudugku Kaläggang kasog Yasuwa däxä kängang.

¹⁸ Kulung apangas kawuno poko pudude tä salany. Säpaye ka sägoyas ma tax tagä Yasuwa.¹⁹ Neng sa'doxa ow kapäs, ndä owda sälangeyis ma undung na sa'dese tazä ax sawe ax ndä sälolas ma nang tax na salany tagä Yasuwa.²⁰ Yasuwa kox menekä ngakäsa täma, na ngade ta pudude ka, “Bisko, ngaka tasinyägi käcayino.”

²¹ Na menggä lelericcä asiriyenä Musa na Farisiny käre tä ngastängga ka, “Apangza tiyanang degeje Kaläggang? Xänang caye ngaka tasiny tä kän basa Kaläggang?”

²² Ani Yasuwa kabälänäs ngakäsagiyang, mäne sa ka,

“Wi siye anggo makadang ngakong tä mäganänggong?”

²³ Ngakatiyag kädäppa ka xäxäminy ngadänängang, ‘Ani ka ngaka tasinyägi käcayining,’ wala ka, ‘Ngäsa tiyati wetäde?’

²⁴ Asogo ngakong ndey bäleng ka agä, Pächä Käxa Jul pang-gudugkatäng tä andang täzäg layis näka anycayis ngaka tasiny.” Na Yasuwa ngade ta pudude ka, “Ngäsa tiyati poka salanyägi wede tä pa.”

²⁵ Na tetex mangäsa tagäsa tiyati na madeccäng salanyäma mäga'doc tä pa, määdäxäti Kaläg.²⁶ Na mäganängäsa kabalza na sägädongo, na sägädädäxäti Kaläg tä ngaki kasogunong. Na kala sanyigata Kaläg, sängadeccä ka, “Was kanoxig ngaka tädäxiny xongondong.”

Yasuwa Kabandä Lawi

²⁷ Tä bangä ngakong Yasuwa kawetä tunyu na kox käxa age ka Lawi, säbängäs ma mändeng Mata, näs me yawgä tuluba käcca gixinicci taxä burkune. Na Yasuwa ngade täma ka, “Räbta agä.”²⁸ Na mangäsa tiyati mawangasa weg kä'day mäga'doc tä bangä Yasuwa.

²⁹ Na Lawi kasog led tä pane ta Yasuwa, na kala xä'dä na menggä yawgä tulubada na kulung palangaski tängang, käcasäng sagur siyad nasa.³⁰ Na Farisiny na menggä lelericcä asiriyenä Musa daweccä ta menggä räbkä Yasuwa ka, “Wi siye anggo darjangedänang na ziyaccang na wuxiccing na menggä yawgä tuluba na kängga sogo ngaka tasinyang?”

³¹ Na Yasuwa kabuc ta Farisiny ka, “Känggi täxäccä songang paye me nayic song, basa känggi täxäccäng käcag paye me nayiccang.”³² Agä kawung tä bangakä känggi apoccong

song, wadi kawung tä känggi sogo ngaka tasinyang ndey meley mäganyga.”

Yasuwa Legey Ngagä Akäsoga Warändi

³³ Sängadeccä ta Yasuwa ka, “Menggä räbkä Yoxana mene uxkud todotol na palacca tä Kaläg, na mändey menggä räbkä Farisiny sogo mänang, yä menggä räbkägi kädil siyad na wuxid tol.”

³⁴ Na kala Yasuwa ngade täsa ka, “Kädäppa ka dogang palangaska kawuno tä batad ka men uxkud yä me batatandäng nang? ³⁵ Musku xa ow wunodung säbate me batad täsa, ndä kala sälayenäs kängga mene uxkud.”

³⁶ Na sax mändey maser nga täsa ka, “Kigkandäng cerede nyonggo tä tandäna warändi ndä debede tä näka kaboxsu song. Käxa kasog mänangang kacere tandäni waränding, ndä nyonggoni waränding 'dasedäning na boxe song. ³⁷ Kigkandäng colada bux tä meldäna näs boxenendäng song. Käxa kacolas buxka warändi tä meldäna näs boxeneng, zage meldä na wanyisäwa. ³⁸ Wadi kädäppa ka buxka warändi säcolas tä kaxsä meldäna warändi. ³⁹ Ndä käxa kawux buxku boxinyganang paye buxka warändi song. 'Do ngade ka, 'Buxku boxinyga apoccu na wizicci.’”

6

Bazuweccä Xongondu Sapid

¹ Xongenendäng Yasuwa kadus kaxsänggä pelow tä xongondu Sapid. Na menggä räbkä ma kabag zänggä kuny kapujukuy kasi. ² Na kulung Farisiny ngadeccä ka, “Wi siye anggo nyca'dadang asiriyenä Musa tä xongondu Sapitang?” *

³ Yasuwa kabuc täsa ka, “Anggo känggeneng ngaki Sorunu Kaläg lege tä ngakä Dawud na biskodage kasog tä xondi xas kapaxäsang song? ⁴ Masogkuwa key maläs axä burkunu tämed tä Kaläg de mägä'doc masi siyaki tedelinyang, yä asiriye ngade ka säsi säxong bal me tämed tä Kaläg watäkeneng, ndä madoga kulung tä enggä biskodagämang?” ⁵ Na mängade täsa ka, “Agä Pächä Käxa Jul anäs bazuwec tä xongondu Sapid.”

Däx tä Xongondu Sapid

⁶ Yasuwa käläs axä paliccä Yaxudiny bäldecce tä nuxu xongondu Sapitandäng. Ndä apangandäng tänya axä owdi andä abanicce käxsä. ⁷ Menggä lelericcä asiriyenä Musa, na Farisiny jenggere Yasuwa käsac. Paye bäle ka cong Yasuwa däxäcci tä xongondu Sapitang, ndey ka sä'dox rakawza säglinäs nga täma. ⁸ Ndä Yasuwa yex ngakäsagi sabokasa tä zänggäsang, na mängade tä 'doxti ande käxsängang ka, “Ngäsa tiyati dokala tä pidi todong.” Na todi mangäsa magädokol tänya owdi.

⁹ Na Yasuwa ngade täsa ka, “Ampaye amän anggo ka, apo ta asiriye ka wex ngaka apoccu wala ka wex ngaka tasiny tä xongondu Sapid, ka xony rongic wala ka wanydäs?”

¹⁰ Na Yasuwa gaw ze käsaya sa na'anggäsa na ngade ta apangzi ande käxsäng ka, “Langi andägi.” Na apang kälanga ande na ande kaliy apo. ¹¹ Na ngaki mänangang kawaley mäganygäsa na sälegecce säbodo 'doga säsong ta Yasuwa.

* **6:2** Farisiny bangäs pujukuygä zänggä kunygi menggä räbkä Yasuwa kapujukuyang, wexed xa asiriye ngade ka kân wang wexed tä xongondu Sapid xa xongondu nunguccä Yaxudinyang.

Tecekä Yasuwa tä Känggi Sägälägä Asiny wang Pädaxang

¹² Xongondi Yasuwa ka'deg cabär tä paley tängang, masäng kädäy tä paley tä Kaläg. ¹³ Ow kagezä na mabandä menggä räbkäma madec kulung tä wara asiny wang pädax ndey mäligä. ¹⁴ Madeccäng känggong, Saman, ani sabangäs Putrosang, na päxä bona Andrawus, Yaxup, Yoxana, Filipus, na Partalmawus, ¹⁵ Mata, Toma, Yaxup päxä pe Xalafi, Saman ani sabangäs me mäganygä pädätäggang, ¹⁶ Yaxuza päxä pe Yaxup, na Yaxuza Askariyuti ani kamenes Yasuwang.

Yasuwa Bäldecce na Naye Kän

¹⁷ Yasuwa kawung täzäg na känggenegi kälägäng na mägädokol tä owda kädäpä. Na menggä räbkäma käyawesäno mänge na kän bägälic kädurisäno kápätäsäno tä cabärä Yaxudiya na Ursalim na tä nyäxtä ndandangzä colonggonu Taya na Sayidun. Sawuno tä dänggä bäldeccäma Yasuwa na ndey ka mädäxäsa tä täxäkäsa. ¹⁸ Na känggi ligitiga tasiny käco'deyang, kalaye käccag. ¹⁹ Xä'dä paye zegeleyi ma, xa panggudug päkätäsäng wanäma ndä mädäxä sa na'anggäsa.

²⁰ Na mägäza menggä räbkäma na mängade täsa ka, "Baxändäg ta anggogong widänangang, xa bugundugku Kaläg kunggog.

²¹ "Baxändäg ta anggogong xas tanggo gangang, xa edekeny matasang.

"Baxändäg ta anggogong ngecceng gangang, xa edekeny guguccing.

²² "Baxändäg ta anggogong säxaxenggong, na sa'däda tunyang, na sälangeng, na säpexke kala kängga tasiny

xa kämeneng ngakang, agä Päxä Käxa Julang!

²³ "Ledining na zazanedicci tä xongondi ngakong kasoguning tanggong, xa dericcägo ngondey tä pang Kaläg tiyati. Xa wawanakäsagi kä'doccong kasog mänang tä menggä logey.

²⁴ "Woyoy ta anggogong male tanggong, xa anggo ka'doxang buduldugkugo na kä'deseng kala.

²⁵ "Woyoy ta anggogong kämasang gangang, xa edekeny xas lukudi paxe anggo.

"Woyoy ta anggogong guguccing gangang, xa edekeny guniccing na ngecceng.

²⁶ "Woyoy ta anggogong kän kä'day lege ngaka apoccu tä ngakägong, xa wawanakäsagi kä'doccong mändey kasog mänang ta menggä logeygi celuwinyang."

Mpayä Menggä Kurugo

²⁷ Na Yasuwa kapos legey ngade ka, "Ndä agä alegecce tanggogong, ndelledeng wunggugong. Mpayä menggä kurugo, zoga ngaka apoccu tä känggi saxenggong.

²⁸ Pese känggi cage anggong, na palezi tä känggi cälixtinggong.

²⁹ Tä käxi 'dade abogiccäging, wexi cengicci kalayang täng 'dadä, na käxa bate tandänäging, togi nuxu ani biyeyang täng mändey. ³⁰ Kig kanyäxayging togi 'dogi payeng, ndä kig kabag 'dog täging, adakä naläng täng tunyu. ³¹ Koyada kän kala koyaki mpaye sägoydäs ging.

³² "Gang mpayadang känggi paye anggong, oxadi 'doxadang tä bangeneng? Mändey känggi sogo ngaka tasinyang paye känggi payeng. ³³ Gang zogadang ngaka apoccu tä känggi sogo ngaka

apoccu tanggong, oxadiyang 'doadang tä bangeneng? Mändey känggi sogo ngaka tasinyang sogo mänang. ³⁴ Ndä kangga kämeneng amusu tä känggi yexeng ka meledäng tanggong, oxadiyang 'doadang tä bangeneng? Mändey kängga sogo ngaka tasiny menede amusu tä kängga tasiny ndey mele täng kä'day. ³⁵ Wadi kädäppa ka mpayang menggä kurugo, na zolang ngaka apoccu täng, na meneng 'dog ndä bokosänang ka sämeleyäng tanggo song. Ndey dericcugo lay tädäx, na layisang enggä penggä Kalägi Tädäxang, xa mägaxsänya bow tä kängga mäganya juliny na tä kängga logacca song. ³⁶ Layesi kängga aga watäsa tä kän xa Menggoni Tiyyating age watäsa tä kän."

Wanga Käligkä Nga tä Kän

³⁷ Yasuwa ngade ka, "Wanga käligkä nga tä kän, andakä sägäling tanggo. Wanga zäpkoygä kän, ndey säwang zäpkoygä ko. Zaxi nga tä kän ndey säsxäng nga tanggo. ³⁸ Begsi ndey säbeg anggo. Kili 'dog appoyo, 'dixisa täzäg ndä ngädengädesa, ndä didili, ndey säduki tä satä ngorezägi. Tä kiligi gi gilingang sägilidäng tägi."

³⁹ Na mändey maser nga täsa ka, "Käxa layis ngojox 'dosto ngojox song, kädäppa mänang? Pädaxkäsa sädelgetese taxä 'dog, säxong? ⁴⁰ Me räb ngondey ta me bäldicce song, basa käxi sägäbäldey appoyong nyang laye kala me bäldicceneng.

⁴¹ "Wi siye gi zaye nyaxic ta awunu päxä bonggo yä kä'diya sarakaduwecci ta awununging? ⁴² Käsogkuwa key läpede tä päxä bonggo ka, 'Päxä bisko, wanga agä anycay nyaxic ta awunugi' yä kä'diya bo sarakaduwecci

ta awununging? Ama me fonofoney! Caya bo sarakaduwecci ta awununging täzäläg ndey zayza käley ndä kala bokung nyaxicci ta awunu päxä bonggong tunyu."

Ed Bäledeswa na Enggegenegi Iyedängang

⁴³ "Eta apo iyedäng päxenena tas song, ndä mändey eta tas iyedäng päxenena apo song. ⁴⁴ Ewe kä'day bälätäsäning na enggengganagi iyedängang. Ewegä kunyu iyedäng enggä 'dami song, na adilu sete tä kenyege song. ⁴⁵ Käxa apong ngaka apoccu päkätäsäng mägaxse, yä käxa tas ngaka tasiny päkätäsäng mägaxse. Xa 'dogi mälegeng päkädäng mägaxsämani kapäsang."

Padäg Pädax

⁴⁶ Yasuwa ngade ka, "Wi siye anggo bangadang agä ka, 'Bazuwec, Bazuwec,' ndä wexedeng ngaki aläpedäng tanggo songang? ⁴⁷ Käxa kawung tagä ndä delde wunde tä legegong ndey wexse nangang, agä aläpede täng ka käxeneni ka'das ⁴⁸ apangza kadony pane kabosasa täzäg loy, ndä repesa kadasu täzä tappa. Faya kawung basa colonggo kämamanya tä pox de käbung pa, ndä kägä'dikiy pa song, xa kärepesawa appoyo. ⁴⁹ Yä käxa dänge ngakang ndä wexe songang, käxeneni ka'das apangza kadony pane täzäg winy kabosasa kadasu säxong. Ndä colonggo kapäs käsajä pane, na kagurumusawa tetex na kawanydäswa seley!"

7

Nayigä Cäläxsä Ngotorponu Asägaru

¹ Ani Yasuwa kä'desenäs bäldeyge kä'day tä känang, maläsa Kafärnaxum. ² Ndä

ngotorponu asägarugu Romanandäng tänya owdi paye cäläxsä nano, ndä nya cäläxsämani täxä paccey paye äxsä. ³ Ani ngotorpo kädängäs ka Yasuwa kawunäsang, mayaxsä ngondowinygä Yaxudiny ta Yasuwa, ka säbandä ma mäwung, ndey mänay cäläxsä ngotorpo.

⁴ Sawuno ta Yasuwa, na sägä'dedey ma ka, "Wede xonya ngotorpo xa mang mägädäppas xonyatang, ⁵ xa mäpaye känggä Yaxudiny, na mändey madony axä palic."

⁶ Na todi Yasuwa kä'doc nasa. Ani sägä'docconäs ngäte tä pang, ngotorpo kayxsa aminuge kaläpe täma ka, "Bazuwec, wanga dereygä ngasägi xa kandäppas ka gi wung tä panang song. ⁷ Nyang kasog asaxe wunad tägingang. Ndä gang ngadi winy ndey cäläxsang 'dox nayic. ⁸ Ndä agä mändey anäs käxa panggudug tä ande kamen asägaru, ndä kangada tä nuxu ka, 'Wedeng' na 'docco, na tä nuxung ka, 'Bong' na wunodung, na tä cäläxsang ka, 'Wexe 'dogongang,' na wexe 'dogeneni."

⁹ Ani Yasuwa kädängäs ngakongang, ma'dämdes ngakäma. Na mawexwa mängade tä xä'däni räbtomang ka, "Aläpedäng tanggo ka tä Israyil bägälic ka'dox käxa kamen ngakang ka'das 'doxtongandäng song!" ¹⁰ Na kala känggi sayaxsäng, kämele tä pa ka'doxäng cäläx kalay apo.

Nguseygä Pächä Mandur tä Xäs

¹¹ Kala tetex Yasuwa kä'doc tä kaxsä pana säbangäs Nayin. Na menggä räbkäma Yasuwa na xä'dä kä'docco nama. ¹² Sawuno saläs kaxsä pa, na sa'doxung apangandäng käxsä kän käpokung tunyu, ndä nyang nuxundugke ta bona ndä cäs

mandur, ndä känatäng nace mange.

¹³ Bazuwec kox ce, na agäma kawasa täce na mängade täce ka, "Wanga ngeyig." ¹⁴ Na mawung mägäläbä salany, na nycogi pokaccangang kädokalasa kisiid. Na mängade ka, "Pächä op, angade tägi ka, ngäsa tiyati!" ¹⁵ Na pächä opi käxsängang kangäsa tiyati na kalegese, na Yasuwa kämeles ma ta bosa.

¹⁶ Na sägädongo kä'daygäsa, na sadelese tä dädxätigä Kaläg, sängadeccä ka, "Me logeyga tädäxandäng tä warog!" na, "Kaläg kawung tä posakä kängge!" ¹⁷ Na todi lulungudä Yasuwa kawasasäwa tä Yaxudiya na tä cendegä walangic kä'day.

Yasuwa na Yoxana me Pac

¹⁸ Menggä räbkä Yoxana kaläpe ngaki kä'day Yasuwa kasogkang ta Yoxana. Na Yoxana ka-bandä menggä räbke pädax ¹⁹ na mayaxsa sa ka sägä'docco sämän Yasuwa ka, "Giningang näs käxi kän beneng*, wala basa abendig käxa caka?"

²⁰ Ani apanginy kawunonäs ta Yasuwang, sängadeccä ka, "Yoxana me pac kayaxsä was tä gining ka amänzig ka, 'Giningang näs käxi kän beneng, wala basa abendig käxa caka?" ²¹ Na tä nya owdi Yasuwa kädäxä kän mange tä däxäka cakucakuny na mägäcay lititiga tasiny tä wadäkä kän na malende agä ngojony.

²² Na mabuc täsa ka, "Wesi lapi ta Yoxana tä 'dogi känoxangang na kädängengang. Ka ngojony käsayiza, mexesu kewetädäcco kiccag, na menggä omoda wadägka kalaye apoccu, na bunguny kädängze, na kängga käkse koxsasa, na menggä wiy kädäng duwaleyga warändi.

* 7:19 Menggä Yaxudiny bene Almasini säyaxsedängang.

²³ Baxändäg tä käxi base mägaxse tagä songang.”

²⁴ Ani menggä yaxsäweccä Yoxana kä'docconäsang, Yasuwa kalegese tä ngakä Yoxana tä xä'dä ka, “Oxadi kasog anggo kănoccang tä pumpung tä zaygeneng? Păx kănoxang mege zăwande nyaxic? A'a! ²⁵ Neng oxadiyang kănoc tunyu tä zaygeneng? Apangza kălagăwa na tandăna duladulaje? A'a! Za, kănggi lage tanduga duladula-jeccăng, kăcag tol cuccu tă owdu buguninginyang!

²⁶ “Oxadiyang kănoccang tunyu tä zaygeneng? Me logey? E, neng alăpedăng tanggo ka ma măs me logeyga tădăx tă menggä logey.

²⁷ Ngakongag gărekărejesăno tămang, ‘Lala, ayaxsada me yaxasawiccang tagăgi, ani 'docco weye akăsog ndă kala noc-cang.’ ²⁸ Alăpedăng tanggo ka, kănggong săgiyăngang kăxa tădăx kala Yoxanandăng song. yă kăxi biyey tă bugundugku Kalăgkang tădăx tăma.”

²⁹ Ani kăn kă'day kădăngăs ngaki Yasuwa kangatang, na măndey menggä yawgă tulubada, kagixi dăppiccă Kalăg, xa Yoxana kăpaccă sa. ³⁰ Ndă măndey Farisiny na menggä lelericcă asiriyenă Musa kăpexkă ngaki Kalăg kabokasa tăsang, xa Yoxana kăpaccă sa song.

³¹ Yasuwa ngade ka, “Oxadi andăppo na kănggă zongang, na sa sa'das wi? ³² Sa sa'das pipuga kăcasăno ta axă owdu wanyăg ndă bagedăning,

‘Was kanusig ndetelegu tanggo ndă anggo kocoxsang song, kangeyig ndă aguniccig ndă anggo kăngeydăcceng song.’

³³ “Yoxana me Pac kawung ndă kalăgăji ndă măwuxi bux song. Ndă ngadaccang ka mărămacca!

³⁴ Yă agănang Păxă Kăxa Jul

kawung asiyacca na awuxicci, ndă anggo ngadaccang ka, ‘Za, păxă me kurugurunong na wuxicci de bux paxeng măs biskonu menggä yawgă tulubada na kăngga tasiny!’ ³⁵ Zănggă ngakă lelertăg băledeswa na cofu'do'dugku logadă menggä răbke.”

Wawekă Yasuwa na Mid

³⁶ Nuxu Farisiccandăng săbangăs Saman kabandă Yasuwa ka săsiyza nang tă pane, na măgă'doc tă pang Farisic na săgă'docco sagur siyad. ³⁷ Ndă uxandăng tă nya kaxsă pani, sogo ngaka tasiny, cabăle ka Yasuwandăng tă pang Farisic, na cawung căgo midă măxăs tă belenyza sadotogey săgăluxu tă ngayicca săbangăs alpasta. ³⁸ Na căgă'doc tăwang badadagăma, cănge, ndă cădălbede uxku agăce tă exenggăma. Ndă căsenye exenggăma na apaxkăce, na măndey căgăbucci exenggăma, ndă cawawe exenggăma na midă măxăs.

³⁹ Farisicci kabandă mang kox ngaki, na ngade tă ngase ka, “Kă'dang apangzong layis me logey seleyang, kax mabăle ka uxong lăbe mang năka sogo ngaka tasinyang.”

⁴⁰ Na Yasuwa kabuc tăma ka, “Saman, ampaye alăpăng nuxu 'dog tăgi.” Na mabuc ka, “Lăpăng, me băldic.”

⁴¹ Na Yasuwa ngade ka, “Me menekă amusundăng kamene amusudi ta kăn pădax. Nuxu kamen fudada udiny mădăginy mădăg (500), măndey kăxi nuxungang kamen udiny pădax wang asiny (50). ⁴² Ani săgămelenăs wegki samen tăma songang, masaxa wegki samen tămang kă'day. Pădaxkăsa xănang tăsa kădăppa ka paye ma mo'do accanang?”

⁴³ Saman kabuc ka, “Ka'das ka kădăppa ka kăxi kamen

amusu mangeng, nyaza.” Na Yasuwa ngade täma ka, “Mänang gi seley kälegey zänggä nga.”

⁴⁴ Na mawexwa mägäsäy ce, na mängade tä Saman ka, “Gining noxo uxong? Agänang käläs panägi. Kudong magä 'dakä exenggang song, yä ce ca'day exenggang na uxku agäce ndä casenydä na apaxkä zäce.

⁴⁵ Kämpaxäng agä na modey na kägappas agä song, yä ani kaläsäs panäging cägädokala bucigä exenggang song.

⁴⁶ Kāwawey zang na mid song, yä ce cawawey exenggang na midä mäsäs.

⁴⁷ Neng aläpēdäng tägi ka ngaka tasinygäcegi mangeng kawangesäno täce ndä nyang cäpaye pacceyang. Yä käxi sasaxa täng bälaxinyang, paye bälaxiny.”

⁴⁸ Na Yasuwa ngade täce ka, “Ngaka tasinygägi kăcayining tägi.”

⁴⁹ Ndä palangaski kagur siyad namang käre tä zängga ka, “Xānanang kanang mändey caye ngaka tasinygä tä kănang?”

⁵⁰ Na Yasuwa ngade tä ux ka, “Menekä ngakägi tagä kaxony gi. Wede na modey.”

8

Wexekä Yasuwa na Posakä Uxu

¹ Täbangä ngakongang, Yasuwa kadadara kaxsä pa na madus enggä cabärta mäbäldecce na mälogo yaxsäwecca apo tä bugundugku Kaläg. Känggämagi mägälägä asiny wang pädaxang satäng nama, ² na mändey sag na kulung uxugi mägänay tä lititiga tasinyang na tä dăxăkanang. Mariyomzi säbangäs Macidaliya ani samagäng kängga tasiny paxtänding tunyu tä waneneng, ³ Xana uxu Cuza, ani kamen wexekä pang buguning Xirudusang, na Sosana na kulung kăn mange

kälarta wegkanagi layis kākä ngastängganang täsa.

Serekä Ngakä Me Zäb

⁴ Kăn kawuno ta Yasuwa kăpätäsäno tä kaxsänggä padägka cakucakuny na xä'dä kädurisäwa, na malegeyze täsa näs seredänic.

⁵ Mängade ka, “Me zäb kawetä kă'doc tä wasakä yugke ndä kulung kawosasa tä kaxsä akäsog na kăn kebtesa, na awiny kaleb kulung.

⁶ Kulung yug kawosasa tä cobocoboric, na ani kalocconäsang kamasasa xa nyigidiccandäng song.

⁷ Kulung yug kawosasa tä warä kunyu na kalocco appoyo ndä kunyu räbta. ⁸ Na mändey aki kawosasa tä zägka apoccong kalocco na ka'dongasa appoyo, na kiye kiccag zä kuc nuxung age kasog udiny mädäg (100) taxä mange.” Na mängade ka ngakong ngadeccä ka, “Käxa wunde dängecceng, däng ngakong!”

⁹ Na menggä räbkä ma kamän ma ka seredäniccong näkä wiyang. ¹⁰ Na Yasuwa ngade ka, “Anggo nyadogung akäsog tanggo ndey bäleseng bodakä bugundugku Kaläg. Yä tä kulung kăn agä alegecce täng na seredänic, ndey kax sälale na oxuswa pele winy, ndä kax sädänge na säbälede 'dogeneni song.

¹¹ “Ndä gang seredäniccong bangeneng ka, yugkag näs ngakä Kaläkgang. ¹² Yugki kawoso tä akäsogkang sag näs känggi dänge nga na zeppe tetexang, na Däniye wunodung bate nga tä mäganyga ndey ndakä men ngakä Kaläg ndä 'dox xonyad.

¹³ Yugki kawosasa tä cobocoboric-cang sag näs känggi dänge nga na bate na led, ndä mäsakanatäng song. Mene kăccogos, ndä ngaka bedeccä kawunong na zalbangada. ¹⁴ Mändey yugki

kawosasa tä warä kunyuwang, sag näs känggi dänge nga ndä kä'docco tunyang 'doxada ngakä kanyakanyanä cabär na ngakä Kalägi samenang 'dongatasa song.¹⁵ Yä yugki kawosasa tä zägi apoccu ndä loccong, sag näs känggi dänge nga na mene pädate tä mäganyganagi bowinyang na tegetese sogo yugic.

Läpäniccä Banyic

¹⁶ “Kigkandäng banye masäracane ndä xubu song na suxuludi tä boxu salany song. Basa bokasa tä zä tumu ndey känggi luso axang ox owda bow.¹⁷ 'Dogi kabodwang paredäwa tunyu na 'dogi ka'danywang wedäwa tunyu tä owda bow.¹⁸ Ndelde wunggugo appoyo. Käxa 'doge tängang säposo täng, ndä käxa oxo ka 'doge täng yä wundungang, säbate täng.”

Yasuwa na Menggä Pana

¹⁹ Enggä bonggu Yasuwanag na bosa kawuno täma, ndä kä'docco täma ngäte song xa xä'dä käsekä sa.²⁰ Na saläpe täma ka, “Enggä bonggugo na bonggo satäng tunyu paye zay gi.”²¹ Na mägämeley täsa ka, “Ngganang na enggä bonggusko sag näs känggi dänge ngakä Kalä na wexeng.”

Dokoleygä Yasuwa tä Megede

²² Xongenendäng Yasuwa kä'doc tä kaxsä dämpejig na menggä räbke na mängade täsa ka, “Nycugo agali andi tagä colonggo.” Na sägä'docco tunyu.²³ Ani säwadaccanäs na dämpejigkang Yasuwa kasändä. Na megede kasagesäng tädäxtiny täsa tä colonggo na dämpejig soro päsed na ma, ndä paye mäxasa tä ma nasa.²⁴ Na sägänoxsas ma sängadeccä täma ka, “Bazuwec, bazuwec, kogkatäng täzänggä xäs!” Na mägoxa na madux

megede, na dampajeygä ma kädokalasa na kasebesäno.

²⁵ Na mängade täsa ka, “Wi siye anggo menedeng ngakang songang?” Na nyigadäg kamen sa na sägäsaydä agäsa na samänäno ka, “Xänanang kanang? Rejede megede na ma na dänge ngake-neng!”

Matakä Ligitiga Tasiny

²⁶ Yasuwa na menggä räbke käca'dä ma na dämpejig kä'docco tä cabärä Gäresa tä xining tagä Calil.²⁷ Ani Yasuwa kebesanäs exene tä ndandangang, 'doxtiyandäng näs me nya cabäri käpasa täma kängga tasinyatäng tä wane. Ndä kaleygädä kälagä tandä song ndä uccu tä pa song basa tä warä morota.

²⁸ Na mägox Yasuwa na mapere, madeläng täzäg tagä Yasuwa na mägädawa paccey ka, “Oxadi tägog tä pidi naging Yasuwa, Päxä Kalägi Tiying! Kanyixay gi ka ndakä nycälixti agä!”²⁹ Mängade tä Yasuwa mänang xa Yasuwa kadux käxa tasti tä wanämang ka wetä tunyu tä wanäma. Ndä nycotädasa ma taxä mange, ndä kän cäkili exenggäma na asänggäma na kacägaliny ndä meske ma. Neng mä'dexe ndä käxa tasti tä wanämang koyadas ma tä owda kaculdoy.

³⁰ Yasuwa kamän ma ka, “Säbängäs gi xäng?” Na mängade ka, “Säbangäs agä Kat-iba” xa kängga tasiny mangeccä tä wanäma.³¹ Na kängga tasiny käpaydä ta Yasuwa ka ndakä yaxsas sa tä owdi sägäpätäsuno tängang.

³² Ndä buduruginyatäng mange siyacca tiyati tä päxä cobocoboric na kängga tasiny käpay Yasuwa ka mädokas sa tä wadäkä buduruginy ndey ka sä'docco nang na mägä'dakas sa täng.³³ Na kängga tasiny kawetäcco täwang apangzi kä'docco tä buduruginygi

mangeng, na kasog buduruginy kawu'daka colonggo kamāxasa tā zāg. ³⁴ Menggā megāskā buduruginy kox 'dogi kasogkuwang na koyo kawasesāning kă'docco kăduwaley tā kaxsā pa na tā enggā cabārta.

³⁵ Na kăn kawetācco paye zay 'dogi kasogkuwang, na sawuno ta Yasuwa. Sa'doxa nya apangzi kăngga tasiny kawetācco tā waneneng, ze kalay appoyo, kălagāwa na tandu na kă'doc kăcca tā warā exenggā Yasuwa na kăn kalaye nyāgadiny. ³⁶ Kănggi kox 'dogi kasogkuwang ta apangzi kăngga tasiny kawetācco tā waneneng, kalāpe tā kănggi kox songang.

³⁷ Na kala menggā Găresa kă'day na kănggi kakukury cabār kă'dayang kăpay Yasuwa ka 'doc wangasa sa xa nyigatāg kadele sa. Na Yasuwa ka'deg dămpejigse ka 'doco, ³⁸ na nya apangzi mägācay kăngga tasiny tângang kăpay ka sâ'docco nang, neng Yasuwa kayaxsas ma tā pa. ³⁹ Lăpede tăma ka, “Mele wede tā panāgo na pari ngaki Kalăg kasog tăging.” Na mägā'doc mägăduwaley tā kaxsā pa tā 'dogi Yasuwa kasog tāmang.

Yasuwa Dăxicci na Nayacca

⁴⁰ Yasuwa kămel tā Calil na xă'dă kăpaxas ma xa satāng tā benggā ma. ⁴¹ Ndă apangandăng săbangăs Yayurus năs ngondow kamen axă paliccă Yaxudiny kă'doc kudukurusa tā warā exenggā Yasuwa, kăpay ma ka sâ'docco nang tā pane, ⁴² xa penămandăng nuxung layis păxă ux jendăgke asiny wang pădax paye äxsă.

Yasuwa kamen akăsog, na xă'dă kagur ma de bungu ma. ⁴³ Ndă uxandăng tā warā xă'dă tamice colowa tā jendăgka asiny wang pădax ndă kăxa dăxandăng

song. ⁴⁴ Cawung tā ongu Yasuwa ndă căpără munu tandănăma, na tetex waxăd kădokalasa.

⁴⁵ Na Yasuwa kamânze ka, “Xănang kăpără agăng?” Na kăn kă'day kagil, na Putros kabuc ta Yasuwa ka, “Bazuwec, xă'dănong kă'day kagur gi ndă bungu gi!” ⁴⁶ Neng Yasuwa ngade ka, “Agă kabăle ka kigkandăng kăpără agă xa panggudug kawetăcce tā wanang.”

⁴⁷ Na ce uxi cabăle ka că'danyewa song na caparângwa tunyu na cawung cădătăgă cadelăng ta agăma. Na calăpe 'dogi kasog căgăpără Yasuwang na dăxki tetex kasoguno tăceng tagă xă'dăni kă'day. ⁴⁸ Na Yasuwa ngade tăce ka, “Penang, menekă ngakăgi tagă kănay gi. Wede na modey.”

⁴⁹ Ani musku mălegeccenăsang, nuxu kigkandăng kăpătăng pang Yayurus kawung ngade ta Yayurus ka, “Păxă penăgi kăxsă, wanga dereygă me băldic winy.” ⁵⁰ Yasuwa kădăng ngaki na malăpe ta Yayurus ka, “Wanga kărekă nga, yă mene ngakang winy, xa coxsada.”

⁵¹ Ani Yasuwa kăcogus pang Yayurusang, mawang kăn kalăs ax nama song basa Putros, Yoxana, Yaxup, Yayurus na uxe.

⁵² Na'anggăsagi tā pang ngeyigkang săngeccă na săgunuccu tā ngakă ce, neng Yasuwa kawung ngade tăsa ka, “Wanga ngeyig xa căgăxsă song casăndă winy.” ⁵³ Na sagug ma, xa săyex beyin ka căgăxsă.

⁵⁴ Na Yasuwa kamen andăce na ngade tăce ka, “Păxă ux, ngăsa tiyati.” ⁵⁵ Na ronguccăce kămel, na tetex cangăsa. Na malăpe tăsa ka sădoga nuxu 'dog tăce căsi. ⁵⁶ Menggăsa kădongo tā ngaki mănang. Na mägă'dedeyza ka ndakă sălăpe 'dogi kasogkuwang tā nuxu kig.

9

*Yaxsakä Känggi Yasuwa
Kälīgä Asiny Wang Pädaxang*

¹ Yasuwa kuduri känggi mägälīgä asiny wang pädaxang, na madoga panggudug täng kă'dayga na butug ndey layenäs kängga makadas kängga tasiny tunyu na dăxi kăn ² na mayaxsa sa ndey ka săduwaley bugundugku Kalăg na sădăxă känggi tăxăccăng. ³ Mălăpede tăsa ka, "Ndakă seley bagang nuxu 'dog nanggo tă wedăg song, kala keced na 'dogu pokakă tandu, na siyad na ariyaliny, na ndakă bagang tandu nanggo. ⁴ Ndă pani kălăsangang, nycicci täng basa xongondi wangetăsănanang kaxsă pa tăngang. ⁵ Kaxsă pana kănocang täng kăngge kabokasa anggo songang, ndă mpadang wangesănanang kaxsă pang, 'diskisining kărăptănicci ta exenggăgong ndey layis ngakă ngastănggăsa ka kănocang ndă sagixi yaxsuwiccă Kalăg song." ⁶ Na samen sog săgă'docco sadus kaxsă pa săduwale yaxsăwecci apo lege ngakă Kalăgkang na sădăxă kăn tă ota băgălic.

*Xirudus Kăbabangwa tă
Ngakă Yasuwa*

⁷ Buguning Xirudus kădăng ngaki kă'day kasogăningang tă wexekă Yasuwang, na zăma kaxsăwa paccey xa kulung kăn ngadeccă ka kăxong kanang ndakă layis Yoxana me Pac kangăsa tă xăs, ⁸ ndă kulung kăn ngadeccă ka acaka layis me logey Iliya nyaza kaparaswa tăsa. Ndă musku kulung kăn lege ka mănang nuxu me logeyga waneng kangăsa. ⁹ Xirudus ngade ka, "Kaluwi ză Yoxana tă pox yă măndey xănanang kalugsi sălege ngakeneng?" Na Xirudus kasăkesawa paye ox Yasuwa.

*Yasuwa Kăsiy Kăn Păsăciny
Mădăg (5,000)*

¹⁰ Kănggi Yasuwa kălăgăng kămele, na salăpe ngaki kă'day sawexang ta Yasuwa. Na mabag sa săgă'docco sapălesăning săpaxadas bo pana săbangăs Petsayida. ¹¹ Neng xă'dă kapungung owduma na kărăbkădă ma. Na mabokasa sa ndă mălegey sa na ngakă butugku Kalăg na măgădăxă kănggi paye dăxang.

¹² Xong paye 'dăng, na kănggi măgălăgă asiny wang pädaxang kawuno ngadeccă tăma ka, " 'Daki xă'dănong, ndey 'docco tăwang kaxsă pa ndey 'dox owdu săng na siyad, xa kogkatăng tă owda kaculdoy." ¹³ Neng Yasuwa kămeley tăsa ka, "Anggo dogi siyad tăsa." Na sabuc tăma ka, "Siyatatăng layis kăka kătăx song basa raxifiny mădăg na as pădax tol. Basa anoccig anganyig siyad tă kănggong kă'dayakang." ¹⁴ Sangad ngakong xa apanginyatăng păsăciny mădăg (5,000) tă wară xă'dă. Na Yasuwa lăpede tă mēggă răbke ka, "Wanga sa săccasăno tă ud tăxă udiny pădax wang asiny (50)." ¹⁵ Na sasog kala ngaki malăpasang. Na kăn kă'day kăcasăng tăzăg.

¹⁶ Na mabag raxifinygi mădăgkang na aski pädaxang na măgăsa tiyati na malog Kalăg ndă mălără siyad mădoga ta mēggă răbkăma ka sălarta tă xă'dă. ¹⁷ Kă'daygăsa sasiza samasa, na ani kalayang sanyaptă landa asiny wang pădax.

Bucuku Putros ta Yasuwa

¹⁸ Xongenendăng Yasuwa kangăsa kă'doc palacca watăgke, ndă mēggă răbkămatăng nama na mamăn sa ka, "Kăn ngadeccă ka agă anăs xăng?" ¹⁹ Na sa sabuc tăma ka, "Năs Yoxana me Pac, kulung kăn ngadeccă ka me logey Iliya, na musku

kulung kän ngadeccä ka nuxus menggä logeygi wane käxseng nuxungang kangäsa.”²⁰ Na mängade täsa ka, “Yä anggo ngadaccang ka agä anäs xäng?” Na Putros kabuc ka, “Almasini Kaläg kayaxsängang.”²¹ Na madästä sa seley ka ndakä säläpe tä nuxu kig song, ²² mängade ka, “Agä, Pächä Käxa Jul anycäläxtiwa tä nga mange, ndä ngondowiny na bazuwinygä tämed tä Kaläg na menggä lelericcä asiriyenä Musa pexke agä, na säpaxe agä ndä tä sängga kodos angäsata tä xäs.”

Ndey ka Layis Seley Me Räbkä Yasuwa

²³ Yasuwa ngade tä kän kä'day ka, “Käxi paye ndey layis me räbkangang basa 'diya ngakä ngase ndä poko kalic todotol na räbkädä bangang. ²⁴ Xa käxi paye ka xony rongicce täzäg tä ngakä ngaseneng, mesede yä käxi paye mese rongicce täzäg tä ngakan-gang 'doxo aygä lili. ²⁵ Oxadi kig 'doxo tä bangä tangandäg tä walangic kä'day yä edekeny mese rongicceneng? ²⁶ Käxa ze maye tä agä na tä legeygangang, Agä, Pächä Käxa Jul alayis käxa ze maye täng tä xongondi awunodung täng tä xongondu dädxaticcang na tä dädxaticcä Appa na malayikadagi tedelinyang. ²⁷ Ndä gang seley aläpedäng tanggo ka, kulung känatäng tä warägo äxseccä song basa ox bugundugku Kaläg.”

Pasakä Yasuwa ta Menggä Logey Musa na Iliya

²⁸ Yasuwa käbäldeyze ndä mäsang tespedespe, na mabag Putros na Yoxana na Yaxup sägä'docco tä zä cabär tä paley. ²⁹ Yasuwa palacca na toccäma kalay caka na tanduguma wux-eccä, ndä dulatulajeccä bowiny. ³⁰ Na apangas pädax kaweyesäno kadeb legey nama, apangaskenegi menggä logeyag, Musang na Iliya.

³¹ Sägaleza na tädxatic dulatulaje na salegeyze na Yasuwa tä ngakä melgäma tiyati ka mä'doc tä Ursalim ndey ngaki Kaläg kangatang 'desesäning täng.

³² Ndä Putros na känggi nang-gang kasändäcco, na sägoxsasa na agäsa käyer na sägox tädxaticcäma na apanginy pädax dokoloccu nama. ³³ Na apanginygi pädaxang kamen sog, na Putros ngade ta Yasuwa ka, “Bazuwec, wunakog todong apoccu. Nycugo abola telegudi kodos, nuxu tägi, nuxu ta me logey Musa na nuxu ta me logey Iliya.” Xa mabäle 'dogi mälegeng song.

³⁴ Ani mälegeyis ngakon-gang timinggaric kawung kaxub sa, na salaye sänyigadiny. ³⁵ Na sägädäng ngasäwan tä kaxsä timinggaric ka, “Pächä penanggong nyang kadere-sang, ndänge ngake!” ³⁶ Ani ngasäwan kalegezenäsang, Yasuwa ka'doxuwa watäke. Na sägämolosäning saläja 'dogi sägoxang tä nuxu kig song basa xongonda caka.

Caygä Ligida Tas tä Pächä Pipi

³⁷ Edekenydeneni sacoccoleza na zä cabär na xä'dä käpasasa täma. ³⁸ Na nuxu apangandäng tä warä xä'dä kabandäsa ka, “Me bälidic, kanyäxay gi ka xony penang xa nyang nuxu tagä tolang! ³⁹ Ligida tas teldedes ma na sogo ma mädawé ndä nyäpapaxe ma na sogo guxudunic päkädäng ikäma ndä wange ma mänungu song, cäläxti ma nano. ⁴⁰ Ndä kampay tä menggä räbkägi ka cay ligida tas tä wanäma ndä kadege sa.”

⁴¹ Na Yasuwa kabuc ka, “Anggo menggä zong menekä ngakägo bedeccä ndä näsang menggä sogo ngaka tasiny! Alayde nanggo ka'das wi dexä ampanye

ngakägong? Koying päxä penägi todong.”

⁴² Sagoying päxä pipi ngäte ta Yasuwa na ligida tas kacodasa pipi täzäg pappaxe. Na Yasuwa kadux ligida tas, na kala Yasuwa kânay päxä pipi na kämeles ta mena.

⁴³ Na todi kân kädongo tä pang-gudugku Kalägi mänangang.

Yasuwa Kanimäng Xäske

Na todi xä'dä kä'day kälädäning tä 'dogi Yasuwa wex-eng, na Yasuwa ngade tä menggä räbke ka, ⁴⁴ “Mene legeygong tä mäganýgägo, xa agä Päxä Käxa Jul sä'doc sämenedes agä ta asänggä menggä kurang.” ⁴⁵ Ndä sa sabäle legeygi malegeyag song, xa bange ka'danywa täsa ndey ka ndakä säbäle. Ndä sänyigate mänekä ma tä legeygi mägälajängang.

Xänang Ngake Tädäxiny Tang-gong?

⁴⁶ Na kala matakä nga kadebäning tä warä menggä räbkä Yasuwa ka xänang täsa ngake tädäxiny mo'do acängganang. ⁴⁷ Neng Yasuwa kabäle ngaki sabokasa tä mäganýgäsa, na mabag päxä pipi mägätokalasa tä wanäma. ⁴⁸ Na malegeyze täsa ka, “Käxi paye päxä päxkunong na agangang, paye agä. Ndä käxi paye agäng, paye Kalägi kayaxsä agäng. Xa käxi biyey tä warägo kä'daygägong, nyang ngake tädäxiny mo'do acängganang.”

Käxa Layis Me Kurugi Songang, Biskonuging

⁴⁹ Yoxana kabuc ta Yasuwa ka, “Bazuwec, ka'doxig nuxu kigkandäng caye kangga tasiny tä wadäkä kân na agägi, ndä wa kampayedig ka andokoleyig ma xa mäś me räb na was song.” ⁵⁰ Neng Yasuwa ngade täma ka, “Wanga dokoleygä ma,

xa käxi näs me kurog säxongang biskonogkang.”

Menggä Samriya Käpexkä Yasuwa

⁵¹ Sänggä Yasuwa kalaye bälaxiny ndey ka Kaläg bag ma tiyati, na mägädiri Ursalim. ⁵² Na todi Yasuwa kayaxsa menggä yaxsäwec kapäccasa tagäma, na sägäcogä ow, na saläs kaxsä pang menggä Samriya ndey säbolasa ow täma. ⁵³ Neng menggä kaxsä pa kabäle ka Yasuwa 'do tä Ursalim, na sägäsekä ma.

⁵⁴ Ani Yaxup na Yoxana menggä räbkä Yasuwa koxäs mänangang, sängadeccä ka, “Bazuwec, mpaye was abandig masä Kaläg täzä koxa ndey tuny nycokong kä'day?” ⁵⁵ Neng Yasuwa kawexeswa täsa na kadux sa, ⁵⁶ na sawetädese tä kaxsä pana caka.

'Dogi Bede tä Räbkä Yasuwang

⁵⁷ Tä zänggä wedäkäsa ta akäsog, nuxu accäsa kangad täma ka, “Agä a'dorto banggi todi noco tängang.” ⁵⁸ Na Yasuwa ngade täma ka, “Atorn-doru axinygä kudufuganatäng na awiny axinyganatäng, yä agänang Päxä Käxa Jul panangandäng song.”

⁵⁹ Mändey Yasuwa ngade tä nuxu accäsa ka, “'Dorkäda agä.” Neng kämeley täma ka, “Bazuwec, wanga agä accig anoc abosu appanang.” ⁶⁰ Neng Yasuwa ngade täma ka, “Wanga kanggi käxseng bosu kangganagi käxseng, yä gi wede duwala bugundugku Kaläg.”

⁶¹ Na nuxu accäsa kasan ngade ka, “Agänang a'dorto gi, Bazuwec, neng bende agä accigäne anoc angada tä menggä panang.” ⁶² Na Yasuwa ngade täma ka, “Käxa seley danada ande tä sicci ndä gawada ze tongang kädäppa bugundugku Kaläg song.”

10

*Yasuwa Kayaxsa Menggä
Räbke Tunyu tä Wexed*

*Udiny Kodos, wang Asiny Wang
Pädax (72)*

¹ Yasuwa kayaxsa menggä räbke udiny kodos wang asiny wang pädax (72) ka päccasa pädapädax tagäma tä bonggu padäg na tä otagi kä'day ma Yasuwa mäpaye mä'doc tängang. ² Mängade täsa ka, "Jeded mangeccä yä wadi menggä wexed bälaxiny. Neng gang mäne Bazuweccä jeded ndey yaxsang menggä wexed tä jeded.

³ "Wesi! Ayaxsadas anggo tunyu ka'das sagunuga luluduwin yäraka tä pidi. ⁴ Ndakä bagang ariyaliny mange, na mändey meldänä wedäg, na 'dataginy axinyga pädax, na ndakä galedetäsänang tä kän ta akäsog song.

⁵ "Känoxang käläsang pang, päcci ngada ka, 'Wanga modeygä Kaläg laye tä panong!' ⁶ Ndä käxa mägaxse paye modey tä owdiyang, modey layeccä täng, yä wundungang modeygägo layeccä täsa song. ⁷ Nycicci tä nya pani ziya na wuxi siyaki sadogung tanggong, xa me wexed kädäppa ka sädoga dericce. Wanga 'däla'dälangey tä padäg winy.

⁸ "Känoxang käläsang bo pang, ndä kän kabokasa anggong, ziya 'dogi säguxis anggo nangang. ⁹ Ndäxi kanggi täxäccä tä cabärang na läpi täsa ka, 'Bugundugku Kalägkatäng nanggo!'

¹⁰ "Yä käläsang bo pa ndä kangge kabokasa anggo songang, wesi tä akänggä sota na ngada ka, ¹¹ 'Käräptänicci bo panägonong ta exenggäskong a'diskidinig tanggo ndey layis ngakä ngastänggägo ndä bäli

ngakong ka, Bugundugku Kaläg kala kawuno ngäte.' ¹² Ndä ndänge, xa tä sanydä ow, ngakong layeccä tasiny täsa mo'do aki kasoguning tä Sudumang!*

¹³ "Woyoy tä menggä pang Korusin! Woyoy tä menggä pang Petsayida! Xa kä'dang weränicci kasoguning tanggo sogkuwa tä Taya na Sayidunang kax sägämele mäganygäsa tä ngaka tasiny wane, säccatetäsäng tä atilisiny, säbugu zänggäsa na uskuc na saxse mäganygäsa. ¹⁴ Neng xongondi xukumzä Kaläg wunodung tängang, nga layeccä bedeccä tanggo paccey 'diti aki tä Taya na Sayidunang! ¹⁵ Ndä anggo menggä Kafärnaxum, anggo noxadang ka edekeny Kaläg dädäxti anggo tiyati? A'a! Wadi kala sägawadas anggo tä mas!

¹⁶ "Käxa kädäng ngakägong kädäng ngakang, yä käxa käpexkä anggong käpexkä agä ndä käxa käpexkä agäng käpexkä Kalägi kayaxsä agäng."

*Menggä Räbkä Yasuwagi
Udiny Kodos Wang Asiny Wang
Pädaxang Kämele (72)*

¹⁷ Kala menggä räbki udiny kodos wang asiny wang pädaxang (72) kämele na led, ngadeccä ta Yasuwa ka, "Bazuwec, mändey kangga tasiny kädängäng nga täwas na agägi!" ¹⁸ Na kala Yasuwa ngade täsa ka, "Agä kanox Däniye käpätäng zä koxa kadeläng kala mälämälajegä koxa. ¹⁹ Ndänge, agä kadong panggudug tanggo ndey deretere-jeyseng zänggä dolu na dänu na mändey ndey mo'dasang me kurugo Däniye, ndä 'doga siye anggondäng song. ²⁰ Yä musku, wanga led ka lig-itiga tasiny kädängäng nga tanggo, wadi ledäning xa agägo

* **10:12** Kaläg kaduny menggä Sudum na Amora na mas xa kafulo sogo ngaka tasiny.

gärekärejesäning tiyati tä pang Kaläg.”

²¹ Na tänya axä owdi Yasuwa käligäwa na Ligidä Kaläg na mägäledäwa mängade ka, “Agä andädäxti gi Appanang, Bazuweccä tiyati na täzäg, xa gi kä'dany ngakong tä menggä lelertäg na känggi yeräninyang, yä käparäng tunyu ta enggä pipu. E, Appa, xa wanägi tidi täng.” ²² Appananggi tiyating nyang kadong ngakong tagä kä'dayang. Appanangang tol seley yex agäng, Ndä agänangang tol seley ayex Appangang, na mändey känggi agä käpay ka aparas Appanang tängang kəcag tol bäledes mang.”

²³ Na kala Yasuwa kawexeswa ta menggä räbke kabodsa nang na ngade ka, “Baxändäg tä agawanggi lale 'dogi anggo zayadangang! ²⁴ Ndä agä aläpedäng tanggo ka menggä logeygä Kaläg mange na buguninginy käpay ka laley wegkong laladangang ndä kox song, sapaye ka sädäng ngakong ndängedengang ndä sägädäng song.”

Serekä Ngakä Apangza Apo tä Samriya

²⁵ Xongenendäng, me lelericcä asiriyenä Musa kangäsa paye ka läbä Yasuwa, na ngade täma ka, “Me bälidic, oxadi kädäppa ka asog ndey a'dox aygä liliyang?” ²⁶ Na Yasuwa ngade täma ka, “Oxadi gärekärejesawa tä asiriyenä Musang? Anggo käbäleng wi tängang?” ²⁷ Na me lelericcä asiriyenä Musa kabuc ka, “Asiriye ngade ka, ‘Paya Bazuwec Kalägägi na mägaxsägi nuxung, na rongiccägi kä'day, na kutegtäggägi kä'day, na ngakä zägi kä'day’, na ‘paya menggä sogalinygägi kä'day ka'das paygi mpayis ngasäging.’” ²⁸ Na Yasuwa ngade täma me lelericcä asiriyenä

Musa ka, “Gi kubuc ngakong appoyo, sogä mänang ndey nay.”

²⁹ Ndä me lelericcä asiriyenä Musa paye bokung ngase tuny, na ngade tä Yasuwa ka, “Xänang näs me sogaldangang?”

³⁰ Na Yasuwa kabuc täma näs legedänic ka, “Apangandäng kacoccoleza tä Ursalim 'docco tä owda säbangäs Arixä, na kadel ta asänggä menggä bärada na kamen ma kawid ma, käbadä ma ndä wangasa ma tä enggä xäska bälaxiny.

³¹ “Na todi me tämed tä Kaläg käläxäng kacoccoleza na nya akäsogi ma'doxung apangzi menggä bärada käbadäng sängo täzäg na mapopporeza mägäläng cengic. ³² Na mändey me Lawi me posakä me tämed kawung käläxäng na kox apangzi sängo täzäg na kapopporeza käläng cengic. ³³ Yä me Samriyani näs me pungutang wede kawung tänya owdu 'doxti sägäbadäng na mägox nya 'doxti sängo na agäma kawasa täng.

³⁴ “Na mägä'doc täng masenyndä penduge ndä mädogä mid täng ndä mäbodey ndä mäpoka tä kaccänäma. Magoya taxä aloc ndä mädäxä. ³⁵ Na edekenydeneni mabag ariyaliny pädax madoga ta me aloc, mängade täng ka, ‘Meskäde 'doxtong appoyo ndä wegki noco wanyäs tämang awunodung ameledäng tägi kä'day.’

³⁶ “Tä känggong kodosakang, xänang kädäppa ka näs me sogal tä 'doxti menggä bärada käbadäng?” ³⁷ Na me lelericcä asiriyenä Musa ngade ka, “Käxi age kawasa tämang.” Na Yasuwa ngade täma ka, “Neng wede sogä ka'das ma mänang.”

Mariyom na Marsa

³⁸ Yasuwa na menggä räbke wedetese na kala sägä'docco saläsa nuxu kaxsä pa na

uxandäng säbangäs Marsa kuxis ma xa mäś palangasic. ³⁹ Ndä ce Marsa päxä bosandäng säbangäs Mariyom kăcca todä exenggä Bazuwec Yasuwa delde wunde tä bāldiccāma. ⁴⁰ Yä Marsandäng dalewa tä wexed xa cāpaye cāwex wexed kă'day na cawung ta Yasuwa cāngade ka, “Bazuwec, gining seley mpaye ngakang xa'de? Păxăsko kawangäng wexed tagä kă'day. Lapi tăce ka cāpos agä.”

⁴¹ Na Bazuwec Yasuwa kabuc tăce ka, “Marsa, Marsa, gining gäre nga ndä kăwoldoxu na'do tä ngakä weg mange. ⁴² Wadi 'dogkandäng nuxu payewa. Mariyom kadere ngaki apoccu pacceyang, 'doga bate tăcendäng song.”

11

Palic

¹ Xongonendäng Yasuwandäng palacca tä owandäng. Măgădokala paley na nuxu me răbkăma ngade tăma ka, “Bazuwec, bāde was na paley, kala ani Yoxana kăbāldeyis menggä răbkeneng.”

² Na Yasuwa läpede tä menggä răbke ka, “Kănoxang mpadang palezangang, paleyzi ngada ka, Kalăg, Appani tiyating wanga agăgi laye tădăxiny

wanga bugundugkăgi wuno tăwas.

³ Togung zăx tăwas todotol,

⁴ na saxăng ngaka tasinygusko tăwas,

xa was wasaxedig nga tä kănggi sogo ngaka tasiny tăwasang.

Ndakă wang ngakă lăngădăsko kawas was tä sogkă ngaka tasiny.”

⁵ Na Yasuwa läpede tăsa ka, “Kădăppa ka nuxu accăgo biskonenendäng, ndey 'doc tâng tä pălic lăpe tâng ka, 'Bisko, bege agă pugandagă zăx kodos,

⁶ xa biskonang kăpătäng wedăg kawung tä panang, ndä 'doga tä andangandäng song.’ ⁷ Ndä biskonăma meley tăma ka, ‘Wanga daw tagă. Xa kala kădărănggălisnig na penggang tax kasăndăccig. Păx angăsata tiyati adogodung nuxu 'dog tăgi song.’ ⁸ Agă alăpedäng tanggo ka, kax apang uccu tax na ngăsata togada nuxu 'dog ta biskone xa ka biskoneneng song. Neng apang ngăsata togada 'dogi biskone payeng xa biskone ze kama tä mănēke song.

⁹ “Alăpedäng tanggo ka, mănē owdu 'dog ndey sădogung tanggo, nyamgăda 'dogi mpadangang ndey 'doxang, dotora sogal ndey sălenge tanggo. ¹⁰ Kăxi mănēcceng 'doxo 'dogi payeng ndä kăxi nyamaccang kaledäng, na kăxi totoro sogalang sălengede tâng. ¹¹ Xănang tä warăgo năs appa pene kanyixay axsic tâng ndä doga dol tângang, yă sax togakă axsic tângang? ¹² Na cong pene kanyixay găldic tâng, ndä toga dăn tângang? ¹³ Anggogi ndasinyangang yexeng togakă wegka apoccu ta penggăgo, neng seley Kalăg, Appani Tiyating togada Ligide tä kănggi mănē mang!”

Yasuwa na Pelizipul

¹⁴ Yasuwa kăcay kăxa tasta kădogosojeý apang. Ani kăxa tas kawetăsang, apangzi kalayis togojosang kalegese, na xă'dă kădongo. ¹⁵ Na kulung acănggăsa ngadeccă ka, “Yasuwa caye kăngga tasiny na panggugu Pelizipul buguningză kăngga tasiny.” ¹⁶ Kulung kăn paye lăbă ma na ngadeccă ka măsog bolic pătäng tiyati.

¹⁷ Yă Yasuwa kabăle ngaki tă măganygăsang na măngade tăsa ka, “Bugundugka kălartănong wanyetăsăno, ndă caxsăwanda

kälarawang, telgedäng. ¹⁸ “Yä gang butugku Däniye kälaränong, bugundugke dokoloccu key? Agä kamän anggo xa anggo gasedänang ka agä anycaye kängga tasiny na panggugu Pelizipul. ¹⁹ Ndä gang agä anycaye kängga tasiny na panggugu Pelizipulang, anggo menggä räbkägo caye na panggugu wi? Neng mänangang, sa säparedäng anggo tunyu ka nyceluwinyang. ²⁰ Yä gang agänang anycaye kängga tasiny na andä Kaläggang, mänangang bugundugku Kaläg kácogu anggo.

²¹ “Apangza pädäg kayiwa na wegkä pogutang meske pane, na ka'däka'dinä pane kä'day. ²² Yä apangza pädäg paccey kasakas ma ndä kamo'das mang, soro bupsu pogudumani mäpäse andäma nangang na bate wegkäma lare.

²³ “Käxa nagä songang me kuranang ndä käxa poso agä tä wexed songang mace tagä.”

Melgä Ligida Tas

²⁴ Yasuwa legecce ngade ka, “Ligida tas kawetä tunyu täwang kigkang, tusu otaga ma wundung täng nyame owda nundu täng neng 'doxo song. Na ngade tängase ka, 'Neng mänangang amelede tä boxu pananggi kawangasang.’ ²⁵ Na nyämele nyä'doxada boxu pa worowa kälexejeg na weg repetäsäning. ²⁶ Ndä nyäwede mändey nyä'do nyägodung kulung ligitiga tasinyga paxtinding mo'do nya, ndey sä'doc säläs säcuccu täng, ndey säsong 'doxti cuke laye tasiny mo'dä cukenegi täzäläggang.”

²⁷ Ani Yasuwa kalegeyäs ngakongang, uxandäng tä warä xä'dä kädawa ta Yasuwa ka, “Baxändäg tä uxi kiyang ging na ki'digi kä'dey ging!” ²⁸ Yä Yasuwa kämele täce ka, “Wadi baxändäg

tä känggi dänge ngakä Kaläg na wexeng!”

Boliccä me Logey Yunan

²⁹ Xä'dä kaposwa, na Yasuwa kadeb legey ngade ka, “Zong sogo ngaka tasiny paccey, zong paye agä ka asog bolicca sogo gowa täng, ndä boliccandäng dogadaswa täng song basa boliccä me logey Yunan. ³⁰ 'Dase ani Yunan kawunäs kalayis bolic tä menggä Niniwa, agä Pächä Käxa Jul mändey alayis bolic tä zong. ³¹ Buguningzä uxandäng näs näkä anda täzäg ngäsata na känggä zong tä xongondu xukum. Na cäsogo asiriye siye sa xa cägäpätäng tä 'denga ndey cädäng lelericcä Seleman. Ndä kigkanang todong ngake tädäxiny mo'do Seleman! ³² Menggä Niniwa ngäsotäsäng na menggä zong tä xongondu xukum. Na säsong asiriye siye menggä zong, xa ani Yunan käbäldeyis menggä Niniwang, sägäxaje tä ngakäsagi säsong tasinyang. Ndä kigkanang todong ngake tädäxiny mo'do Yunan!

Owda Bow na Owda Jul

³³ “Käxa banye lampane ndä 'danye na gumudi 'dog tängandäng song, basa bokasa täzä tumu ndey känggi läsong towang zayza nang. ³⁴ Awunuging näs banyiccä wanäging. Känox awunugi apong, wanägi bägälic päse nyipäxkic, yä awunugi tasang, wanägi bägälic lätäng. ³⁵ Neng gangang bäli, nyipäxkiccägi ndakä layis lätäng song. ³⁶ Ndä gang känox wanägi bägälic päse nyipäxkic ndä nuxu cengiccenendäng tä lätä songang, wanägi bägälic päse nyipäxkic kala pappareygä lampa.”

Yasuwa Kadux Farisiny na Menggä Lelericcä Asiriyenä Musa

³⁷ Yasuwa kä'dese legeyge na nuxu Farisiccandäng kabandä ma ka sä'docco sägur siyad tä pane. Na Yasuwa kä'doc kaläs tow na sägäccasäng sagur siyad. ³⁸ Ani Farisic koxus Yasuwa paye siyza yä ka'dayis asängge täbangä tanyara songang, kädonga. ³⁹ Na Bazuwec kalegese täma ka, "Neng gang anggo Farisiny 'dayadang ondugu satugugo yä kaxsängga kaganye. Yä anggog mänang. Mäganygägo päse kuruguru na tastäg. ⁴⁰ Ama anggo abadini, anggo 'diyang ka Kalägang teye wanä 'dog na kaxseneng? ⁴¹ Wadi dogi weg tä känggi widäningang na mäganygo nuxung, ndey ngakä mäganygägo na wexekägo laye kälexejeg tagä Kaläg.

⁴² "Woyoy tanggo Farisiny! Anggo dogadang asiny tä udiny mädäg tä kenyu na enggä ewegä log tä Kaläg, yä musku anggo bigiding däppic na payiccä Kaläg! Wadi kädäppa ka anggo dogang wekgong tä Kaläg yä wangang bigigä däppic na payiccä Kaläg. ⁴³ Woyoy tanggo Farisiny! Xa mpadang cad tä otagä dädäxti tä axä paliccä Yaxudiny na mpadang ma'ditegä modey tä otagä nganyatada! ⁴⁴ Woyoy tanggo! Xa kä'dasang morotaga kasabe, kän wedeccä ta zängga ndä yex song!"

⁴⁵ Na nuxung me lelericcä asiriyenä Musa kabuc täma ka, "Me bälidic, legeyis ngakongang langatag täwas mändey." ⁴⁶ Neng Yasuwa kämeley ka, "Woyoy ama menggä lelericcä asiriyenä Musa mändey! Anggo ndarandadang kän na ngakä asiriye ndä siyada tä wadäka, yä musku taxä nuxuza anggo dogadang asänggägo täng tä posad song! ⁴⁷ Woyoy tanggo xa anggo donyadang morotagä menggä logeygi wawanagkägo kapaxang.

⁴⁸ Ka'das ka anggo gixing na kábäleng wexekä wawanagkägo, xa sapaxtä menggä logey ndä anggo kädonydang morotaga! ⁴⁹ Nenyang Kalägi yex nga kä'dayang ngade ka, 'Agä ayaxsada menggä logey na känggi sägäligäng täsa, ndä kulung acängga säpaxe na sämaceccä täng säpexke.' ⁵⁰ Ndä zong layis näka asiriye siye tä tamiccä menggä logeygi kacolasäwa cawu tebiccä ow, ⁵¹ cawu tamiccä Xapil na tä tamiccä Zakariya, ani sapax tä kaxsä kaldä axä tämetang. E, agä aläpedäng ka layeccänäs ngakä ngastänggä zong. ⁵² Woyoy tänggo menggä lelericcä asiriyenä Musa! Anggo kädäringgiling sogaldä yexkä nga! Anggo käläsang na ngastänggägo song, ndä käzekeng känggi paye läsang."

⁵³ Ani Yasuwa käpayis ka wetä tä pang Farisiccang, menggä lelericcä asiriyenä Musa na Farisiny kadeb maccad tasiny täma, na samän ma seley na mäned tä nga mange, ⁵⁴ ndey sänyamgädäs rakawza sämen ma täng tä ngaka mälege.

12

Nyigata Kaläg, Wanga Nyigatägkä Kän

¹ Ani xä'dä kädurisäno kasog päsäciny dexä bungudäningang, Yasuwa kadeb legey täzälägäne ta menggä räbke ka, "Meskädäning tä 'daziccä Farisinygi näs fonofoneyang. ² Doga ka'danywang, 'doxowa ndä 'doga kabotwa näs raj paredängwa tunyu. ³ Ndä gang ngaki bägälic kangadäning ongutang dängewa säxe, na ngaki kábodang taxä ndongang duwaledäning tä owda lenge.

⁴ "Aläpedäng tanggo biskodang ka wanga nyigatägkä känggi paxe wanäwanang, xa mändey

'doga sogo täbängenendäng song.
⁵ Wadi aläpedäng tanggo ka käxi kädäppas ka nyigatangang, nyigata Kaläg xa nyang tol panggudug täng gawadas anggo tä mas tä xongondü xäskägong. E, aläpedäng tanggo ka, nyigata Kaläg!
⁶ Päch atodu mädäg sänganyada na mälininy pädax song? Yä musku nuxung atoduwiccandäng ka'diyaswa tagä Kaläg song.
⁷ Ndä näs tire apaxki täzäging Kaläg kägänasa. Wanga nyigatäg, xa anggo ngakägo be-deccä mo'do atoduga mange.

⁸ "Aläpedäng tanggo ka, käxa 'dade awage na agä tagä kän ka räbo agäng, agä, Pächä Käxa Jul mändey a'dade awagang nang tagä malaykadagä Kaläg.
⁹ Yä käxa käli agä tagä känang agä mändey agäli tagä malaykadagä Kaläg.
¹⁰ Ndä käxa lege ngakä maccad tä ngakang, agä Pächä Käxa Julang, nyäwangada nga täng yä käxi degeje Ligidä Kaläkgang nyäwangada nga täng song.
¹¹ Yä sagoying anggo tagä axä paliccä Yaxudiny na bugununginy na ngotorpodang, ndakä gäredeng ngaka mäxising nang na tä 'doga legedeng,
¹² xa Ligidä Kaläg lapedäng 'doga legedeng tänya owdi."

Serekä Ngakä Apangza Kadan-gandey ndä Ka'darandey

¹³ Nuxu kigkandäng tä warä xä'dä ngade ta Yasuwa ka, "Me bäldic, lapi ta pächä bisko ka walarig malenä appanang."
¹⁴ Neng Yasuwa ngade täma ka, "Amo, xänang kamenäs agä buguningang de azaye ngakägong?"
¹⁵ Na mängade täsa ka, "Lengi agägo na meskäde ngastänggägo tä 'dara, xa rongicca 'doxowa tä dangandäkgandäng song."

¹⁶ Na maser nga täsa ka, "'Dox-tiyandäng näs tanganic pelowge kiying pächä kuny,
¹⁷ na mängade

ka, 'Asogowa key, ndey a'dox curuna ngotey adoga kunykanng tangang?"
¹⁸ Na kala mängade ka, 'Basa asog 'dogong, apaxatasa curugang yä adonyo käka ngoniny, ndey acolda kuny täng na ka'däka'di bägälic.
¹⁹ Ndä angad tängasang ka, "Gi ka'däka'dinägi mange käyoka mange layis näkä jende, buduldi, sisi, wuxsi, na ledewa!"

²⁰ "Na kala Kaläg ngade täma ka, 'Ama abad! Ondunong analedäng rongiccägi tägi tunyu, yä xänang lugu ka'däka'dini käwex tängasäging?"
²¹ Käxa xikitäsa weg tä ngase mänangang, wadi tangandägkenetäng tagä Kaläg song."

Kaläg Paye Ngakog

²² Yasuwa ngade tä menggä räbke ka, "Aläpedäng tanggo ka wanga kärekä ngakä aygägo, na wegka ziyadang na tä wadäkägo tä tanduga lagadang.
²³ Xa ay mo'do siyad, ndä wanäwan mo'do lag.

²⁴ "Lala atämidinggaru wacca song ndä zäbecce song, ndä curunanandäng song, yä Kaläg ziye. Ndä Kaläg paye anggo paccey mo'do awiny!
²⁵ Xänang tanggo kärekä ngake posada sängädic tä rongeneng?
²⁶ Ndä yexeng ka kärekä ngakägo posada sängädic tä rongiccägo songang, wi siye anggo gäredeng ngakä kulung wekgang?

²⁷ "Lala dudulus 'dongoccu key, ndä wexekanatäng song, ndä secce song. Neng musku aläpedäng tanggo ka, kala Seleman tä bugundugke kälägä tandäna kusu kala nuxu dudulusiccong song!
²⁸ Ndä Kaläg nyaza nyägädel dudulus mänangang, ndä uccu todong xongong ndä edekeny sädoxus mas tä boxu tämä'di'diccä zex. Kaläg paye anggo mo'do dudulus. Wi siye

angogong menekä ngakä Kaläg bälaxiny tanggo mänangang?

²⁹ “Ndakä makadang bandagä wegka ziyadang na wegka wuxiding na ndakä gäredeng ngakä weg. ³⁰ Xa känggi kä'day tä walangiccang, mate bandagä siyad na wuxid, ndä Appani Tiyating yex 'dogi mpadangang. ³¹ Anggo basa makadang bangä ngakä Kaläg ndä nyädogung weg tanggo käsär.

³² “Anggo menggä räb kä'dasang sagunu, wanga nyigatäg xa Menggoni Tiyating wane tidi xa buguningzäggong na meske anggo. ³³ Nganyi wegkago kä'day larti tä känggi widänong. Yawi malenägo tä pang Kaläg tä kaxsä meldugi boxsoccu na cereduno songang, na me bära bate songang na tondoc wanyäs songang ndey meskadä wegkago tä pang Kaläg tiyati. ³⁴ Xa owdi mälenägo tängang nyang mäganängo padasang.

Bolosäning tä Melgä Bazuweccägo

³⁵ “Laga tandugu wexekägo na meskadä lampadagägo kusuccu kä'day. ³⁶ Layi kala kängga bene käxa ngondeza päkädäng owdu ledä batad, ndey mawung madotorezang ndey lenge bäling täma tetex. ³⁷ Baxändäg tä cäläxinygi käxa ngondey 'doxodung oxacca kasändäcco song tä melgämang! Aläpedäng zänggä nga tanggo ka, ma täzäma mälage tandugu wexed, na mäbogatasa sa, ndey mälarita siyad täsa! ³⁸ Kax mäwung tä pälic na mä'doxodängza soxacca, baxändäg tä cäläxinygi mänangang! ³⁹ Wadi bäli ka kä'dang me pa yex xongondi me bära wunodung tängang kax meske pane wange me bära läso song. ⁴⁰ Anggo mändey layesi kängga cuccu meskedäning, xa agä, Päxä Käxa Jul awunodung

ndä xongondeneni bäledesäwa song.”

⁴¹ Na Putros ngade ta Yasuwa ka, “Bazuwec, gining zere ngakong täwas wala kän kä'day?”

⁴² Na Bazuwec kabuc ka, “Xänang kädäppa ka mpäse andägi nang na kalelerey tä menekä wexetang, xänang käxa ngondezä wexed bokatasa mene menggä wexed tä ande ndey togadas dericcä menggä wexed layde songang? ⁴³ Baxändäg tä me wexeki käxa ngondeze mele 'doxodung wexecceng. ⁴⁴ Aläpedäng zänggä nga tanggo ka, käxa ngondezä wexed menede ka'däka'di tä andä käxi mänangang.

⁴⁵ “Yä wadi nya me wexeki kä'doc kangad tä ngase ka käxa ngondezang kalaygädas tä mel, na kadeb badkä kulung menggä wexed, bade apanginy na uxu kä'day, ndä siyacca na wuxicci de bux paxeng, ⁴⁶ ndä käxa ngondezä nya me wexeki nuxus wung tä xongondi sabokasa ka mäwunodung songang na tä sani säyex songang, na cäläxti ma, ndä matas ma tä owdu märinginy. ⁴⁷ Ndä me wexeki yex ngaki käxa ngondeze paye ndä wexe song na käbolasa ngase songang, 'doxo bad mange.

⁴⁸ “Wadi me wexeki yex ngaki käxa ngondeze paye songang ndä wex songang säbade päxä bälax winy. Käxa sadoga weg täng mangeng, säpaye täng mange, ndä käxa saposä weg täng mange ka mendäng, säläge payge täng mange.

Yasuwa Koyodung Modey Song, Mägodung Wasad

⁴⁹ “Agä kawung täzäg tä koyinakä mas, ndä ampaye ka nyandäng ganang tunyu walangic kä'day! ⁵⁰ Ndä mänang agä alayis käxa panye xuxubtäg ndä

agäre bal a'dese! ⁵¹ Anggo noxadang ka agä kawung tä koyinakä modey täzäg? A'a, agä kawung tä koyinakä modey song, wadi kawung tä koyinakä wasad! ⁵² Caw xongong na ur'dug bäli ka kän mädäg tä pana wasetäsäning, kodos pase awaga na pädax ndä pädax pase awaga na kodos.

⁵³ Sa säwasetäsäning, menäwan kixidi pene apang song, ndä penäwan kixidi mena song, bonuwan kixidi päxe ux song, ndä päxä ux kixidi bona song, ux kixidi uxä päxe song, ndä päxä ux kixidi wawana ux song."

Bälädäniccä Bolu

⁵⁴ Yasuwa mändey kangad tä xä'dä ka, "Känoxang timingarugu zädongang, na kala bäledeng ka koxa käje na käje. ⁵⁵ Ndä känoxang megenä anda täzäg sageng, bäledeng ka kämpagänendäng sagedäng, na sagedäng. ⁵⁶ Anggo menggä fonofoney! Anggo yexeng tetebegä ngakä bolicca alacca täzäg na täzä koxang, yä wadi kasogänang key 'diyang tetebegä ngakä bolugu wexekong awexe ganangang?

Nyca Amusu tä Ngastänggägo

⁵⁷ "Wi siye anggo zaxadang terekä ngaka apocung? ⁵⁸ Känoxang noccang na me pokakä nga tägi tagä buguningang, mäpädagäsing ndey bolang ngakägo nama ta akäsog ndakä mägozas gi tagä buguning, xa buguning menedes gi tä andä polisic, ndä polisic rikidis gi tax. ⁵⁹ Agä aläpedäng tanggo ka, anggo 'doxadang tunyu song basa degänang na milin!"

13

Yasuwa Kabandä Kän ka Xaje tä Ngaka Tasiny

¹ Xongondi Yasuwa bäldecenäsang, jendägka asiny wang tespedespe. kän kawuno kaläja täma ka Nyägonggosey ce kasog ce seley

Pälatis kapax kulung menggä Calil ndä kurupu tamicca na tamiccä wegki sadämze nangang. ² Na Yasuwa kabuc täsa ka, "Neng anggo käbokosänang ka menggä Calilgi sapaxang sag tasiny mo'do wayaka nyang kasog sapaxang? ³ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!"

⁴ Na mändey Yasuwa ngade täsa ka, "Känggi bägäliziccä kumagi kadeles zängga käkse asiny wang tespedespe tä Salonang, anggo nggeredeng ka sa sädasiny paccey sämo'do känggi kä'day tä Ursalimang? ⁵ A'a, aläpedäng tanggo ka bal anggo xajang tä ngaka tasiny mändey xa na'anggägo näxsecceng mändey!"

Seredäniccä Etä 'Damina Iye Säxong

⁶ Yasuwa kaser nga ka, "Apan-gandäng käsäbä etä 'dami tä pelowge, na xongonendäng mägä'doc mäpaye ka metä enggenge neng ma'doxa ze pälo. ⁷ Na kala mäläpede tä 'doxti meske pelowang ka, 'Tä jendäg kodos agä amelde awunodung ndey ka a'dox päxä 'daminong ndä a'doxodung ze pälo. Dagasa täzäg, taxä wi 'dog uccu ndä wanyis zäkgang?' ⁸ Neng me megäskä pelow kabuc täma ka, 'Bazuwec, accig wanga etong jenong yä anoc abosu boxe adoga mudura täng. ⁹ Ndä zayig cong kiye baydangang, yä kasax iyetang, ndä lusa täzäg.' "

Yasuwa Kädäxä Uxandäng näs Mexes tä Xongondu Sapid

¹⁰ Yasuwa bäldecce tä nuxu axä paliccä Yaxudiny tä xongondu Sapid, ¹¹ ndä uxandäng tänya owdi ligida tas kämexestey tä jendägka asiny wang tespedespe.

cäyex dokol kätay song. ¹²Yasuwa kox ce na kalandä ce na ngade täce ka, “Kala käwulegeswa tä ngguxtug.” ¹³Na Yasuwa kädana asängge täce na tetex cägädokol tiyati kätay na cägädädaxti Kaläg.

¹⁴Na käxa ngondezä axä paliccä Yaxudiny käsänga ta Yasuwa xa Yasuwa kädäxsi tä xongondu Sapid, na ma käxa ngondey mäläpede tä xä'dä ka wexed wexedäning tä sängga aran. Käxa täxäng wung sädäxä täng ndakä wung tä däch tä xongondu Sapid. ¹⁵Na Bazuwec Yasuwa kabuc täma ka, “Anggo menggä fonofoney! Anggo nuxu accägondäng tä xongondu Sapid uludi tigide na cong näs kaccäneneng ndey koya tä wuxid song? ¹⁶Yä cezong cäs päxä pe Apraxim, Däniye gun onguce tä jendägka asiny wang tespedespeng, awang 'dakakä ce tä co'dic tä xongondu Sapid?”

¹⁷Ani Yasuwa kangadäs legegongang, menggä kuruma kä'day zängga kamaye yä xä'dä kä'day käledäning tä wexeki kädong sa Yasuwa wexeng.

Yasuwa Kädupoy Päxä Yugicca Biyey na Bugundugku Kaläg

¹⁸Yasuwa kamänze ka, “Bugundugku Kaläg ka'das wi? Oxadiyang agänang andäppo nangang? ¹⁹Bugundugku Kaläg ka'das päxä yugicca biyey apang kabag käsäbesa tä kaxsänggä pelowge ndä 'donga layis apanggä ed yagäney, ndä awiny 'danydä axinyga tä acayadage.”

²⁰Mändey Yasuwa ngade ka, “Oxadiyang agä andäppo na bugundugku Kaläggang? ²¹Bugundugku Kaläg ka'das 'dazicca ux kabag ndä kurupu na duc mange ndä kamojey ndä pudi kä'day.”

Akäsogalda Kacäbaswa

²²Yasuwa kä'doc tä wedäg kadus kaxsä pa na enggä cabärta bäldecce ndä mäwedede tä Ursalim. ²³Na nuxu kigkandäng kamän ma ka, “Bazuwec, enggä kän bälaxinyag Kaläg xonyong?”

Na mängade täsa ka, ²⁴“Mpädägäsining ndey läsang akäsogaldi kacäbaswang, xa aläpedäng tanggo ka kän mange zäge läsake ndä mo'dada läsacca song. ²⁵Xongonda ledä pa kangäsa kärikä sogaldeneng, anggo wunosunang ndokalacang tunyu dotoraccang ndä nyäxadang ma ka, ‘Bazuwec, wanga was aläsig!’ Neng mäbucu tanggo ka, ‘Agänang ayex anggo song ndä ayex owda känyuccing täng song.’ ²⁶Na noccang ngadaccang ka, ‘Was kasiyzig na kawuxsig nagi, ndä gi käbäldeyze tä kaxsä panäsko.’ ²⁷Neng mämele ka, ‘Agänang ayex anggo song ndä ayex owda känyiccing täng song!’ Nycängäning tä wanang, na'anggägo, anggo menggä sogkä ngaka tasiny!”

²⁸“Na kala todi ngecceng na gasadang nyäxkägö tä oxakä Apraxim na Isxag na Yaxup na menggä logeygi kä'day tä bugundugku Kaläggang yä anggo tä ngastänggägo sä'dädadas anggo tunyu. ²⁹Ndä kän päkätäsäng zä dong na tawiny na anda tiyati na anda täzäg wunosuno catetäsäng kuru siyad tä owdu Bugundugku Kaläg. ³⁰Ndä seley kanggi päccadas ngastängganang, latasa tong yä kanggi latasa tongang, päccatasa.”

'Dockä Yasuwa tä Ursalim

³¹Tänya xongondi Yasuwa legeccenäsang, kulung Farisiny-atäng kawuno ngadeccä täma ka, “Wete wede wangasa owdong xa Xirudus paye pax gi.”

³²Neng Yasuwa kabuc täsa ka, “Wesi lapi ta atorundorini

ka, 'Laley, agä anycaye kängga tasiny na andäxäccì xongondong na edekeny yä mugundeneni am-pele wexekang. ³³ Ndä gang agä awedede xongondong na edekeny na mugun xa kax kädäppa ka säpaxa me logey täpox song, basa tä Ursalim.'

³⁴ "Ama, ama menggä Ursalim, anggogi paxadang menggä logey na 'dämedeng menggä yaxsäwinygi sägäligäng! Agä tol kampay ka agä anduris anggo kala kuxug na enggengge tä boxu kubugke neng anggo kämpayang song! ³⁵ Ndä ganang lala kala agä awangatasa anggo! Ndä aläpedäng tanggo ka, anggo mpassaccang nagä mändey song basa ngadang ka, 'Baxändäg tä käxi wunodung na agä Bazuwec Kaläkgang!'"

14

Yasuwa Kädäxä Apang tä Xongondu Sapid

¹ Xongondu Sapid Yasuwa kä'doc tä siyad tä pang ngo-torponu Farisiny ndä kulung känatäng tänya owdi jenggere ma käsac. ² Ndä apangandäng tänya owdi exengge na asängge kapuruzu. ³ Na Yasuwa kamän me lelericcä asiriyenä Musa na Farisiny ka, "Kädäppa ta asiriye ka kig dächsi tä xongondu Sapid wala kädäppa song?" ⁴ Neng säpulocä na todi Yasuwa kädana ande ta apangzi kädäxä na kayaxsas tä pa.

⁵ Na todi Yasuwa kamän sa ka, "Xänang tanggo pene täng na cong näs tigide kadel taxä gol tä xongondu Sapid ndä 'dägane tetex nyasedäng tunyu songang?" ⁶ Ndä sa sabuc ngakenegi song.

Käxa Coccolo Ngaseneng Kaläg Pokada Tiyati

⁷ Ani Yasuwa koxäs palangas teredenäs otagä caka apoccong,

maser nga täsa ka, ⁸ "Sabandä gi tä owdu batatang, ndakä dere owdu cakä kängga ngoniny xa nuxus nuxung kigkandäng sabandä ngondey tägi. ⁹ Ndä nuxus käxi kabandä anggong wung lapäng tägi ka, 'Togi komong känyca tängang tä käxong ngondeyanang', ndä mänangang zänggä matag tägi ndä sogo gi cengedeswa tä päxä owda biyey.

¹⁰ "Wadi känox sabandä ging, wede icca tä päxä owda biyey ndey käxi kabandä gi kox ging, wung läpäng tägi ka, 'Bisko, bo wede icca tä owda apo.' Na kala känggi täng kä'dayang bälede nyaygi sädogodung täging. ¹¹ Xa käxa poko ngaseneng Kaläg maye ze yä käxa coccolo ngaseneng, Kaläg pokada tiyati."

¹² Sax mändey Yasuwa ngade ta apangzi kabandä kän tä siyatang ka, "Xongonda mpaye bandä kän tä siyatang, acaka bandä biskodagägi na enggä bonggugo na wayagkägo na cong näs menggä sogalinyägägi kadangandeng ndey ka bandä gi tä siyad mändey. ¹³ Wadi xongonda käsog letang, banda menggä wiy na kappudiny na mexesu na ngojony. ¹⁴ Ndey baxändey, xa sa sämeledäng wegki sasiyang tägi song, gi 'doxo wegkägi tä xongondu ngäsakä känggi lelexinyang tä xäs."

Seredäniccä Leda Tädäx

¹⁵ Nuxung accä känggi siyacca na Yasuwa tä pang Farisic-cang kädäng ngaki Yasuwa kangatang, na ngade ta Yasuwa ka, "Baxändäg tä känggi kä'day 'docco siyacca tä owdu Bugundugku Kaläkgang!"

¹⁶ Neng Yasuwa ngade täma ka, "Apangandäng kasog led ngotey ndä bandä palangas mange. ¹⁷ Na tä xongondu led mayaxsä

cäläxinygäma ndey ka 'docco läpe känggi sabandäng ka wuno xa kala siyatatäng benecce.

18 “Neng kân kâ'day kadeb kerekä nga. Nuxu kâxi tâ zälâgkang ngade ka, ‘Agänang kangany zäg ndä ampaye anoc anycopu, wanga agä anoc.’ 19 Na mändey ani tâbangeneng ngade ka, ‘Agä kangany tigitigä way asiny ndä ampaye anoc azägä, wanga agä anoc.’ 20 Yä 'doxti layis sanydäsang ngade ka, ‘Agänang andalewa xa kabagsa käsactong ndä awunodung song.’

21 “Na kala cäläx kämel kâ'doc kaläpe ngaki ta bazuwecce. Na bazuwec ledä pa käsänga na läpedes ta cäläxse ka, ‘Wede tetex tâ akäsogä bo pa na ta akänggä sotagä kukujy. Banggäda menggä wiy na mexesu na kappudiny na ngojony ka wuno.’

22 “Neng cäläx ngade ka, ‘Bazuwec, ngaki kälâpäng ka sogunong, kasog kala ndä musku otagä catatäng päloccä.’ 23 Na kala bazuwec ngade ta cäläxse ka, ‘Wede tâ akänggä sotagi ngoniny näs sotagä walangang, banggäda kân ka wuno ndey panang päs. 24 Xa agä alâpedäng tanggo ka acaka nuxu kâxi kabandäng ndä saxang, wung pong siyakong!’ ”

'Dogi Bede tä Räbkä Yasuwang

25 Xä'dä mange wedeccä na Yasuwa na mawexwa mälâpede täsa ka, 26 “Käxa paye wung 'doc nagä ndä paye agä paccey mo'do paygi payis mena na bona na uxe na pengge na enggä bongga na mändey ngase songang, layis me räbkang song. 27 Käxa poko kalicce ndä räbo agä songang, layis me räbkang song.

28 “Xänang tanggo paye dony pane ndä cata ndey gan na zay wegka 'desede tonyakä pane nang songang? 29 Känox känyca gärtä

nga ndä bosasa kadasuwec ap-poyo na kâ'dese panägi songang, känggi kâ'day zaye panäging kugu gi. 30 'Docco ngadeccä ka, ‘Apangzong kadonyza ndä käpany kâ'dese pane song!’ ”

31 Mändey mängade ka, “Buguningza key paye 'doc 'ding buguningza caka tâ pogud ndä cata bälêde ngase ka 'do tâ pogud na asägaruge päsäciny asiny (10,000) ndey mo'du buguningza kâne päsäciny utang (20,000)? 32 Ndä mäyex ka mä'dingi nya buguningzi songang, tâ cuku menggä kurusa täxande, mäyaxsada kulung menggä bolic päccatasa tâ legeygä ngakä modey. 33 Ndä mänang nuxung accägondäng layis me räbkang song basa wangesänang wegkägö kâ'day ndey räbkädang agä.”

Enggälokega Tasiny

34 “Enggäloke apoccu yä kalaye leminyng, sogoduning key meletäsäno tâ coccoydgäng? 35 Enggäloke kalaye leminyng, kax säduki tâ zäg na tâ codoro na wexekanatäng song basa säduki täpox. Käxa wunde dängecceng, däng ngakong!”

15

Seredäniccä Ngakä Sagända Kâmes

1 Menggä yawgä tuluba na känggi sogo ngaka tasinyang kawuno tâ dänggä legeygä Yasuwa. 2 Neng Farisiny na menggä lelericcä asiriyenä Musa ngunungunicci ka, “Apangzong bokatasa kängga sogo ngaka tasiny ndä siyacca nang.”

3 Na kala Yasuwa kaser nga täsa ka, 4 “Xänang tanggo sagunu täng udiny mädäg (100) ndä nuxung mes ndä wangatasa aki udiny tesped wang asiny wang paye nuxung (99) tâ korongic yä 'doco tâ nyamgä ani nuxung

kāmesang basa 'dox songang?
⁵ Ndā kala ma'doxang māpoko tā baccugāma mālededeswa nang tā akāsog. ⁶ Māmelede tā pa, mābange aminuguma na menggā akāsogalinygāma ka, 'Posa agā nycugo aledāning xa ka'dox sagāndanggi kāmesang.'
⁷ Alāpedāng tanggo ka, ka'das nya bangi kām lededāning paccey tā pang Kalāgi tiyating tā ngakā kākā nuxungza kākajā tā ngaka tasiny. Xa ledi tiyati tā pang Kalāgkang kamo'du ledā aki udiny tesped wang asiny wang paye nuxung (99) lelexiny kamen ngakā Kalāgkang."

Seredāniccā Ngakā Ariyaliccā Fudana Kāmes

⁸ Yasuwa kawetāde na legey ka, "Cong nās uxa ariyalinygā fudada tāng asiny ndā nuxung mesang, banye lampane ndā wortacca paccey ndey 'dox owde song?
⁹ Ndā ca'doxang cābange aminuguce na menggā sogalinygāce cāngade ka, 'Nycugo aledāning xa ka'dox ariyaliccanggi kāmesang.'
¹⁰ Ka'das nya bangā ledong, alāpedāng tanggo ka, Kalāg na malayikadage lededāning tā ngakā kākā nuxungza kākajā tā ngaka tasiny."

Seredāniccā Apang na Pengge Pādax

¹¹ Yasuwa ngade ka, "Apan-gandāng māgaccāng na enggā pengge pādax. ¹² Penāmani biyeyang lapada tāma ka, 'Appa, ampaye larā male tāwas.' Na kala mesa kālārā male kadoga kāma.

¹³ "Na tā sāngga bālxiny māguduri malenāma manganya kā'day māgā'docco nang tā cabāra tāxande. Māgā'doc mawanye nang tā wexekā tawus-tug winy.

¹⁴ "Na kala māgā'dese malenāma, na buxu kamen nya cabāri na xas kapax ma

paccey. ¹⁵ Na māngade tā ngasāma ka, 'Anoco ta nuxu me cabārong ani buduruginyge tāngang ndey ameskādā buduruginyge.' ¹⁶ Māgā'doc ndā sāleye siyad tāma kasog ma māpaye siyakā sa sāpārki mādogada ta buduruginyang.

¹⁷ "Na xongonendāng man-imāng pang mesa na māngade tā ngasāma ka, 'Wi siye agā anycu todong xas paxe agā, yā appanang wekenetāng mange menggā wexeke siyacca matasa de kulung tegeteseng.' ¹⁸ Māngade ka, 'Anoco tā pa ta appanang alāpede tāma ka, "Appa, kasog ngaka tasiny tagā Kalāg na tagā gi. ¹⁹ Kandāppas ka bandās agā penāgi māndey song. Wanga agā alayis me wexiccāgi."'

²⁰ "Na kala mamen sog māmele tā pa ta mesa. Na mesa kox ma tāxande na age kawasa tāma kāpaxas ma kagapas ma. ²¹ Na māngade ta mesa ka, 'Appa, kasog ngaka tasiny tagā Kalāg na tagā gi. Kandāppas ka agā anās penāgi māndey song.'

²² "Neng mesa kabandā cālāxinyge ka, 'Dāgana goyining tandāni appoyong laga ma nang, na бага kālīngic loxi tā pāxā andāma na laga ma na kābadaga apoccu.' ²³ Na mesa kabandā menggā wexed ka, 'Goyining pāxā 'dāmādi kawingang nycugo ampārki ma nang, na aledāning, ²⁴ xa pāxā penanggong kāmes neng sa'dox ma! Oxodig ka māgāxsā, neng manang mawung moxacca.' Na kām kaledāno.

²⁵ "Yā pāxā penāmani ngondeyang nyandāng tā pelow na kala kawung wede dānge tādāxā kām buldi na coxad na langad tā pa. ²⁶ Na kala māgādokala tāxande mabandā me wexed mamān ka, 'Oxadi kasiwa tā pang?' ²⁷ Na me wexed lapada tāma ka, 'Pāxā bonggo

kämel kawung, neng menggo kăpărkă ma na păxă 'dămădi kawing pacceyang, xa mawung wanăma apo.'

²⁸ "Na măgăsănga malewa tăxande na mesa kă'doc tăma mănē ma ka, 'Wi siye gi zaxe wunad towang?' ²⁹ Na măngade ka, 'Za, kalayigădă nagi ewexecce tăgi kala călăx ndă ande ngagigi, yă kax taxă nuxu kădong păxă ayis ka apax asig na aminugang song. ³⁰ Yă păxă penăginong kasax gi, kabag malene kă'doc kawanye nang na tabany, ndă kawung kămpărkă na kăledăwa tâng.'

³¹ "Na mesa kabuc tăma ka, 'Penang, ging nagă tol ndă wegang kă'day kinggig. ³² Yă păxă bonggonong kămese tăpox neng sa'dox, oxodig ka kăxsă neng manang mawung moxacca, nyang kasog kămpărkă mang ndey ledănig.'

16

Seredăniccă me Menekă Wegkă Kăxa Kadangandey

¹ Yasuwa kalăpe tă mēggă răbke ka, "Apangandăng năs tan-ganic salăpe tăma ka me menekă wegkăma kawanydăs weg. ² Na ma 'doxti kadangandeyang ka-bandă me menekă wegke kamăn ka, 'Oxadi kasiwa andănge sălege ngakă wexekăging? Genesa wexeki kăwex kă'dayang xa gi mândey noco layis me menekă wegang song.'

³ "Na me menekă weg ngade tângase ka, 'Oxadi gang asogkang, xa bazuweccang paye caye agă tă wexekangang? Agă ampădăg de ka awacca song ndă zănggă matag tagă ndey ka anyăxayza. ⁴ Ayex 'doga asogo ndey kax săbogkung agă tunyu tă wex-ekan na kăn bokatasa agă tă padăgka.'

⁵ "Na kala mabanggădă kănggi kamendă amusudi tă 'doxti kadangandeyang nunuxundi. Na mamăn ani tăzălăgkang ka, 'Gining bazuweccang paye tăgi kăreny?' ⁶ Na nya apangzi kabuc ka, 'Bălegkă belenyinygă midă kuluc udiny mădăginy tespedespe (800).' Na me menekă weg ngade tăma ka, 'Koyung faragiccă amusunugi icca tăzăg tetex gărekărejesa udiny mădăginy tesped (400).' ⁷ Na mândey me menekă weg kamăn 'doxti nuxungang ka, 'Gining bazuwec paye tăgi kăreny?' Na nya 'doxti kabuc ka, 'Măpaye landagă guruwec păsic nuxung (1,000).' Na me menekă weg ngade tăma ka, 'Baga faragiccă amusunugi gărekărejesa udiny mădăginy tespedespe (800).'

⁸ "Na bazuwec kăboxey me menekă wegki kălăkălăjang xa mawexse na yerăndăg. Xa kănggi mene ngakă Kalăg songang, yerăniny tă wex-ekanagi wexe na acăngganang mo'do kănggi kamen ngakă Kalăgkang. ⁹ Ndă alăpedăng tanggo ka zoga biskodagăgo na bangă tangandăgkă walangic, ndey edekeny asănggăgo kalaye păloccung, ndey săbogkasa anggo tă pang Kalăgi tiyating.

¹⁰ "Kăxa măgaxse bow tă păxă 'doga bălaxang, mândey măgaxse bow tă wegka mangeccă, yă kăxa măgaxse jul sogo raj tă păxă 'doga bălaxang, mândey sogo mănang tă wegka mangeccă. ¹¹ Kănox gang măgaxsăgi bow tă menekă tangandăgkă walangic songang, zogowa key măgaxsăgi laye bow tă tangandăg tă pang Kalăgi tiyating? ¹² Ndă kănox măgaxsăgi bow tă menekă wegkă kăxa caka songang, xănang togodung kănggi tăging? ¹³ Me wexe-tandăng păx wexecce ta bazuwec-

ciny pädax song, xa nyäsogo 'do paye nuxung paccey yä saxe nuxung. Mändey nuxus nyäsog gigili nuxung yä ndäridäswa tä nuxung. Kigkandäng dacada wexe ngakä Kaläg na ngakä male song.”

Yasuwa Kalegeyze ta Farisiny

¹⁴ Farisinygi paye ngakä male pacceyang kädäng ngaki Yasuwa kalegey kä'dayang, na sagug ma näs anyad. ¹⁵ Neng Yasuwa ngade täsa ka, “Anggo läpedeng ngastänggägo tagä kän ka anggo mpocang na'do yä dara Kaläg yex ngakä mägangyägo. Wegkägogi ngoxodänang nang tagä kän na tä warä känang, tas tagä Kaläg.

¹⁶ “Asiriyenä Musa na sorunu menggä logey kawexse tä loydäggä ow basa Yoxana me Pac kawung. Ndä kala yaxsäwecci apo lege ngakä bugundugku Kaläggang duwaleywa ndä kala kän kä'day kasägkesäno ndey ka läs bugundugku Kaläg. ¹⁷ Zäkoxa na täzäg way winy 'diti päxä munu jengicca sacarasa ta asiriyenä Kaläg ka werwa.

¹⁸ “Käxa kasax uxe ndä 'doc bag uxa cakang, kasog ramic, ndä käxa kabag uxa yoxe kasaxang, ramacca.”

Yasuwa Kälegä Ngakä Apangza Kadangandey na Apangza Wiywa

¹⁹ Yasuwa ngade ka, “Apan-gandäng kadangandey ndä lagewa na tanduga dulatulajeccä ndä todotol siye siyaka apoccu. ²⁰ Ndä apangandäng säbangäs Liyasir wane bägälic käpoposu wunodung sängo tä akäsogaldä pang nyapangzi kadangandeyang, ²¹ paye ka 'dox enggä siyaki teldeccä tä tumunu siyakämang ndey ka si. Ndä isu wunosung laxte wanämani käpoposung.

²² “Na kala ani Liyasir käxsäsang, malayikada kabag ma kagoyas ma tä owdi Apraxim tängang. Na apangzi kadan-gandeyang mändey käxsä na sabosu. ²³ Na mägä'doc tä mas na mägäsa tiyati moxada Apraxim täxande na Liyasir kätä tä wane käsac. ²⁴ Na mabandäsa ka, ‘Wawa Apraxim, wanga agägi wayesäng tagä, lapi ta Liyasir ka mä'doc mäluji päxä andäma tä ma mäwung mädälbes tä nyipärang xa agänanganang tä cäläxtäg tä mas.’ ²⁵ Na Apraxim kabuc täma ka, ‘Atä, bäli ka tä cuku gi täzäg kä'dox wegkä apoccu kä'day yä Liyasir ka'dox wegka apoccu song, tabewa winy. Neng gang ma mägäluki buduldug yä gi käwalas tabi. ²⁶ Ndä tä ngakong kä'dayakang, salu ow tägog tä pidi ndey ka kangga paye ca'dsa wuno tanggo tä owdiyang, wunosung song na kangga tanggo tä owdi paye wuno täwas tä owdongang, cogo owduskonong song.’

²⁷ “Na sax mändey apangzi kadangandeyang ngade ta Apraxim ka, ‘Wawa, ampaye gi ka yaxsa Liyasir tä menggä panäsko täzäg ²⁸ xa enggä bong-guskotäng kawangasa mädäg ndey Liyasir 'doc daxä sa ndey säccagä exenggäsa ndakä sädelese tä mas ka'das agä.’ ²⁹ Neng Apraxim ngade täma ka, ‘Asiriyenä Musandäng na sorunu menggä logey wanga sa sädäng ngaki legeng.’ ³⁰ Na apangzi kadangandeyang ngade ka, ‘A'a, wawa Apraxim, basa nuxung käxa käxsä kangäsa tä xäs kä'doc kaläpe ngakong täsang, säxajeccä säwange ngaka tasiny.’ ³¹ Neng Apraxim kämeley täma ka, ‘Känox sägädäng ngakä me logey Musa na menggä logeygi nasa songang, kax kig äxsä ndä

ngäsa 'doc läpe nga täsa na
sädänge säxong.' ”

17

*Yasuwa Käbäldey Menggä
Räbke*

¹ Yasuwa ngade tä menggä
räbke ka, “Bäli ka ngatatäng
wunosung gawadas anggo tä
ngaka tasiny! Ndä woyoy
tä känggi 'docco sogongang!
² Ndä käxi kädäppa ka 'doco
sogong, saxsa ngayiccä ngorey
tä ngase ndä sägawa nang tä
colonggo 'diti togku känggong
mäganyga bowinyang tä sogku
ngaka tasiny. ³ Meskäde
ngastänggägo. Känoxang päxä
bonggo sogo ngaka tasinyang,
dixi ndä mägäxajä mawang
ngaka tasinyang, zaxi täma. ⁴ Kax
mäsoğ ngaka tasiny tägi taxä
paxtändig tä xongonda nuxung
ndä mämeley ngasäma mäwung
tägi taxä paxtändig mangad
ka, ‘Agä kaxajä tä sogku ngaka
tasinyang,’ saxi täma.”

⁵ Na känggi Yasuwa käligäng
ngadeccä täma Bazuwec Yasuwa
ka, “Posa menekä ngakä Kaläg
täwas!” ⁶ Na Bazuwec kabuc ka,
“Kä'dang menekä ngakä Kaläg
tanggo biyey kala päxä yugicca
biyeyang, kax läpeng tä etong
ngoteyang ka zuduwa na mäxke
'doc udusawa tä kaxsä colonggo,
na dänge ngakägo.

⁷ “Päx nuxung accägonäng
cäläxse päkädäng pelow na cong
näs megäskä sagunuwang na
läpede tänya cäläxseneni ka,
'Bo icca siysi?” ⁸ A'a, wadi gi
bazuwec noco läpede ta cäläxsägi
ka, “Dayawa, wexe siyad ndey
dogung siyad tagä accäg asiyya
na awuxsi ndä kala gang gi
ziyya na wuxsi.” ⁹ Bazuwec logo
cäläxse xa ka kasog ngaki maläpe
tängang song, päx mälogo täng?
¹⁰ Anggo mändey käwexeng

wexeki agä kaläpäng tanggo
ka wexengang, kax wexeng
na noccang ngadaccang ka,
'Was anäsig cäläxinyga täbangä
wexeki wexedänäng nenyang
kandäppig dädäxti song.’ ”

*Yasuwa Kädäxä Menggä
Omoda Asiny*

¹¹ Ani Yasuwa kä'docus tä
Ursalimang, mägäläng pidänä
Samriya na Calil. ¹² Mägä'doc
ngäte tä päxä cabär, na apanginy-
atäng layis menggä omoda asiny
käpasasa täma na kadenggeze
täxande, ¹³ kädawasa ngadeccä
ka, “Yasuwa, Bazuwec, wanga
agägi wayesäng täwas.” ¹⁴ Mägäxo sa na mälapede täsa
ka, “Wesi pari ngastänggägo ta
menggä tämed tä Kaläg ndey
säduwaley ka wadäkägo kalaye
apoccu.” Na kala säwedetese na
sa'doxung wadäkäsa kädäxäno
salaye säpoccu.

¹⁵ Na nuxung accäsa kox wane
kalay apo na kämel dawé dädäxti
Kaläg. ¹⁶ Kä'doc kädukurusa
tagä Yasuwa logo Kaläg, ndä ma
'doxti me Samriyang. ¹⁷ Na Ya-
suwa ngade täma ka, “Kädäxä
anggo näsang asiny song? Ku-
lung känggi paye nuxungang sati?
¹⁸ Basa me pungudongang tol
kämel kawung kädädäxti Kaläg tä
ngakä däxkeneng?” ¹⁹ Na tänya
owdi Yasuwa läpede tä nya me
Samriyani ka, “Ngäsa wede xa
menekä ngakägi tagä kädäxä gi.”

Bugundugku Kaläg Wunosung

²⁰ Xongonendäng kulung
Farisiny kamän Yasuwa ka,
“Xongonda keyang bugundugku
Kaläg wunosung tängang?” Na
Yasuwa kabuc ka, “Bugundugku
Kaläg wunosung na bolu de
oxowa song. ²¹ Oxowa ndey ka
anggo ngadang ka, 'Nyanang!'
na, 'Nyani!’ song. Bugundugku
Kaläkatäng nanggo kala.”

Päxä Käxa Jul Wunodung

²² Yasuwa ngade tä menggä räbke ka, “Owandäng wunodung ndä anggo noccang mpadang ka zang cukang, agä Päxä Käxa Jul tä butug, ndä zadang säxong. ²³ Ndä kän ngadeccä tanggo ka, ‘Lala, mani todil’ na cong ka, ‘Lala, manang todong!’ Ndä ndakä ndängeng ngakäsa. ²⁴ Xa agä, Päxä Käxa Jul, xongondeneni awunodung kala wuxekä koxana banye tiyati na ota kä'day.

²⁵ “Ndä täzäläg basa agä anycäläxtiwa tä weg mange na mändey menggä zong pexkä agä. ²⁶ Ka'das wexeki kän kawex tä xongondu 'doxti säbangäs Noxang, mändey kän wexe sawexeki basa xongondi agä, Päxä Käxa Jul awunodung tängang. ²⁷ Kän siyacca na wuxicci na batacca na sädere bal koxasa xongondi Nox kaläsa kaxsä dämpejigseneng. Na faya kawung kapax kän kä'day.

²⁸ “Winy ka'das ani tä xongondu 'doxti säbangäs Lotang, kän siyacca, wuxicci, nganyacca ndä nganyatasa, ndä zäbecce na tonyacca, ²⁹ neng xongondi Lod kawetäs tä kaxsä pana säbangäs Sudumang, Kaläg kayaxsä mas na nganyuga kusuccu kaduny kän bägälic. ³⁰ Ndä kän wexe nya bangongang, mändey laye kala xongondi agä, Päxä Käxa Jul aweyetesawa tängang. ³¹ Ndä tänya xongondi, käxi täzä ax yä wegke tä axang, ndakä coccoleza ndey ka bag wegke song na mändey känggi tä pelowang ndakä mele tä pa song. ³² Gärning ngaki kasoguno tä uxu Lotang!*

³³ “Käxa paye ka meske rongicce täzägkang wadi mesede yä käxa meske rongicce täzäg songang 'doxo aygä liliy. ³⁴ Aläpedäng

tanggo ka ongudeneni kän tugu salany pädapädax, ndä Kaläg bate nuxu yä nuxu laye. ³⁵⁻³⁶ Mändey uxu pädax tugu ngoreygä kuny tä ngayicca nuxu, ndä nuxu ux säbate yä nuxu laye.”

³⁷ Na kala menggä räb kamän Yasuwa ka, “Tä owda key, Bazuwec?” Na mabuc täsa ka, “Owda wininy kädurisäno tängang, bäli ka wegka käxsetäng täng.”

18

Yasuwa Kälegä Seredäniccä Mandur na Buguning

¹ Yasuwa kaser nga tä menggä räbke ka palacca todotol ndakä cananga. ² Mängade ka, “Buguningandäng tä nuxu bo pandäng nyigate Kaläg song ndä nyaye kän song. ³ Ndä mändey mandurandäng tänya bo pani wunodung melde täma läpede täma ka, ‘Bo geye was na me kurang ndey ndäppoy was.’ ⁴ Tüzälägäne buguning kalewa, neng magärtä ngaki mandur melde tängang, na mängade tä ngasäma ka, ‘Agä anyigate Kaläg song ndä anyaye kän song, ⁵ ndä mandursong nyanang gang nyalange agä todotol, bal anoc agey ta me kure xa cämelde tagä cäwange agä anungu song.’ ”

⁶ Na Yasuwa ngade ka, “Ndänge sele ngakä buguningza däppo kän song! ⁷ Yä päx Kaläg Kaläg nyädäppo känggänyagi nyalebäng ngeyecä tänya säxe na ongutang song? Yä päx Kaläg waxe posakä kän? ⁸ Aläpedäng tanggo ka Kaläg däppo kängge tetex, yä tä wunakang agä, Päxä Käxa Jul, päx awunodung a'doxodung menekä ngakä Kaläg täzäg?”

* **17:32** Uxu Lod kaweräswa sudu enggäloke xa cägew zäce calala Sudum cäsaxe 'doc wangesänake.

Yasuwa Kaser Ngakä Farisic na me Yawgä Tuluba

⁹ Mändey Yasuwa kaser seredāniccong ta kulung känggi kabogkasa ngastängga ka yex ngaki wexeng ndä laleyis kän kängga winyang ka, ¹⁰ “Apanginyatäng pädax käd'occo taxä tämed tä paley, nuxung Farisicang yä ani nuxungang me yawgä tulubang.

¹¹ “Na Farisic kangäsa tiyati kapaleza ngade ka, ‘Kaläg, alogo gi xa agānangang kala kulung kän song, kala menggä celdug song, na kala menggä ngananganegä nga song, na kala menggä ramiccū song, ndä agäng kala me yawgä tulubanani song. ¹² Tä sängga paxtinding, agä amene uxkud tä sängga pädax ndä aluwu asiny tä wegkänggi a'doxo udiny mädäggkang (100) adogodung tägi.’

¹³ “Yä me yawgä tuluba kädokol täxande ndä gunusawa na zänggä mayad ngade ka, ‘Kaläg, wanga agägi wayesäng tagä, xa kasog ngaka tasiny!’

¹⁴ “Aläpedäng tanggo ka kala tä 'dockäsa tä pa, Kaläg kagixi me yawgä tuluba xa mägaxse bow, yä Farisic, Kaläg kagixi song. Käxa pokō ngaseneng, Kaläg maye ze yä käxa coccolo ngaseneng, Kaläg pokada tiyati.”

Yasuwa na Enggä Pipu

¹⁵ Xongonendäng kän kagoying engga ta Yasuwa ndey ka mäpes. Neng menggä räb kox mänang, na sadux kän ka dokalas koyinakä pipu. ¹⁶ Neng Yasuwa kabandä pipu ka, “Wanga pipu wuno tagä, ndakä zekeng sa xa känggi 'dase pipugongang bugundugku Kaläg kănanag. ¹⁷ Aläpedäng zänggä nga tanggo ka, käxa kăpay bugundugku Kaläg kala päxä pipi songang, Kaläg kixidi tä bugundugke song.”

Apangza Kadangandey

¹⁸ Xongonendäng bazuweccä Yaxudinyandäng kamän Yasuwa ka, “Me bälidic, gi mpoyo na'do, asogowa key ndey a'dox aygä liliyang?” ¹⁹ Na Yasuwa kabuc täma ka, “Oxadi kasog gi bangäs agä käxa apong? Käxa apondäng song, basa Kaläg nuxundugke. ²⁰ Anggo yexeng täsedānic ngade ka, ‘Acaka rameyza, acaka paxsa, acaka pälze, acaka lege celdug, nyaya menggo na bonggo.’” ²¹ Na nya bazuweccä Yaxudinyi kabuc ka, “Cawu biyeydäggkang agändäng awexe ngakong bägälic.”

²² Yasuwa kädäng mänang, na lapada täma ka, “'Dogkandäng nuxung musku käsog song. Nganyi wegki täging käd'ay larti tä känggi widunong ndey dangandey tä pang Kaläg tiyati. Ndä bag bangang.” ²³ Ani 'doxti kädängäs ngaki Yasuwa kalegey mänangang, mägaxse ka'dexwa xa madangandey nano.

²⁴ Yasuwa kox mänang na ngade ka, “Bede paccey tä käxa kadangandey ndey ka läs bugundugku Kaläg! ²⁵ Tireneng ka kamalä läso axä wuladä 'diti käxa kadangandey tä läsakä bugundugku Kaläg.”

²⁶ Na känggi kädängang ngadeccä ka, “Neng gang mänangang xänang seley xonyo ngaseneng?” ²⁷ Na Yasuwa kabuc ka, “Käxa seley xonyo ngasenendäng song, basa Kalägkang tol xonyaccang.”

²⁸ Na Putros ngade ka, “Lala, kawangesänig wegkäsko käd'ay ndey ka abagig banggi!”

²⁹ Na Yasuwa ngade täsa ka, “Aläpedäng zänggä nga tanggo ka, käxa tanggo kawangasa pane na uxe na enggä bongga na mena na bona na pengge ndey ka wex ngakä Kalägkang, ³⁰ nyäposo

täng mange mo'do aki kalayeng tä jendong na ur'dug tä 'doxakä aygä liliy."

Yasuwa Kanimäng Xäske

³¹ Yasuwa kabag känggenegi kälīgä asiny wang pädaxang, kä'doc nang tä cengic na mäläpede täsa ka, "Kala lala, 'doc-cig tä Ursalim, ndä ngaki kä'day menggä logey gärekärejesa tä ngakä agä Päxä Käxa Julang, 'docco 'desetäsäning tä owdi. ³² Kän 'docco menedes agä ta asänggä känggi näs Yaxudiny songang, sä'docco sängobo agä, säcäläxti agä ndä säpädadas agä. ³³ Sä'docco säbade agä na ke'diccä oxay, säpaxe agä ndä asängo pädax na tä sängädi kodosang angäsata tä xäs."

³⁴ Neng känggi mägälīgä asiny wang pädaxang, kabäle bangä ngakämagi song, xa legeygi malegeyang kacungguli sa. Sabäle bangä ngaki Yasuwa lege täsang song.

Yasuwa Kalenge Agä Ngojox

³⁵ Ani Yasuwa kawunäs ngäte ta Arixang, apangandäng näs ngojox kăcca tä nyixtä akäsog nyäxacca. ³⁶ Na mägädäng tädäxä kăn na mamänze ka, "Oxadi kiyang kasiwang?" ³⁷ Na säläpede täma ka, "Yasuwa me Nasra nyang wedeng." ³⁸ Na kala mabandäsa ka, "Yasuwa, päxä pe Dawud, ata agägi wayesäng tagä!" ³⁹ Na känggi kädoleyzang kadux ma ka mápäla neng mägädawa paccey ka, "Päxä pe Dawud, ata agägi wayesäng tagä."

⁴⁰ Na kala Yasuwa kädokala läpede ka sägoyung ngojox täma ngäte. Sagoyung ma ngäte na Yasuwa kamän ma ka, ⁴¹ "Oxadiyang mpaye agä asog täging?" Na mabuc ta Yasuwa ka, "Bazuwec, sogä agä azayza mändey." ⁴² Na Yasuwa ngade täma ka, "Laleyzi, menekä ngakägi tagä kaxony gi."

⁴³ Na tetex agäma kalengesuno na mabag bangä Yasuwa, mädädäxti Kaläg. Kän kä'day kox mänang, na kädädäxti Kaläg mändey.

19

Yasuwa na Zaka

¹ Yasuwa kadus bo pana säbangäs Arixä. ² Ndä apan-gandäng tänya owdi säbangäs Zaka näs ngotorponu menggä yawgä tulbada kadangandey. ³ Mäpaye ka mälaley Yasuwa neng mädäläng tä warä xä'dä kasog ma moxo Yasuwa song. ⁴ Na mägoy tetex mapäcca mägä'doc ma'deg zä balasu ndey ka mox Yasuwa, xa Yasuwa 'doco lange nya sogi.

⁵ Ani Yasuwa kăcogus owdu-maniyang, koxas ma tiyati täzä ed na ngade täma ka, "Zaka, coc-coleyzi tetex bo xa xongondong 'doccig cuccig tä panägi." ⁶ Na tetex Zaka kacoccoleza kä'doc kabokasa Yasuwa tä pane na led.

⁷ Kän kä'day kox mänang na kangunungunizi ka Yasuwa kä'doc kalayis palangasiccä kăxa sogo ngaka tasiny. ⁸ Neng Zaka kangäsa ngade ta Bazuwec ka, "Lala, Bazuwec, agä alare wegkang tä pidi adogada kulung tä menggä wiy, na mändey kasog käläkäläjtäg tä wegkä nuxu kigkang amelede 'dogi payeng täng taxä tesped!"

⁹ Na Yasuwa ngade täma ka, "Xongondong Kaläg kaxony panong, xa Zaka tirä päxä pe Apraximang! ¹⁰ Xa agä, Păxä Käxa Jul kawung tä nyam na tä xonyakä kängga kămese."

Yasuwa Kaser Ngakä Buguning na Cäläxinyge Asiny

¹¹ Ani xä'dä deldeyäs wungga tä legeygä Yasuwang, mawung ngäte tä Ursalim, ndä kăn oxo ka bu-gundugku Kaläg kala wunosung kăccogus. Na todi maser nga

täsa. ¹² Mängade ka, "Päxä pe buguningandäng kä'doc tä walangicca täxande ndey ka sädogä butug täng ndä mel. ¹³ Na kala ka mä'doco na mabandä cäläxinygäma asiny mägälarta ariyaliny täng asiny ka däseydä basa mämél mäwung.

¹⁴ "Neng känggäma paye ngakäma song na sayaxsa menggä yaxsäwiny ka läpe ka, 'Ampayedig 'doxtong layis buguningzäsko song.' ¹⁵ Ani mägä'docus sadoganäs butug täma ndä mämélasang, mabandä cäläxinygämagi madoga ariyaliny täng ndey ka däseydäng. Mäpaye mabäle wegki sa'dox tä zängganang.

¹⁶ "Cäläxsi täzäläggang kapäcca täma ngade ka, 'Bazuwec, ariyalicci kädogung tagä nuxungang, kawexä ka'dox täze asiny.' ¹⁷ Na buguning ngade täma ka, 'Käwexä apo, gi näs cäläxsa apo! Xa mägaxsägi bow tä päxä 'doga bälax, asogus gi ngotorpo mene kaxsänggä padäg asiny.'

¹⁸ "Na mändey pädaxeneni kawung ngade täma ka, 'Bazuwec, ariyalicci kädogungang kawexä ka'dox täze mädäg.' ¹⁹ Na buguning ngade täma ka, 'Gi noco mene kaxsänggä padäg mädäg.'

²⁰ "Na kodoseneni kawung täma ngade ka, 'Bazuwec, ariyalicci kädogung tagäng nyanang kamulungiy na päxä nyonggo kayokas. ²¹ Xa anyigate gi xa ayex gi ka näs apangza mägaxse täbag na'do. Ndä gi bate maleni layis nänggi kä'dangas songang ndä jede wegki kätzäbä songang.' ²² Na buguning ngade täma ka, 'Agänang amene gi tä legeygä ikägi, gi näs cäläxsa kadawustey! Yex ka agä anäs buguningza mägaxse täbag abate maleni layis nänggä kä'dangas songang, na

ajede wegki kätzäbä songang? ²³ Neng wi siye gi kä'danga ariyalicci kang tä axä owdu däsey ndey koyung ze songang?"

²⁴ "Na buguning ngade tä menggä wexekenegi dokolocung ka, 'Gujuyning ariyalicci tämang tunyu dogi tä cäläxsong käne asinyang.' ²⁵ Neng sängadeccä täma ka, 'Bazuwec, noxo ma ariyalinygämatäng asiny!' ²⁶ Na buguning ngade ka, 'Aläpedäng tanggo ka käxi kädäsey wegkeneng aposo täng, yä käxi kädäsey käne songang, agujudung täng tunyu. ²⁷ Wadi gang menggä kuranggong paye ka alayis buguningza songang, goyining sa tagang todong dämde ngastänggä sa!'"

Ndetelegunu Läsakä Yasuwa tä Ursalim

²⁸ Ani Yasuwa kä'desenäs seredäniccongong, mawetäde tiyati tä Ursalim. ²⁹ Kala mägä'doc ngäte tä enggä cabärtaga säbangäs Faci na Petani tä Cabärä Zayitun, na mägäpäcca menggä räbkäma pädax. ³⁰ Mäläpede täsa ka, "Wesi tä päxä cabäri taggägong. Känoccong käläsangang, 'doxadang päxä kaccäna taxä nuxung kig kasana täze song kaxsasawa todi. Nyuli goyining tagä todong. ³¹ Kä'doxang käxa kamän anggo ka, 'Wi siye anggo nyuliding kaccängang?' Läpi täng ka, 'Bazuwec paye.'"

³² Na sa känggi mayaxsa kapäccasang ka'doxa sangaki maläpe täsang. ³³ Säga'docco säludi päxä kaccä na letuge mäne sa ka, "Nyuliding kaccänong koyadang ti?" ³⁴ Na sabuc täsa ka, "Bazuwec paye." ³⁵ Na kala sagoya päxä kaccä ta Yasuwa sapetäde tandugusa tä onge ndä Yasuwa 'deg.

³⁶ Masana täze na kän kapetädеса tanduga tä akäsog

ndey dädäxti ma tä laxänakäma.
³⁷ Kala mawung käsac tä akäsogi
 coccolacca päkädäng Cabärä
 Zayitunang, na menggä räbkäma
 kä'day daweccä lededäning
 dädäxti Kaläg tä wexeki Kaläg
 kawex sägoxang. ³⁸ Sängadeccä
 ka, "Baxändäg tä buguningzi
 Bazuwec Kaläg yaxsedängang!
 Modeyatäng tä pang Kaläg tiyati
 na dädäxtiy tä Kaläg!"

³⁹ Neng kulung Farisinyatäng
 tä warä xä'dä ngadeccä täma ka,
 "Me bälidic, daxa menggä räbkägi
 ka säpälasa." ⁴⁰ Na Yasuwa
 kämeley täsa ka, "Aläpedäng
 tanggo ka kax säpälasa na
 nganyugong dawatasa dädäxti
 agä!"

*Yasuwa Age Kawayasa tä Ur-
 salim*

⁴¹ Ani Yasuwa kawunäs ngäte
 koxus Ursalimang, mangedä tä
 ngake, ⁴² mängade ka, "Anggo
 menggä Ursalim, kämeseng xa
 xongondong käbäleng ngaki
 koyodung modey tanggong song,
 neng gang kala mändey noxadang
 'dogi koyodung modey tanggo
 song. ⁴³ Tä sänggi wunosunong
 menggä kurugo kakaradas anggo
 tä kaxsä cabär tä cende kä'day
 ndä räbadas anggo. ⁴⁴ Säwasadas
 anggo käked, anggo na penggägo
 säwange nuxu accägo tä kaxsä
 Ursalim song, ndä kax ngayicca
 säwange täzä wayanandäng
 song. Ngakong sogoduno xa
 anggo käjenggereng na käbäleng
 ka Kaläg kawung tanggo song."

*Yasuwa Käyegeley Kän Taxä
 Tämed tä Kaläg*

⁴⁵ Yasuwa kaläs kal taxä
 tämed tä Kaläg mägä'doc
 mamagäng menggä nganyad
 tunyu, ⁴⁶ mängade täsa ka,
 "Gärekärejesawa tä Sorunu
 Kaläg ka, 'Panang, pang pa-
 leyang,' yä anggo käsogasang axä
 menggä bärada!"

⁴⁷ Yasuwa bäldecce todotol
 tä kaxsä kaldagä axä tämed tä
 Kaläg. Ndä bazuwinygä tämed
 tä Kaläg na menggä lelericcä
 asiriyenä Musa na kulung ngotor-
 pugä Yaxudiny nyame rajsa ndey
 ka paxäs Yasuwa, ⁴⁸ neng sa'dox
 rakawza ndey säpaxäs ma song,
 xa kän kä'day kagur ma delde
 wungga tä ngaki mälegeng.

20

Bugundugku Yasuwa

¹ Xongenendäng Yasuwa bälde
 kän tä kaxsä kaldä axä tämed tä
 Kaläg na mäduwale yaxsäwecci
 apo lege ngakä Kaläg tä känang.
 Na bazuwinygä menggä tämed
 na menggä lelericcä asiriyenä
 Musa na ngondowinygä Yaxudiny
 kawuno täma ² ngadeccä täma
 ka, "Lapäng, xänang kä'dakas
 gi ka wexseng? Xänang kadong
 butug tägi ka wexseng?" ³ Neng
 Yasuwa kämeley täsa ka, "Amäne
 anggo mäned ndä anggo buci
 tagä. ⁴ Kaläggäng kä'daka Yox-
 ana ka pacä känang, wala känag
 kä'dakas ma ka mäpacsang?"

⁵ Na sacengesuno tä cengic sa-
 bodsa watäkäsa sängadeccä ka,
 "Kax 'doccig ngadig ka, 'Näs
 Kaläg' na mä'do mängade ka,
 'Wi siye anggo kämeneng ngakä
 ma Yoxana songang?' ⁶ Ndä
 mändey kä'doccig kangadig ka,
 'Näs känang,' kän kä'day 'däme
 kog na nganyu, xa kän oxo ka
 Yoxana me logeyang."

⁷ Na sägä'docco sabuc ta Ya-
 suwa ka säyex käxa kä'dakas
 Yoxana ka pacsa song. ⁸ Na
 Yasuwa ngade täsa ka, "Neng
 aläpedäng käxi kä'dakas butug
 tagä ka awexse nangang song."

*Seredäniccä Kängga Samene
 Zäg Täng*

⁹ Yasuwa kaser legey tä kän ka,
 "Apangandäng käsäbä pelowge,
 ndä menes tä menggä pelawatäng

ndey meskadä yä kä'doc tä wedäg kalaygädä. ¹⁰ Kala weg kiye de säjede na mayaxsas cäläxsäma ka 'doc täsa menggä pelowgi mamene zäg tängang, ndey ka larä weg toga käma. Neng sa menggä pelowgi mamene zäg tängang kabadä cäläxsäma ndä matas täma na asängge päloccu mänang. ¹¹ Sax mändey mägäläsä mayaxsa nuxu cäläx. Na mändey salandä ndä säbadä ndä sämatas täma na asängge päloccu. ¹² Sax mändey mayaxsa kodoseneni. Ani kala sägäbadä sägämexestey ndä sämaga tunyu.

¹³ “Na ledä pelow ngade tä ngase ka, ‘Oxadi asog gangang? Basa yaxsas tirä päxä peneng-gong ampaye ngake pacceyang nuxus sä'doc sänyay ma.’ ¹⁴ Ani känggi samene zäg täng koxäs nya penämaniyang, sägaxsäning sängadeccä ka, “Doxtongang luguccing, nycugo apaxa ndey lugig pelowge!” ¹⁵ Na tetex samen ma sabokung ma tunyu tä kaxsänggä pelow sägä'docco sapax ma.” Na Yasuwa kamän sa ka, “Ledä pelowgi kamenes pelow täsang sogo sa key? ¹⁶ Ma mäwunodung mäpaxe känggi mamenes pelow tängang yä mädogada tä kängga cakuny.”

Na kala kän kädäng ngakong na ngadeccä ka, “Nyäzekä ngakong ndakä soguning mänang!” ¹⁷ Neng Yasuwa kalaley sa käteg na ngade täsa ka, “Ngaki garekärejesuno tä Sorunu Kaläggang ngadeccä ka wi? Ngadeccä ka, ‘Ngayicci menggä tonyad käpexkäng kalayis ngayicciä saluweccä kadasuweccä ax.’* ¹⁸ Ndä käxa kadel täzä nya ngayicciyang, nyäroborobogo yä käxa nyadeles zeneng, nyäregerereje.”

¹⁹ Na tänya axä owdi menggä lelericciä asiriyenä Musa na bazuwinygä axä tämed tä Kaläg paye ka men ma xa sabäle ka maser ngaki täsa, neng sänyigate kän.

Yawgä Tuluba ta Kaysar

²⁰ Ngotorpodagä Yaxudiny jeng-gere Yasuwa käsac ndey ka sä'dox rakawza sämenäs ma na sayaxsas menggä raj ka 'docco paxesäning käräp sogosuning kängga apoccu. Säpaye ka sädäng legey tä ikäma ndey sämenenäs ma tä andä buguningzä Romaniny. ²¹ Na menggä raj ngadeccä täma ka, “Me baldic, wa ayexig gi ka nycofu'dono legey ndä bälde zänggä nga tä ngakä Kaläg. Ndä päx gele kän song. ²² Gang kädäppa ka wa yawwig tuluba adogig ta Kaysar wala awangig toke?”

²³ Neng Yasuwa kabäle rajsi tä mägan ygäsang na mängade täsa ka, ²⁴ “Doguning dinarsä Romaniny tagä. Läpäning ligidä xänang na agä xänang garekärejesuno tä ongeneng?” Na sängadeccä täma ka, “Näkä Kaysarang.”

²⁵ Na Yasuwa ngade täsa ka, “Dogi wegki layis gäkä Kaysarang ta Kaysar, na aki layis käkä Kaläggang dogi tä Kaläg.” ²⁶ Na tänya owdi sägädongasa tä ngaki malegeyang na sä'dox rakawza ndey sämenäs ma tagä kän song, na sägämolosuno.

Batad na Ngäsad tä Xäs

²⁷ Kulung menggä Yaxudinygi säbangäs Saduginy, ngadeccä ka kig äxse ngäsata tä xäs songang, kawuno ta Yasuwa. ²⁸ Sängadeccä täma ka, “Me baldic, me logey Musa garekärejesa nga täwas ka apangza päxä bona kabagsa ndä äxsä yä kiyäng pipu songang,

* **20:17** Yasuwa bangäs ngase ngayicciä saluweccä ax.

päxä bona bag nya mandursi ndey iyäng pipu tänya päxä bonanani käxsäng. ²⁹ Ndä enggä bonyatäng paxtinding. Päxä bonanani täzäläggang kabagsa ndä käxsä kawangasa uxe kiyäng pipu täng song. ³⁰ Ndä ani täbangeneng kasog mänang. ³¹ Kodoseneni kasog mänang. Sägädoneydä batakä ce uxi ndä sägäxse na'anggäsa paxtinding sägiyäng pipu song. ³² Na ce täzäce cägäxse tä bangäsa. ³³ Gang mänangang, xänang täsa 'do layis yoxuce tä xongondu ngäsad tä xäsang, ndä na'anggäsa sägädoneydä batakä ceng?"

³⁴ Na kala Yasuwa ngade täsa ka, "Menggä zong batacca na säbate. ³⁵ Xa känggi lelexiny, ur'dug ngäsoätäsäng tä xäs tä xongondu ngäsad tä xäsang, batacca na säbate song. ³⁶ Ndä sa mändey säxseccä song xa kala sa'das malayikada. Säs enggä Kaläg, xa sänguso sa tä xäs. ³⁷ Mändey me logey Musa kabäle ka käxa käxsä ngäsata tä xäs. Ka'das ani gärekäreesawa tä Sorunu Kaläg tä ngakä masi kagusi ta Musa tä kaxsetang, ani mabandäs Kaläg ka Kalägä Apraxim, Kalägä Isxag na ka Kalägä Yaxubang.† ³⁸ Kaläg Bazuweccä kängga oxaccang, päx näkä kängga käxseng song. Xa kän kä'day ayeccä tänya."

³⁹ Na kala kulung menggä lelericä asiriyenä Musa kabuc tä ma ka, "Me bälidic, gi kälegeyze apo na'do!" ⁴⁰ Na todi sanyigatas mänekä ma.

Mäneki Padägin y Yasuwa Kamänäs Kän tä Ngakä Almasi yang

⁴¹ Neng mängade täsa ka, "Oxadi siye sa sängadeccä ka Almasi näs päxä pe Dawutang?

⁴² Dawud täze ngade tä Sorunu Masmur ka, 'Bazuwec Kaläg kangad ta Bazuweccang ka, "Bo icca tä cengicä andä abanic-cang,

⁴³ bal asog gi nyebesa menggä kurugi täzäg."'

⁴⁴ "Dawud bangäs ma 'Bazuwec,' yä mälayis päxä pene key?"

Yasuwa Kädaxä Menggä Räkke ka Wang Poporey

⁴⁵ Ani kän kä'day deldeyäs wungga ta Yasuwang, Yasuwa ngade tä menggä räkke ka,

⁴⁶ "Meskädäning ta menggä lelericä asiriyenä Musa. Xa säpaye lagkä tanduga apoccu säwalangeccä nang ndä säma'dite modey tä owtagä nganyatada na säpaye cad tä owtagä dädäxti tä axinygä paliccinygä Yaxudiny na owtagi sänyaye ngotoropu täng tä siyatang. ⁴⁷ Yä sägäläkäläji wegkä manduriny ndä sädertesäno säpalacca mäna'ang. Känggi kala akakiyang, sag seley Kaläg 'doco cäläxti ta'asang."

21

Mandur Kadägese

¹ Yasuwa jenggererce tä axä tämed tä Kaläg na kox känggi kadangandeng gawdadas wegkanagi kabegse nangang tä kaxsä cokonu yawgä weg tä Kaläg. ² Na mändey mägox mandursa wiwandäng gawa enggä ariyaliny pädax tä kaxsä nya cokoni. ³ Na mängade ka, "Aläpedäng zänggä nga tanggo, lala päxä me wiygong näs manduranang nyang gawa wegke kamo'du kän kä'dayang. ⁴ Xa känggong kä'day kabegse kang kabag weg tä zänggä wegkä

† 20:37 Kaläg kalegeyze ta me logey Musa tä kaxseti mas kangäsa täng ndä siye kaxsed songang.

tangandägka ndä toga, yä ce satäng täce kätogo'dog song yä cabag kä'day cadoga tä Kaläg."

Bolugi Läpedäng Sanydä Owang

⁵ Xongenendäng känatäng leg-ecce tä ngakä axä tämed tä Kaläg, tä wegki kabastäning na nganyugi wuxeccä täwang axang na wegkä beged, na Yasuwa ngade täsa ka, ⁶ "Gang anggo nycuccang jeng-geredeng wegkong xa owandäng wunodung kax ngayicca tenggelecece täzä wayanandäng song, säcobotasa täzäg kä'day!"

⁷ Na samän Yasuwa ka, "Me bälidic, sangakong bägälic kälegeyang sogoduno ogey? Na oxadiyang layis boluge läpedäng ka ngakong sogoduningang?"

⁸ Na mängade täsa ka, "Meskädäning xa acaka sänanangey anggo xa kulung känatäng mange wunosung nanange anggo nagang, ngadeccä ka, 'Agänang anäs Almasiyang,' ndä kala, 'Sanydä ow kawung.' Acaka anggo ndängeng ngakäsa! ⁹ Ndä kändängeng pogud na keley na kamatang, ndakä nyigatäg men anggo. Xa basa ngakong wuno kayesäno täzälägäne tä loydägkä ow. Ndä sanydä ow wunodung tetex song."

Cäläxtigä Menggä Räbkä Yasuwa

¹⁰ Yasuwa ngade ka, "Pogud ngäsata tä cabäarta, ndä buguninginy pogo ngastänga. ¹¹ Ndä mändey wäxäd na buxu na täxäd wunosung 'da'de ota mange ndä nyigatäg mene kän na mändey tädäxtäg na bolu päkätäsäng tiyati."

¹² "Ndey ka ngakong kä'day sogoduno, sä'docco täzälägäne sämen anggo säcäläxti anggo na sämenedes anggo tä asänggä menggä axä paliccä Yaxudiny na särikidis anggo tä ax. Sägodung

anggo tagä buguninginy na tagä turuginy xa anggo kämeneng ngakang. ¹³ Ndä xongondeneni layis akäsog tanggo ndey läpeng ngakang. ¹⁴ Ndakä gäredeng 'doga noccang legedeng tagä buguninginy ndey ka mäxising nang. ¹⁵ Xa agä anoco alägi anggo na turaydey tä 'doga noccang legedeng ndey ndakä menggä kurugo mo'du anggo.

¹⁶ "Menggägo na enggä bonggo, na wayakägo na biskodagägo 'docco menedes anggo de sogo kulung acänggägo säpaxe. ¹⁷ Na mändey kän kä'day 'docco saxe anggo xa anggo kämeneng ngakang. ¹⁸ Neng tä ngakong kä'day, 'doga zegeledäng rong-iccägondäng song. ¹⁹ Ndä mäganygä padätägkägo tä ngakang sogo anggo liliccing ur'dug."

Ursalim Wanyiswa

²⁰ "Neng xonga känoxang Ursalim kagukuriwa na asägaruwang, ndey kala bäleng ka wanyiske kawuno käsac. ²¹ Ndä känggi tä cabärä Yaxudiyang basa oyasa tä zänggä cabäarta. Mändey känggi tä kaxsä Ursalimang, wulageccä ndä känggi tunyang ndakä läsa, ²² xa sa sänggi Kaläg cäläxti menggä Ursalim tängang, nyang ndey ngaki gärekärejesänong 'desesäning.

²³ "Ndä tänya xondi kawungang woyoy tä uxugi kä'dosuning na 'deyecceäng! Xa todi kän zäyazäyangedäning täzäg na bälade xuxubtäg. ²⁴ Sädelgetese ta asänggä menggä salu na menäs sa cäläxiny tä warä kän. Känggi näs Yaxudiny songang 'docco paxatasa Ursalim na teretereje basa xongondäsa 'desedeswa."

Wunakä Päkä Käxa Jul

²⁵ "Ow kawungang, noxadang bolu tä xong tä asämex na tä

nyinyiwes ndä kân kä'day täzäg wiyazeccä na käre ngakä xudux-udigä colonggo na dampajeygä ma. ²⁶ Nyigatäg mene kân togada tä woldoxey tä 'dogi sägox wunodung tä walangiccang, xa panggudugki tiyating kala gi'dikidäning seley.

²⁷ "Na kala kân oxo agä, Pächä Käxa Jul ampagacca tä däminggaru na panggudug na tädäxtic. ²⁸ Neng wegkong kaso-gunongang, ngusosäning bolosuning na mäganygä pädätäg xa kala 'dakiccägo kacecce'deyze ngäte."

Seredäniccä Etä 'Dami

²⁹ Yasuwa kaser nga täsa ka, "Lala etä 'dami na kulung ewegong bägäliccakang. ³⁰ Känoxang wungga lilixiccing, na bäledeng ka kala wiwilis ngäte. ³¹ Mändey känoxang ngakong sogoduningang kala bäli ka bugundugku Kaläg kasex-tesäng. ³² Aläpedäng zänggä nga tanggo ka menggä zong äxseccä song basa ngakong soguno. ³³ Zäkoxa na täzäg 'desetäsäno yä legeyyang wayeccä song.

Nycicci Palecci

³⁴ "Mesekädäning ndey acaka mäganygägo pägäni ndaldänang tä tawustäg na tä wuxid de bux paxe anggo, na käreka ngakä aygägo ndä acaka sanydä ow wung ndä kurumusa anggo kala kadäbäx. ³⁵ Xa nya xongondi wunodung karamedäng känggong kä'day täzäggang. ³⁶ Wadi layesi kängga cuccu cagiying na palecci ndey layang mpädägänyang ndey mäsasing ngaki kä'day wunosung sago-duningang ndey ndokalang tagang agä, Pächä Käxa Jul."

³⁷ Todotol Yasuwa bäldecce tä kaxsä kaldagä axä tämed tä Kaläg ndä ongutang mä'do mäccu tä Cabärä Zayitun. ³⁸ Ndä kân kä'day loxto ow wunotäsäno

täma tä kaxsä kaldä axä tämed tä Kaläg tä dänggä bäldeccäma.

22

Yaxusa Kaläpe ta Buninginygä Yaxudiny ka Mämenede Yasuwa Täsa

¹ Xongondi Tanyaranä Raxifta Säwacce Song, ani säbangäs Pärkitang, kawung käsac. ² Na bazuwinygä menggä tämed tä Kaläg na menggä lelericcä asiriyenä Musa nyame rakawza ndey ka paxäs Yasuwa ndä sänyigate kân neng säpaye säpax ma na raj.

³ Na Däniye kadel tä wang nuxu accä känggämagi mägäligä asiny wang pädaxang, ani säbangäs Yaxusa Iskariyuti. ⁴ Mägä'doc mabodsa na bazuwinygä tämed na ngotorpugi meske axä tämed tä Kaläggang ndey ka mämene Yasuwa täsa. ⁵ Na wadäggäsa kalaye tidiny sagixi ka sädogada ariyaliny täma. ⁶ Na kala sägaxsä ngakäsa na ma. Na ma Yaxusa mägä'doc mänyame rakaw ndey mämenenäs Yasuwa täsa tä owda xä'dä wundung täng.

Deleygä Pärkid

⁷ Kala xongondi Tanyaranä Raxifta Säwacce Songang kawung ndey ka Säpärkisi na sädämze na päxä dopolog. ⁸ Na kala Yasuwa kayaxsa Putros na Yoxana, läpede täsa ka, "Wesi ndele Pärkid ndey wunig siysig täng."

⁹ Na sängadeccä täma ka, "Owda keyang mpaye anoccig andeleyig tängang?"

¹⁰ Na mabuc täsa ka, "Ndänge, känoxang käläsang kaxsä pang 'doxadang apangandäng poko pete päse ma. 'Dorkäda ma tä pani mä'doc mäläsang, ¹¹ na läpi tä ledä pa ka, 'Me bäldeccä kayaxsä was tägi ka wa amänig gi ka axä palangaski mawunodung Säpärkicci täng na menggä

räbkäma na säsiyzang nyandi?'
 12 Mä'do mäläpedäng apanggä axandäng tiyati na ka'dika'dinä kaxse, wesi ndele wexekägo tadi."

13 Na kala sägä'docco sa'doxa sangaki Yasuwa kaläpe täsang, na sägädeley Pärkid täng.

Siyaki Yasuwa Kasiy na Menggä Räbke ndey Niminäs Mang

14 Kala sanä Pärkid kawung, Na Yasuwa kä'doc kagur siyad na känggi mägäligäng. 15 Na mängade täsa ka, "Wanang tidi xa kalängädi tä siyakä siyakä Pärkidkong nanggo xa kala sä'docco säcäläxti agä tä bange. 16 Ndä aläpedäng tanggo ka agä asiye Pärkid nanggo mändey song basa ngaki Kaläg kayaxsäng agä tängang 'desesäning layis wega tä bugundugku Kaläg."

17 Na mabag päxä kobox päse malog Kaläg mängade ka, "Mene dugi na'anggägo. 18 Aläpedäng tanggo ka xongondong sanydang-gang tä wuxikä magä adilu basa bugundugku Kaläg wuno."

19 Na mändey mabag raxif malog Kaläg ndä mäbeny mädogä täsa mängade ka, "Yanä wanangang kadogung tanggo. Zogada adinong mänang ndey nimidänang agä nang." 20 Kala sasiyza na mabag päxä kobox, mängade ka, "Päxä koboxsä tamiccanggong coladaswa tang-gong, nyang layis axäska warändi tanggo na Kalägang."*

Paränakä Mäganyäwan Tunyu

21 Yasuwa ngade täsa ka, "Lala, käxi 'doc menedes agäng andenenang nagä tä tumunu siyad ganang. 22 Agä, Päxä Käxa Jul a'docco anäxse kala ngaki Kaläg kabogkasang ndä woyoy

ta apangzi menedes agäng!"
 23 Na tadi sadelese tä mänekä ngastänggäsa ka xänang seley 'docco sogo ngakongang.

24 Na sawaläte ka xänang tä waräsa ngake tädäxiny mo'do acängganang. 25 Na kala Yasuwa ngade täsa ka, "Buguninginy na ngotorpugu känggi näs Yaxudiny songang cäläxti kän ndä dalacca ka apoccu. 26 Ndä anggo kändäppang ka layang ka'das sa song, wadi käxi tä warägo ngake tädäxiny kamo'du acängganang, bokasa ngase täzäg na ngotorpo lay kala me wexed. 27 Xänang ngake tädäxiny mo'do accanang, käxi kacca bene siyatang, wala käxi wexe siyatang? Wadi käxi kacca bene siyatang kädäppa ka nyaza ngake tädäxinyang. Neng agänang tä warägo ka'das käxi wexecceng.

28 "Anggog tol kändokalang nagä tä läbang. 29 Nenyang agä adogodung butug tanggo ka'das togunakenegi appanang kadogunäs tagäng, 30 ndey guring siyad tä owdu bugundugkang ndä nycatetäsänang tä komzu bugundug menedeng caxsänggä Isray-ilinyi asiny wang pädaxang."

31 Na Yasuwa ngade ta Saman Putros ka, "Saman, Saman, dänge! Däniye käpaydä ka läbä anggo na'anggägo ndä Kaläg kä'daka, ndä Däniye 'do pede anggo kala pedeki me pelow pededenäs nyadanä gärwec täpoxang. 32 Neng agä kapaleyza tägi Saman, xa ndakä menekä ngakägi tagä 'dexäning. Xongonda kämeley mägaxsäging, pädäti enggä bonggugo."

33 Neng Putros ngade täma ka, "Bazuwec, kax ka wi, na agä ano nagi tä ax na tä xäs!" 34 Na Yasuwa kämeley täma ka, "Putros dänge, ndey ka tä kesekä ow

* 22:20 Axäski layis kākä boxinyganang sag kän tämecce na oxayda ndey ka cay ngaka tasiny tängang.

modolong logo, gi n'do gäli agä taxä kodos ka 'di agä."

³⁵ Na Yasuwa ngade täsa ka, "Ani kayaxsanäs anggo tä wexed ndä aläpänäs tanggo ka ndakä bagang ariyaliny mange nanggo na meldänä wedäg na 'dataginy axinyga pädaxang, päx nuxu 'dogkandäng kä'disä tanggo?" Sabuc ka, "A'a, päx 'doga kä'disändäng song." ³⁶ Na mængade täsa ka, "Neng gang käxa tanggo ndarudigä ariyaliny tängang bag na mändey bag meldänä wedäg. Ndä käxa saläne täng songang, nganya tandäne, nganyäs salä." ³⁷ Aläpedäng tanggo ka ngaki menggä logey gärekärejesa tä ngakangang, basa 'desesuno. 'Ndä kän bangäs agä märing.' Xa ngaki menggä logey gärekärejesa ka soguno tagäng kala sogoduno." ³⁸ Na menggä räbkäma ngadeccä täma ka, "Za, Bazuwec, saluwakang todong pädax." Na Yasuwa läpede täsa ka, "Mangeccä."

Yasuwa Kapaleyza tä Cabärä Zayitun

³⁹ Yasuwa kawetä ka'das ani todotolang kä'doc tä Cabärä Zayitun, na menggä räbkäma kabag bangäma. ⁴⁰ Sägäcogu ow na mälapede tä menggä räbkäma ka, "Palecci ndey Däniye käläbä anggong degeng."

⁴¹ Na masexte mägä'doc mägädukurusa mäpalacca ka, ⁴² "Appa, känox gixisang, ampaye gi xony agä tä akäsogu cäläxtigong awededes tängang. Yä näs giza kämpaydäs agäng, wanga soguning na ngakägi xa na ngakang song." ⁴³ Na malayika käpätäng tiyati käpädati ma. ⁴⁴ Tä zänggä paleygämagi mäpalacca na zä'diriy na mapaleydäcca paccey seley dexä modicäma täläbe täzäg ka'das tamic.

⁴⁵ Ani mangäsanäs tä paliccang mägämele ta menggä räbkäma ma'doxas sa sapägini tä kuny de sasändacco. ⁴⁶ Na mængade täsa ka, "Oxadi sängadangang? Ngäsosuning! Palezi ndey Däniye käläbä anggong degeng!"

Menekä Yasuwa

⁴⁷ Ani musku mälegeccenäs täsang, nuxu me räbkämani säbängäs Yaxusang kaleza koyo xä'dä na kä'doc kawu'dakas Yasuwa käbuciy. ⁴⁸ Neng Yasuwa ngade täma ka, "Yaxusa, gi gang menedes agä, Päxä Käxa Jul na bucigong?"

⁴⁹ Kulung menggä räbkä Yasuwagi nangang kox 'dogi paye sogkuwang, na ngadeccä ka, "Bazuwec, mpaye was wa ampogig nycokong na salugusko?" ⁵⁰ Na nuxu me räbkäma kajede wundä abaniccä cäläxsä ngotorponu axä tämed tä Kaläg täpox. ⁵¹ Neng Yasuwa ngade ta menggä räbke ka, "Ndokolosi mänang!" Na Yasuwa käläbä wundä cäläx kämele täng na kalay apo.

⁵² Na Yasuwa ngade ta bazuwinygä axä tämed tä Kaläg na ngotorpugu megäskä axä tämed na ngondowinygä Yaxudinygi kawuno tä menekä mang ka, "Anggo käsagang tagä na salu na gany dexä ka'das ka agä anäs märing?" ⁵³ Agä kanycu nanggo tä kaxsä kaldä axä tämed todotol ndä päx tä nuxung kämeneng agä song. Neng ongudong xongondugong na xongondu butugku lätäg!"

Putros Kagil Yasuwa

⁵⁴ Kala samen Yasuwa samagas tagäsa sagoyas tä pang ngotorponu axä tämed tä Kaläg. Yä Putros räbto sa ndä lewa täxandäxang. ⁵⁵ Kulung kän kadox mas tä pidinä kaxsä kal pagedäning na Putros kä'doc kacca tä waräsa pagewa. ⁵⁶ Na

päxä uxandäng näs me wexed kox ma tä banyiccä mas na kajengerey ma ngade ka, “Apangzong nyang na Yasuwa seley!”⁵⁷ Neng Putros kagil ngade ka, “Ama kuxong, ayex ma säxong!”

⁵⁸ Sax mändey tä bälaxtäg, nuxu accäsandäng kox ma na ngade täma ka, “Gining mändey näs nuxu me räbkä Yasuwa.” Neng Putros ngade ka, “Amo, agänang song!”

⁵⁹ Sägäcudisi mäna'ang na nuxu kig kalewa ka, “Kax ka wi, na 'doxtongang na Yasuwa, xa ma mändey mä me Calil.”⁶⁰ Neng Putros kämeley täma ka, “Amo, ayex 'dogani legeng song!” Na tänya owdi musku tä zänggä legeygäma, modolong kalog.⁶¹ Na kala Yasuwa Bazuwec kawexeswa kalala Putros käteg na Putros kagäräng ngaki Bazuwec kalogey tämang, ka, “Ndey ka tä kesekä ow modolong logo, gi n'do gäli agä taxä kodos.”⁶² Na Putros koya tunyu kangey paccey.

⁶³ Na kala apangaski kamen Yasuwang kadeb ngobku Yasuwa ndä bade.⁶⁴ Sägaxsä agäma ndä sämäne ma tetedetex ka, “Lo-geyzi! Xänang kadä ging?”⁶⁵ Na mändey sägäcemdä ma.

Sagoya Yasuwa tagä Ngotorpugä Yaxudiny

⁶⁶ Ani ow kagezänasang, bazuwinygä axä tämed tä Kaläg na menggä lelericcä asiriyenä Musa kudurisuno. Apangaski kamen Yasuwang kagoying ma ta ngotorpugä Yaxudiny.⁶⁷ Sängadeccä täma ka, “Känox näs Almasiyang, läpäng täwas.” Neng Yasuwa ngade täsa ka, “Kax aläpäng tanggo, na gixiding song,⁶⁸ ndä kax amän anggo na bucing song.⁶⁹ Neng bäli ka xongondong na tä bange kä'day, agä Päxä Käxa Jul, anoco

anycata tä andä abaniccä Kalägi panggudug tängang.”⁷⁰ Na kala na'anggäsa sängadeccä täma ka, “Neng giningang näs päxä Kaläkgang?” Na mabuc täsa ka, “Axeneng, anggo ngadaccang ka agäng.”⁷¹ Na sängadeccä ka, “Käxa mändey payedig ndey ka mänigkandäng song. Xa kog kädängig na wunggog tä ikäma!”

23

Samenes Yasuwa ta Pälatis

¹ Ngotorpugä Yaxudiny kangu-sosuno kagoya Yasuwa ta Pälatis.

² Sagäli täma ka, “Wa kamenig 'doxtong woko kän ka sog pogud na ka wang yawgä tuluba ta Kaysar na mägasada tä ngasäma ka ma mä Almasi buguning.”

³ Na Pälatis kamän Yasuwa ka, “Giningang näs buguningzä Yaxudinyang?” Na Yasuwa kämeley täma ka, “Axeneng, gi kangad mänang.”

⁴ Na Pälatis ngade ta bazuwinygä axä tämed tä Kaläg na xä'dä ka, “Ka'dox 'doga tasta de ka giling nga nang tä 'doxtong song.”

⁵ Neng saleyning sängadeccä ka, “Ma mabälde kän mäwoko bägälic tä kaxsä Yaxudiya. Madeb tä Calil ndä mäccogu owdong nang!”

⁶ Ani Pälatis kädängäs ngakiyang, kamänze ka cong Yasuwa näs me Calilang.⁷ Pälatis kabäle ka Yasuwa käpätäng Calil ndä Xirudusang näs bazuweccä Calilang, na mayaxsas Yasuwa ta Xirudus xa nya xongongi Xirudusandäng tä Ursalim.

⁸ Ani Xirudus koxus Yasuwang wanäma kalay tidi paccey xa mandäng mäbenecce ka mäpaye mox Yasuwa, xa mägädängdä sälege ngakä Yasuwa ndä mäpaye ka mox boliccä were wexeki Yasuwa wexeng.⁹ Xirudus kamändä Yasuwa nano. Neng

Yasuwa kabuc täma song.
¹⁰ Ndä bazuwinygä axä tämed tä Kaläg na menggä lelericcä asiriyenä Musa satäng tänya owdi dokoloccu, kaleyning kilidi nga täma. ¹¹ Na todi Xirudus na asägarugu megäske kangobtu Yasuwa ndä lagä ma na tandugu butug ndä meles ma ta Pälatis.
¹² Na tänya xongondi Xirudus na Pälatis kalayenäs aminu xa kalaygädä säs menggä kur.

Sagoyas Yasuwa tagä Xä'dä

¹³ Pälatis kabandä bazuwinygä axä tämed tä Kaläg na ngo-torpugä Yaxudiny na kän, ¹⁴ mäläpede täsa ka, “Anggo goynang 'doxtong tagä ka wanyis kän. Ndä kamändä ma tagägo ndä 'doga ka'dox täma tasandäng näs 'dogi anggo giling täma ka mäsogondäng song. ¹⁵ Ndä wala Xirudus ka'dox nuxu 'doga tas täma, nenyang mägämeleyäng ma tägogkang. Za, ma masog 'doga de ka säpaxe ma täng song. ¹⁶⁻¹⁷ Gang adogadas ma säbade ma na ke'diccä oxay ndä kala a'dakas ma.”

¹⁸ Neng sägädawasa na'anggäsa ka, “Baga 'doxtong paxa! Yä 'daki Parapas täwas!” ¹⁹ Parapas apangza sägäräki tä axang xa kageley ngase pogo turugsä Rumandi kamen Ursalimang ndä kapaxsa. ²⁰ Pälatis kalegeyze täsa mändey tä ngakä Yasuwa xa mäpaye mä'dakas Yasuwa. ²¹ Neng saleyning sädaweccä ka, “Nggadi ma tä kalic, nggadi ma tä kalic!” ²² Pälatis käläsä taxä kodeseneni ngade täsa ka, “Xanya? Oxadi masog tasang? Agä ka'dox 'doga ma masog tas kädäppa ka apax ma täng song. Agänang adogadas ma säbade ma na ke'diccä oxay winy ndä a'dakas ma.” ²³ Neng musku saleyno na daw ka sägadas ma tä kalic. Na mägädänge täsa. ²⁴ Kala

Pälatis kagixi 'dogi säpayeng na kä'dakas Yasuwa ka säpax. ²⁵ Na mägä'daka 'doxti säbangäs Parapas sägäräki tä ax xa kageley ngase pogo turug na kapaxsang yä macananga madoga Yasuwa ka säpax xa kän paye mänang.

Gadeygä Yasuwa tä Kalic

²⁶ Ani sabokunäs Yasuwa tunyang, sägäpasasa na Samandi näs me Sayrunang. Käpätäng tä xining ka läso Ursalim na sägänagey sägäpoka kalic tä ngase ka 'dorkädä bangä Yasuwa nang. ²⁷ Na kän kawuno mange kabag bangäsa, ndä tä warä sa känggi uxuwatäng kunuccu na ngeccä tä ngakä Yasuwa.

²⁸ Neng Yasuwa gaw ze läpede täsa ka, “Anggo uxugu Ursalim, wanga ngeyig tä ngakang, wadi ngeyi tä ngakä ngastänggägo na tä enggenggägo. ²⁹ Xa ngakong ngaletäsäno, seley owda tasandäng wunodung ndä kän 'docco ngadeccä ka, 'Baxändäg ta pixu na kuxtugi taxä nuxu käpoku pipi songang na ki'digi kä'deyze songang!” ³⁰ Ndä nya owda tasti kawungang, kän 'docco ngadeccä tä cabärta ka, 'Delesäning tä zänggäsko!” na tä cobocoboriny ka, 'Mäxosuning nawas täzäg!” ³¹ Gang kän kasog ngakong tä eta musku tuduwinyang, oxadi sogowa tä eta kamasäng?”

³² Kulung märinginyatäng pädax sabokung tunyu ndey ka sä'doc säpax na Yasuwa. ³³ Ani sägäcogus owdi säpaxe kän täng säbangäs “owdu zänggä kängga käxseng”, sägä'docco sägadas ma ta kalic na mändey märinginygi sägadas tä käna. Nuxu ta cengiccä abaniccäma na nuxu tä cengiccä nyogoldäma. ³⁴ Neng Yasuwa ngade ka, “Appa, wangi täsa xa säyex ngakong säsongong song.” Na sa asägarugi gadas Yasuwa tä kaliccang

sägä'docco sägäcasäng sawany atapayu ndey sälartäs tandugu Yasuwa.

³⁵ Kän kädokolo lale ma, na mändeng ngotorpugä Yaxudiny kadegejeydä ma ngadeccä täma ka, "Ma maxonydä kän. Wanga ma mäxony ngasäma ka cong mäś Almasinä Kaläggang, ani Kaläg kayaxsäng nuxungang!" ³⁶ Mändey asägaru kangobtä ma ndä 'docco toga buxka kawace täma ka mäwux ³⁷ ndä ngadeccä täma ka, "Yex ngasägi ka näs buguningzä Yaxudinyang, xonya ngasägi!" ³⁸ Badaxiccandäng sägärekkärejeze täng tä owdu zäma ngade ka, "Buguningzä Yaxudinyanang."

³⁹ Nuxung märingzi sägadasa tä cengiccämang kalegeyze täma näs langad ngade ka, "Gi näs Almasi song? Ata xony ngasägi na xony was!" ⁴⁰ Neng märingzi nuxungang kadux nya accanani ngade ka, "Gi nyigate Kaläg song? Noxo kogkakang na'angogog tä zänggä xäs. ⁴¹ Tä ngakog tireneng xa kog käsogig ngaka siye kog, yä 'doxtong kasog nuxung 'doga tas song." ⁴² Na mawetäde na legey mängade ka, "Yasuwa, känox känoc tä butugkuging wanga agägi wayesäng tagä." ⁴³ Na Yasuwa ngade täma ka, "Aläpedäng zänggä nga tägi, xongondong agänang nagi 'doccig tä Pang Kaläg tiyati."

⁴⁴ Ani xong kawunäs tä piding, ow kälämaswa täng bägälic kasog sada kodos, ⁴⁵ xa xong kadärändä. Na tandänä akäsogaldä axä tämed tä Kaläg kacereswa tä pidi käläräswa pädax. ⁴⁶ Na kala Yasuwa, kabandäsa paccey ka, "Appa, agä ka'daka ligidang tä andägi kala!" Ani mangadäs ngakiyang na magänungis sanydä nunggäma.

⁴⁷ Ngotorponu asägarugu Roman kox 'dogi kasogkuwang,

na kädädäxti Kaläg ngade ka, "Pezängga 'doxtong käxa lelexang!" ⁴⁸ Na kala xä'däni dokoloccu kox 'dogi kasogkuwang, kämele tä pa na zängay. ⁴⁹ Na känggi kä'day yex Yasuwang kädokolo täxande na uxugi käräbkädä bangä Yasuwa cawu Calilang kox 'dogi kasogkuwang.

Bosku Yasuwa

⁵⁰ Apangandäng säbangäs Yusif nuxung ngotorponu Yaxudinyang, ndä käxa lelexang. ⁵¹ Ndä ma mäpaye 'dogi nycoki kawex ta Yasuwang song. Ma mäś me bo pana säbangäs Armataya tä cabärä Yaxudiya ndä mäbene bugundugku Kaläg.

⁵² Yusif kä'doc ta Pälatis ka toga wanä Yasuwa täma. ⁵³ Na Pälatis kagixi kadogas ma ka mä'doc mäccocoley wanä Yasuwa. Na kala mamulungi na darnase mägä'doc mägälola taxä morogsa sadotogey tä ngayic ndä kax taxä nuxung sabosu kig täng song. ⁵⁴ Ndä nya xongondeneni xongondu deleygä wexetang xa xongondu Sapid ngäte.

⁵⁵ Uxugi kabang bangä Yasuwa cawu Calilang, kä'docco tä bangä Yusif käsay morog na bokosänaki sabokasanäs wanä Yasuwang. ⁵⁶ Na sägämele tä pa sägä'docco sägädeley may na midä mäxäs. Na sägänunducco tä xongondu Sapid xa asiriye Musa kangad mänang.

24

Ngäsakä Yasuwa tä Xäs

¹ Xongondi tä bangä xongondu Sapitang, tä kesekä ow uxuwatäng kä'docco tä copku morog koyo mäxäsi sägädeleyang. ² Sägä'docco sa'doxa kädandafi gärenggärengeswa tä cengic, ³ ani sägä'docconäs saläsäs axä morogkang, sa'doxa wanä

Bazuwec Yasuwa wundung taxä morog.

⁴ Na sägädongasa sägäre ngakä 'dogi kasogkuwang, na tetex apanginy pädax kawayesäno kälagä tanduga dulatulajecä kädokolo tä wadäkäsa. ⁵ Na nyigatäg kadeles sa uxugi de kädukurusuno täzäg neng sa apanginygi pädaxang ngadeccä täsa ka, "Oxadi siye anggo nyamadang käxa oxacca tä warä kängga käxseng?" ⁶ Mandäng todong song, mabägäng tä xäs! Nimäning ngaki maläpäng tanggo tä cukuma tä Calilang, ⁷ aki ka Päxä Käxa Jul basa sä'docco sämenes tä asänggä kängga tasiny ndey gadas ma tä kalic, na tä sängädi sogo kodoseneng, mängäsata tä xäs."

⁸ Na sa uxugi sagäräng leg-eygi Yasuwa kalegey täsang, ⁹ na sägämele na morog sägä'docco saläpe ngaki kä'day kasogunong tä känggi Yasuwa käligä asiny wang nuxungang na tä kulung känggi tängang. ¹⁰ Sa uxugi kox ngakiyang Mariyom Macidalinang na Xana na Mariyom bo Yaxupag na kulung uxugi nasang sag kaläpe ngaki tä känggi Yasuwa käligäng. ¹¹ Neng ngaki uxugi kăcopu morog kaläpe täsang samen song xa salaleyis degejey winy.

¹² Na Putros kangäsa koy kä'doc kälím morog ka'doxa darnaseni samulungis Yasuwang winy. Na mägämel tä pa mägäbabangwa tä ngaki kasogunong.

Yasuwa Kaparaswa tä Menggä Răbke Pädax

¹³ Tänya xongondi menggä răbkä Yasuwagi pädaxang wedetese tä päxä cabära säbangäs Imawus, ndä kä'dalangaswa bate sada pädax na Ursalim. ¹⁴ Ndä sälege ngakä wegki kä'day kasoguning ta Yasuwang. ¹⁵ Na

tä zänggä legeygäsagi, Yasuwa kacubugiswa täsa wedeccä nasa ¹⁶ neng agäsa kamägäning sabäles ma song.

¹⁷ Na Yasuwa kangada täsa ka, "Legeygatiyakang legedeng ndä wedetesengang?" Na kăkărăb sägädokalasa sägänyonyey agäsa.

¹⁸ Na nuxung accäsani age ka Kiloppasang kabuc täma ka, "Giningang watăkăgi năs palangasic tä Ursalim tä enggä sänggongang dexä 'di ngaki kasogunong?" ¹⁹ Na mängade täsa ka, "Ngaka keyag?"

Na sabuc täma ka, " 'Dogi kasogkuwa ta Yasuwa me Nasrang. 'Doxteneni Kaläg kadoga panggudug täng na wexed na legey kasog kabälesäwa ka me logeygä Kalăgkang kayaxsäng tä kăn kä'day, ²⁰ ndä bazuwinygä axä tämed tä Kaläg na ngotorpugusko kamenes ma sägadas ma tä kalic ndä säpax ma. ²¹ Yä was wakabokosunig ka mang mäs Almasini kawung ndey ka xony Israyilang. Ndä ganang seley ngakong kala satäng säng pädax ndä kodosenenang. ²² Ndä mändey kulung uxugi tä warăskong kabal măganygusko ow tudizong xa saloxtu ow sägä'docco tä morog. ²³ Sägä'docco sa'doxa ngaccä wanăma song na sawuno salăpăng tăwas ka sägox malayikada läpede täsa ka moxacca. ²⁴ Ndä kulung kănggi nawasang kä'docco tä morog ka'doxa sangaki salăpăng tăwasang kalayenăs wega ndä sägox ma song."

²⁵ Na Yasuwa ngade täsa ka, "Ama kăngga kamanande, oxadi măganygăgo păpăxiny tä menekă ngakă menggă logeygi kalegeyze tanggong! ²⁶ Anggo kăbăleng ka basa

Almasi cäläxtiwa ndey sädädäxti song?" ²⁷ Na madeb geneygä ngakä me logey Musa na menggä logeygi kä'dayang, mägene kä'day ngaki garekärejesäno tä ngakä ngasäma tä kaxsä Sorunu Kalägang.

²⁸ Ani sawunonäs käsac tä wang päxä cabarang, Yasuwa kasoguswa käxa paye warä päxä cabär, ²⁹ neng sapappaledä ma ka mä'doc mälay nasa xa ow kamo'dsa. Na kala mägä'doc nasa.

³⁰ Ani magurus siyad nasang, mabag raxif, malog Kaläg ndä mäbeny, ndä mälarä täsa. ³¹ Na todi agäsa kalengesäning, na sajenggeray ma sabäles ma. Na käkäräb mägä'duywa täsa. ³² Na sängadeccä tä ngastänggäsa ka, "Yä päx mägangyog kalaye tidiny tä ngaki kä'dang mägene tägog tä akäsog näs käkä Sorunu Kalägang song?"

³³ Na tänya owdi sägämelese tä Ursalim. Säga'docco sa'doxas känggämagi mägäligä asiny wang nuxungang na kulung känggi todiyang kudurisuno ³⁴ na sa känggi sa'doxa kädurisunong läpede täsa ka, "Nästire Bazuwec kangäsa tä xäs, de maparaswa ta Saman Putros!" ³⁵ Na sagi pädaxang mändey sadedebeyde ngaki kasoguno täsa tä akäsogkang, na benyeki mabenyis raxif de sabälenäs mang.

Yasuwa Kaparaswa tä Menggä Räbke

³⁶ Ani menggä räbkä Yasuwa legeyis ngakämang, ma Yasuwa täzäma magayasawa tä waräsa mängade täsa ka, "Amodo anggo." ³⁷ Neng sägox ma na mägangyäsä kabal sa na nyigatäg kamen sa soxo ka sägox arälodic.

³⁸ Na mängade täsa ka, "Oxadi siye anggo nyägadänyang na basadang mägangyägong?"

³⁹ Lala asänggang na badagä exenggang, agänangang! Läbe wanang na lala, arälodic yandäng tä wane na ngay song yä lalang agä gang anggo noxadang ngayakang tä wanang na ya."

⁴⁰ Ani malegeyis legegongang, madoga badadagä exenggäma na asänggäma ka säzay.

⁴¹ Ndä musku säcukuludäning samen ngaki mangatang song xa wadäkäsa tidiny tä oxakäma de sägädongo. Na mamän sa ka, "Doga siyewa tanggo todongandäng päx?" ⁴² Na tetex sabag axsicca käbux sadoga täma ⁴³ na mabag masiy tagäsa tänya owdi.

⁴⁴ Na mängade tä menggä räbke ka, "Ngakanggongag kaläpäng tanggo ani musku cucusig nanggong, ka ngaki kä'day garekärejesäno tä ngakang tä asiriyenä Musa na tä sorunu menggä logey na tä Sorunu Masmurang ka bal päsesäwa."

⁴⁵ Na malenge zänggäsa ndey ka säbäle ngakä Sorunu Kaläg, ⁴⁶ ndä mängade täsa ka, "Sägädokoley garekärejey tä Sorunu Kaläg ka Almasi bal cäläxtiwa ndä äxsä ndä ngäsa tä xäs tä sängädi kodosang. ⁴⁷ Sädebe duwaleygä agä Almasi tä Ursalim na tä cabärta kä'day. Säduwale nga tä kän ka xajkä mägangyga tä ngaka tasiny ndey Kaläg wanga ngaka tasiny täng. ⁴⁸ Ndä anggo käzayang ngakong nagägo seley ndey läpeng tä kulung kän. ⁴⁹ Ndä gang lala, agä ayaxsedäng 'dogi Appanang kangad ngakeneng. Neng nycicci tä Ursalim basa Kaläg yaxsäng panggudug tanggo."

'Dockä Yasuwa Tiyati tä Pang Kaläg

⁵⁰ Na Yasuwa kabag menggä räbke kä'docco nang tä owda säbängäs Petani, na mayuxi asänggäma tiyati mapes sa. ⁵¹ Ani

māpesecenāsang, Kaläg kabag
ma tä pane tiyati.

⁵² Na kala sägädukurusuno
sägädädäxti ma. Na kala

sägämelese tä Ursalim na led,
⁵³ na todotol sädädäxti Kaläg tä
axä tämed tä Kaläg.